

حواديت السعادة

شريف أسعد

عنوان الكتاب : حواديت السعادة

المؤلف : شريف أسعد

المراجعة اللغوية : مصطفى عرام

الإخراج الداخلي : رشا عبد الله

تصميم الغلاف : أحمد الصباغ

رقم الإيداع : ١٣٧٧١ / ٢٠١٥

ردمك : 978-977-85204-4-6

الطبعة التاسعة : أغسطس 2015



المدير العام : هاله البشبيشي



دار تويّا للنشر والتوزيع



dartoya2015@gmail.com



Dar.toya دار تويّا للنشر و التوزيع



@Dar_Toya



Dar.toya



(+2) 01000706014 - (+2) 01140899887



٢٦٣ ش عبدالوهاب عبد اللطيف - كوبري القبة -
القاهرة - مصر

جميع حقوق الطبع والنشر محفوظة للدار

حواديت السعادة

شريف أسعد

دار تويّا للنشر والتوزيع

إهداء

إلى تلك المرأة التي مهدت الطريق بالنجاح طوال الوقت، إلى
الأم وقت أن أحتاج أماً، إلى الصديقة وقت أن أحتاج صديقة، إلى
الابنة وقت أن أحتاج ابنة

إلى المرأة المصرية
إلى زوجتي

شريف أسعد



"أنا حلو.."

لا مش شكلاً..

أنا ااااا حلو يا جماعة!!..

يا جدعان لا.. مش أخلاق برضه.. ربنا يكرمكوا

أنا... أنا ااااا حلو

أنا اسمي حلو.. نعم؟؟؟ انت اسمك أحلى؟؟!! ربنا يبارك لك

فيه يا حبيبي.. يا رب ارحمني

اسمي في شهادة ميلادي "حلو".. أيوة.. أبويا وأمي سموني

حلو.. ياااه.. أخيراً فهمتوا؟؟!! صح.. اسمي حلو.. أنا حلو

اسمي بالكامل؟؟؟! ضروري يعني؟؟!!

ما كفاية حلو وخلاص يا جماعة!!.. لازم؟؟؟

أمري لله...

اسمي الثلاثي..

حلو جميل خالص

إمم.. واضح إنه مفيش فايدة...

تعالوا احكيلكم الحكاية:

في ذلك الفراش الوثير وفي صباح يوم شتوي شديد البرودة.. تقلب "حلو" وقد ارتفع صوت غطيطة ليُرَجَّ جُدران الغرفة التي تسلل ضوء الصباح الخافت إليها من وراء ستار النافذة التي توسطتها.. بينما حملت باقي جدران الغرفة تلك الصور التي احتلت الكثير من المواضع العشوائية فوقها.. وظهر "حلو" فيها جميعًا مبتسمًا مع نفس الفتاة التي تظهر إلى جانبه في كل صورة من تلك الصور.

كان "حلو" شابًا في نهايات العقد الثالث من العمر.. متوسط الطول.. يتسم جسده بالاعتدال والرشاقة.. بينما كانت ملامح وجهه تدعو إلى الابتسام.. لم يكن هناك سبب معين.. ولكن قسماته كانت دائمًا تصيب من يراقبها بنوبة من الضحك.. وخاصة مع بداية أي تعارف أو صداقة قد تحدث في تلك اللحظة التي يقدم فيها نفسه إلى من يواجهه قائلاً بكل سعادة وثقة: "أنا حلو".

ربما كانت تلك القسمات مع طريقة الحديث الواثقة بالإضافة إلى اسمه الذي صرع الكثيرين ضحكًا بلا وعي سببًا مباشرًا للعلاقة التي نشأت بينه وبين تلك الفتاة الجميلة في أيام الجامعة.. حيث درسا سوياً في كلية الآداب.. قسم الوثائق والمكتبات.

تلك الفتاة التي توطدت علاقته بها يوماً بعد يوم.. مما زادهما قرباً في كل لحظة يقضيانها سوياً.

تحركت مشاعرهما بشكل متبادل بدون تدخلات من أي شخص.

كان "حلو" يعتمد تماماً على ما يمتلك من كاريزما مُبهجة وطريقةٍ ساخرةٍ في كل تعاملاته.. كان شخصاً تلقائياً للغاية.

لم يكن يبذل أدنى مجهود يُذكر لنشر الابتسامة على وجوه الجميع من حوله.. وكان لظهوره في أي مكان أثراً قوياً يظهر جلياً في إرتفاع صدى قهقهة الضحكات من حوله.. وخاصة.. صوتها هي:

"سعادة"

نعم.. اسمها "سعادة".

كان اسمها بمفرده مدخلاً للسُرور وإرسال البهجة في أعماق قلبه.. هكذا كان يراها دومًا.

حبّية عمره.. وطريق حياته.. التي أصبحت بعد مرور سنوات عدة وسط كفاح الحياة وتخطي العديد والعديد من الصعوبات والمعوقات.. زوجته.

تلك الجميلة التي لم تكن الابتسامة تغادر وجهها حتى في
أثناء نومها في بدايات زواجهما.. كانت "سعادة" رائعة القوام..
مُشرقة الوجه.. يزداد شكلها جمالاً وتأنقاً واثارة مع تلك العوينات
الرفيعة التي ترتديها.. والتي تختفي نهايات اطرافها بداخل ذلك
الشعر الأسود الطويل المنسدل وكأنه يحرس ابتسامتها.. ويقود
تلك الابتسامة إلى الشخص الوحيد الذي يستحقها.. "حلو".

كانت تلك الصورة الدائمة التي يراها بها.. منذ عرفها.. كانت
أروع لحظاته حين كانت تقف بدلال في طُرقات الجامعة حين
تنتظره آتياً من بعيد.. في جسد رشيق ممشوق مثير يسرق
نواظر المحيطين.. وهي تُلَوِّح له بذراع مرتفع.. مناديةً بقوة حتى
يراهها:

"حلو"

"يااا حلووووو"

"يا حلوووووووووووووووووووووو"

"إصحى بقى طلعت عين أمي يا أخي"

استيقظ "حلو" مفزوعاً على رُغد في كتفه سبب له ألماً
قارصاً لشوانٍ معدودة.. جعله يُحدق في ما حوله بذهول.. وكأنه
يُطالع تفاصيل الغرفة لأول مرة في حياته.. نظر إلى ذلك المنبه
الذي يجاوره للحظة والذي أشار إلى السادسة صباحاً.. مع صوت
المذياع القادم من المطبخ والذي اختفت تفاصيل ما يُردد نتيجةً
لوقوعه المتكرر فبدى ما يصدر منه وكأنها همهمة حوتٍ أزرقٍ

جائع في قلب المحيط.. ثم ما لبث "حلو" أن عاود النظر إلى مصدر الرُغد مرة أخرى:

"سعادة"

التي وقفت تنظر إليه في غضب وقد قمطت رأسها بقطعة من القماش على نفس طريقة الهنود الحمر لحظة خروجهم لمواجهة الغزاة الأمريكيين في بدايات الزحف على أراضيهم.. لم يكن ينقصها إلا قليل من ريشات الديوك الرومي فوق الرأس وخطين متوازيين من برطمان الصلصة لكي تخطهما أسفل العينين ليتم تنصيبها زعيمةً للآباتشي وتبدأ على الفور في ممارسة مهام عملها بقيادة معركة تحرير الشاطئ الشرقي للقارة بجدارة.. هكذا رآها "حلو".

ولكنه ما لبث ان نفذ الفكرة عن رأسه خاصة مع خطوات إبتعادها عائدة إلى المطبخ مرةً أخرى محدثةً فحيحًا مربعًا نتج عن احتكاك خفيها بالأرض.. راقب "حلو" ذلك الخصر الذي عرفه بالماضي.. والذي تغير مع مرور الزمن وامتلاء بالدهون على مر السنوات الخمس التي قضوها سوياً منذ زواجهما.

ثم بدأ في شعائر طقوسه الصباحية قبل النهوض من فراشه الدافئ.. بضع دقائق من الهرش في الرأس.. يليها دقيقة أو يزيد من محاولة الهرش في الظهر.. ثم بعض الهرش في الكتف.. وأخيراً.. هرش متواصل مكثف في البطن والأجناب والأرداف أثناء قيامه من الفراش وحتى وصوله إلى الحمام.

شرع في حلاقة ذقنه سريعًا وتبعها بغسل وجهه ورأسه
وخرج وهو يُجاهد في تخفيف رأسه بمنشفة ممتلئة بالمياه وصاح
وهو ما زال يضع رأسه داخل المنشفة البيضاء.

- يعني إنتي مش قادرة تحطي فوطه ناشفة بعد ما تتشطفي
الصبح؟؟ لازم أصحي الاقي الفوطه عايمة نوعّة في المية!!؟

صاحت "سعادة" من داخل المطبخ وهي منهمكة في مطاردة
صرصار صغير.. دفعه حظه العثر ليخرج في وقت خاطئ ليُفاجأ
بها.

- كان في فوطه ثانية ورا باب الحمام.. وفوطه تالته على باب
الأوضة وانت خارج تتغندر رايح الحمام.. وفوطه رابعة على حرف
السرير مكان ما سبتها امبارح بليل زي كل يوم يا قنصل مدينة
الوز.

انصت "حلو" في وجوم.. ورأسه ما زال مختفيًا داخل
المنشفة وهو يفكر سريعًا في رد مناسب.. ولم يجد ما يُجيبها به..
فقال في اقتضاب مبتلًا جُملاً من الاعتراض كانت في طريقها من
المخ إلى اللسان ولكنه وجدها ضعيفة الحجة.

- نهايته.. يا ريت الفطار بس عشان عاوز أنزل

جاء الرد بسرعة من المطبخ مع صوت طرقتين متتابعتين
في سرعة رهيبة تدل على نهاية حياة مخلوق ما سحقًا.

- عندك على الطريزة.. بيض مفقوش وساندوتش جبنة
براميلي بالجرجير والشاي باللبن.

- النيلة اللبن لو سمحتي

زفرت "سعادة" في يأس ونفاذ صبر.. ثم قالت مُستطردة:

- الشااي بالنيلة اللبن حسخنهولك لو برد عشان تخش بيه

الحمام.. حاجة تاني؟؟ لازم كل يوم كدة على الصبح!!

اجاب "حلو"

- ما هو أنا اللي بأعيد فيه.. بأزيد فيه بالشهور.. وانتي

مفيش فايده يا سعادة.. أنا زهقت

- لا يا حلو.. انت اللي بقيت عصبي وما بقتش عارفة اتكلم

معاك كلمتين على بعض.. خصوصًا.. خصوصًا..

صمتت "سعادة" وقد أطرقت برأسها.. وخفت صوتها

تدريجياً.. مما زاد حدة التوتر لدى "حلو" الذي قال مُحتدًا

- خصوصًا ايه يا سعادة؟؟؟ ها؟؟؟ اتكلمي؟؟ قولي بقي

أي كلام.. إعملي من الحبة قُبة.. وأشيل أنا الطين مش مهم.. ها

يا "سعادة" يا حبيبتي؟؟؟ خصوصًا ايه؟؟

ظهرت علامات التأثير الحقيقي على وجه "سعادة".. وبدأ

بريق دموعها في اللعان في طرفي مُقلتيها.. وهي تجيب في خفوت

- خصوصًا من ساعة موضوع الحمل

ظهرت علامات التوتر على وجه "حلو" الذي رد بسرعة

محاولة منه لأخفاء هذا التوتر.. وإنهاء الموقف بشكل مُضحك

- سعادة.. أنا قتلتك ميت مرة.. أنا مش حامل

صدرت ضحكة قصيرة من فم "سعادة" على الرغم منها بينما
دموعها قد بدأت تسيل على وجنتيها في صمت.. فأكمل "حلو"
في سرعة محاولاً الخروج من الموقف.

- أو تصدقي.. يمكن أكون حامل فعلاً والعصية دي نتيجة
هرمونات زائدة عندي في الشهور الأولى باين!!

خرجت ضحكة أخرى من "سعادة" ولكن هذه المرة أقوى
من سابقتها.. ونظرت إليه والدموع تنسال من عينيها بينما الحزن
ظاهرٌ تمامًا على ملامح وجهها.. ولكن "حلو" لم يملها الكثير من
الوقت.. فأكمل قائلاً:

- هو تفتكري حبي للبيض المسلوق أكثر من المفقوش ده
وحم؟؟ ولا ده عادي؟؟

ضحكت "سعادة" ضحكة عالية طويلة هذه المرة.. مما رسم
على شفتي "حلو" ابتسامة حاول اخفائها ببراعة لتبدو على
ملامحه علامات الجدية التي جعلت "سعادة" تزداد ضحكاً لدقيقة
أخرى صمت خلالها "حلو" تمامًا إلى ان قال لها في النهاية في
هدوء ممتزج بالحنان:

- إيه بقى على الصبح؟؟ في إيه بقى؟؟

نظرت له "سعادة" بابتسامة حزينة.. ثم قالت في خفوت

- عارفة انك كان نفسك في الخلفة.. وعارفة ان ده سبب كل
مشاكلنا دلوقتي.. بس.. بس أنا أسفة والله يا حلو.. ما كنتش
اعرف اني ما بخلفش

وبدأت الدموع تتراكم في عينيها مرة أخرى وكأنها ستخلق
سبيلًا.. فقاطعتها "حلو" قائلاً

- أولاً.. مين قال انك ما بتخلفيش؟؟ الزوفلومييط دكتور
اللي رحناهم وهبروا دم قلبنا.. قالوا ان معدل الخصوبة والتبويض
عندك ضعيف.. ما قالوش غير كدة.. وقالوا ان الحمل ممكن
يحصل في اي وقت.. ولو مستعجلين قوي يعني ممكن نعمل
عملية حقن مجهري طبيعي ونسبة نجاحها مرتفعة جداً.. ايه بقى
الفيلم الهندي الهابط اللي انتي عاملاه ده؟؟

- انت ناسي اننا حالتنا المادية ما تسمحش بالعملية دي
خالص يا حلو؟؟؟ الموضوع مش سهل زي ما انت بتحاول
تبسطه.. انت عارف.. وانا عارفة.. وكمية المنشطات اللي انا
باخذها عشان زيادة الخصوبة هي اللي مبعدة جسمي ومخلياني
عمالة ازيد في الوزن وانا تقريبا ما بأكلش

قاطعتها حلو بحركة مسرحية وهو يقفز من فوق كرسيه
ملوحًا بالمنشفة مرة أخرى

- والنبي انتي ما عارفة أي حاجة في أي حاجة.. أنا أصلاً
بحب الكلاييط يا بطة.. أنا حاخد الشاي بالنيلة اللبن وأخش
الحمام خليني الحق أنزل أروح الشغل

ابتسمت "سعادة" ابتسامة هادئة وكأنها تعلم تمامًا أنه يحاول
الهروب من الحديث كما يفعل في كل مرة.. وقالت له وكأنها
تسايره

- طب والبيض المفقوش؟؟

- الوحم يا سعادة.. مش قادر اشم ريحته خالص.. بطني
قلبت.. عندكيش جُعضيض أو حنة مخلل؟؟!!

ضحكت "سعادة" ضحكة عالية مجلجلة وهي تحاول بها ازالة
كل التوتر الذي صاحب الدقائق الماضية.. في الوقت الذي اتجه
فيه "حلو" الي الحمام وهو يحمل كوب الشاي باللبن ويحمل أيضًا
على وجهه علامات حزن مكبوت.



أسرع "حلو" الخُطى عبر الرواق الطويل إلى مكتبه داخل مبنى دار الكتب والوثائق القومية.. ذلك المبنى المُطل على كورنيش النيل برملة بولاق.. والذي يحوي بداخله ملايين من الوثائق والمخطوطات والبرديات النادرة التي يعود تاريخ العديد منها إلى أكثر من ستة آلاف سنة ويزيد

كانت عقارب الساعة في يده تُشير إلى الثامنة الا بضع دقائق صباحًا.. حين دلف إلى غرفته التي تضم عددًا من المكاتب الادارية الخاصة بزملائه في العمل الذين يشاركونه نفس الغرفة كان "حلو" أول من يصل إلى مكتبه كالمعتاد.. فقد كان من القلائل في هذا المكان الحكومي الذين يعشقون عملهم.. ويقدرونه تمام التقدير

جلس إلى مكتبه وهو يتذكر رفضه التام الإلتحاق بكلية أخرى غير كلية الأداب على الرغم من أن مجموع درجاته في الشهادة الثانوية كان يؤهله بسهولة ويُسر إلى الإلتحاق بكليات

أخرى يطلقون عليها كليات القمة يعتقد الجميع أنها أوفر حظًا في مجالات العمل مُستقبلاً.. وكان على رأس هؤلاء الناس والديه الذين عارضاه بشدة لاختياره لمثل تلك الكلية.. وظلا فترة طويلة يحاولان بشتى الطرق توضيح مساوئ مستقبلها وفرص العمل المحدودة التي تكاد تقترب من الإنعدام.. وفرصه الضئيلة في الحصول على عمل مشرف يساعده على تحمل مشاق الحياة وتكوين أسرة وفتح بيت.. ولكنه صمم على هذا الاختيار رغم هذه المعارضة الشديدة التي وصلت في بعض الأحيان إلى حد الزجر والنهر والوعيد.. وبالفعل.. إلتحق "حلو" بتلك الكلية.. واختار الإنتساب إلى قسم الوثائق والمكتبات تحديداً لولاه الشدائد بالكتب والمخطوطات والتاريخ الوثائقي.. مما جعله مُتفرداً بين اقرانه من الدارسين.. ومتفوقاً بشكل لافت خلال رحلته الدراسية.. التي توجها بالتخرج حاصلاً على تقدير إمتياز.. وهو الأمر الذي دفع إدارة الجامعة إلى مطالبة بأن يكمل دراسته الأكاديمية داخل جدران هذا الصرح التعليمي ليصبح معيداً.. ولكنه أبى

رفض بهدوء مكتفياً بهذا القدر الأكاديمي.. وقد دفعه ظمأ الشدائد ورغبته في خوض التجربة العملية إلى السعي وراء وظيفة تقربه من هوايته وعشقه الأوحده

وكان القدر قد استجاب لمجهوداته وسعيه الحثيثين طوال اعوام واعوام من الاجتهاد والمثابرة.. حين استطاع احد اساتذته تركيته بشدة في أروقة الوزارة ليتم وضع اسمه على رأس لائحة المقبولين للعمل الحكومي في دفعته

تذكر سنوات الوظيفة الأولى الدئوبة.. وتذكر كفاحه
لسنوات في العمل بقوة وتقليله لنفقاته لأقصى درجة ممكنة فقط
لكي يستطيع تدبير ايجار بيت مستقل وادخار مصاريف زواجه
من الانسنة التي تنتظره منذ سنوات.. "سعادة"

ابتسم حين تذكرها وهو يعلم انه الآن قد حقق جزءًا كبيرًا
من حلمه.. وها هو يعمل بالفعل وسط ما يعشق.. يُطالع يوميًا
عشرات وعشرات من الكتب والوثائق التاريخية.. ويعمل في قوة
وحب على توثيقها بكل وسائل التوثيق الحديثة.

كان لحبه الشديد لما يقوم به واقباله الدائم عليه برحابة صدر
اثرًا مميّزًا على ملاحظة رؤسائه لهذا الكد والاجتهاد في العمل..
فلاقى منهم جميعًا كل التشجيع.. وكان دائمًا محط اختياراتهم لأداء
بعض المهام التي تستحق الاهتمام وتستدعي خبرة ومهارة مما زاده
سعادة ورضى

قطع جبل افكاره دخول "عصام عبدالراضي" زميله في
العمل وهو يلهم بشدة إلى المكتب

كان عصام شابًا في نفس عمر "حلو" تقريبًا.. أصلع الرأس..
بدينًا بشكل واضح.. تحمل ملامحه قدرًا من الطيبة وتدل ملابسه
على انه من طبقة جيدة.. نظر إلى "حلو" وهو يشرع في الجلوس
قائلًا

- صباح الفل يا عم النشيط.. انت يا ابني بتبيع لبن وتطلع
على الشغل؟!!!

ابتسم "حلو" دون ان ينظر اليه وهو يرد قائلاً

- صباح العسل يا عم الكسول.. انت اللي بتخلص قدرة
القول وتيجي

نظر اليه "عصام" بعد ان ارتقى فوق مقعده في تعب وعلى
وجهه ارتسمت اندهاشة مصطنعة وهو يقول

- كسول؟؟ يا راجل دي الساعة ثمانية وعشرة بالضبط؟؟!!
اومال اللي حيوصل بعد كدة حتقول عليه ايه؟؟

- انت كسول.. اللي حيجي بعد كدة حيقى دبوب

- آآآآه دا انت رايق بقى على الصبح وجي تهرج اصلاً.. ده
موضوع تاني

- لا والله يا عصام.. ولا رايق ولا حاجة.. بالعكس.. انا
مصدع ومتضايق شوية

نظر له عصام هذه المرة في اندهاشة حقيقية.. ثم ما لبث ان
بدء في التراجع بجذعه مرتكزاً على مقعده ماداً يديه ضارباً الهواء
في حركاتٍ مسرحية تدل على أنه يعاني رعباً كبيراً وهو يقول

- مين ده؟؟ انت متضايق؟؟ حلو.. متضايق؟؟ انت مين
يا راجل انت؟؟؟ وعملت ايه في صاحبي؟؟؟ انطق.. انت اكيد
مخلوق فضائي.. فين صاحبي يا جدع انت.. خطفتوه في الفضاء
يا جناء؟؟!!! طيب كنتوا خدوني معاه والنبي فسحوني معاه

ابتسم "حلو" ابتسامة هادئة وهو ينظر إلى مكتبه دون ان
يرفع نظره إلى "عصام" وقال في خفوت دون ان تفارقه الابتسامة

- الدنيا ما بتديش كل حاجة يا عم عصام.. ما انت عارف

إعتدل "عصام" في مجلسه وتبدلت ملامح وجهه وبدت عليها علامات الاهتمام الحقيقي.. وهو يقول في هدوء متسائلاً

- موضوعك انت وسعادة برضه؟!!!

اومأ "حلو" برأسه ايجاباً في بطيء بدون أن ينطق والابتسامة الخافتة الحزينة لا تزال على شفثيه بينما لم يُشح نظره عن ذات النقطة التي تسمرت فوقها عينيه فوق مكتبه قبل دخول "عصام"، وكأنها بؤرة مغناطيسية تجذب نظراته لا يستطيع ان يجيد عنها.. مما دفع عصام إلى استكمال كلامه

- حلو.. انت وسعادة اخواتي.. انت يا عم شغال معايا بقالك فوق العشر سنين.. قبل ما تتجوزها اساساً.. ولازم تفهم ان الموضوع ده مش بإيدك ولا بإيدها.. دي حاجة بتاعة ربنا يا معلم.. وبعدين يا أخي انت قتلتي كتير قوي إن "الزوهروميت" دكتور الـ...

قاطعها "حلو" بسرعة قائلاً

- زوفلوميظ اسمها...

ابتسم "عصام" ابتسامة واسعة.. وهو يكمل

- الزوفلوميظ دكتور يا سيدي.. قالوا لكم ان مفيش حاجة عضوية أو مشكلة عويصة تمنع الحمل.. فا لازم يكون عندك أمل انت وهي أكثر من كدة شوية.. وتفضلوا تحاولوا بانتظام.. هو انا

اللي حقولك يا حلو؟؟ دا انت سحابة بتمطر علينا سيول أمل يا ابني.. انت مش محتاج اني أقولك ده.. انت عارف

أخذ "حلو" شهيقًا طويلًا بطيئًا.. ثم افرغه دفعة واحدة في زفرة قوية سريعة.. وكأنه يفرغ معها كل التوتر والحزن من داخل صدره.. ثم حرك يديه الكامنتين فوق المكتب وهو ينظر إلى "عصام" قائلاً في ابتسامة حزينة

- ربنا يسمع منك يا عصام.. ربنا يسمع منك

قطع حديثهما وصول اثنين من الزملاء إلى المكتب ليتبادلا الصباح مع "حلو" و"عصام" مع قليل من المداعبات وسريعًا امتلئت المكاتب الأربعة في الغرفة بموظفيها.. وبدأ يوم العمل.. كالاعتاد

ارتفع رنين الهاتف الأرضي في المنزل.. وهرولت "سعادة" من داخل المطبخ لتجيب النداء وهي تشرع في تخفيف يديها من أثر المياه والصابون في قطعة ملابس داخلية قديمة تخص "حلو".. بينما بللت المياه جزءًا لا بأس به من ملابسها.. إلتهقت ساعة الهاتف في سرعة وهي تجيب

- الو

جاءها عبر الجانب الآخر صوت والدتها التي تتصل بها
بشكل يومي في مثل هذا الوقت من كل يوم لتطمأن عليها
ويبدئان في الحديث حول أمور مكررة لا يملان أبداً من تكرارها

- الو.. أيوة يا حبيبة أمك صباح الفل

- صباح النور يا ماما

- البلياتشو نزل ولا لسة بيتنططلك على حبال الغسيل ؟

- ماما.. لو سمحتي قولتلك بلاش كدة.. أنا أصلاً مش

ناقصة وتعبانة

- تعبانة؟؟ من إيه يا قلب أمك؟؟ هو المخفي نكد عليكي؟؟

زعلك؟؟ عمل حاجة اللي ينقرص في قاولونه ده؟؟

- ماما.. مفيش حاجة حصلت.. وبلاش بقى الطريقة دي

وبلاش الكلام ده على حلو لاني فعلاً بتضايق وانت عارفة كدة
كويس

- عارفة.. عارفة وساكتة وشايلة في قلبي ومكتومة.. كله

بسبب منع الغم اللي انتي وابوكي بليتونا بيه.. أنا عارفة.. ابوكي

كان طول عمره يحب يتفرج على السيرك وما صدق شاف

البلياتشو ده وجوز هولك ووافقك على طول.. اااااه يا مربي..

أكيد منكد عليكي.. أكيد

- يا ماما لأ.. حلو مالوش دعوة.. بقولك مفيش حاجة.. انا

بس صاحبة تعبانة وشكلي داخل عليا دور برد.. شوية وحابقي

كويسة.. مفيش حاجة يا ماماااااا

وكالعادة.. لم تقتل هذه الاجابة فضول الأم اللوح التي كانت مصممة على ان تعاود السؤال حتى لو وصل بها الامر إلى اعدته ألف مرة.. انه حلو بكل تأكيد.. لا داعي للمراوغة.. هكذا تسير الأمور في الدنيا.. ولسوف تظل الأم تتسائل حتى تصل في النهاية إلى السبب الحقيقي الذي تجد عليه ابنتها هذه اللحظة.. وهو الأمر الذي تعلمه "سعادة" جيداً.. وتعلم أن امها بشكل أو بآخر لا تمنع الإصرار في السؤال حتى وإن قضت ما تبقى من حياتها على الجانب الآخر من الهاتف فعادت السؤال قائلة - بقي بدمتك ودينك ما نكدش عليكي انهاردة؟! ما غمش نفسك أكنك واكله رغيف بابا غنوج حمضان؟! ده ما فردش وشه من يوم ما اتجوزك غير مرتين ثلاثة اما الأهلي كسب بطولة أفريقيا.. ده محتاج فرع شجرة تتحط في ركن البيت ويطلع يزرق عليه زي البومة

تحول صوت "سعادة" بسرعة إلى غضب عارم متصاعد.. انفجر في اذن والدتها من خلال سماع الهاتف وهي تصرخ بكل قوتها ويرتج جسدها انفعالاً

- يا ماما قتللك مفييش.. مفييش.. مفييش حاجة.. حرام عليكم بقي ما تضغطوش عليا أكثر من كدة كفاية اللي انا فيه بقي.. لو في حاجة حقول يا ماما.. ولو مش عاوزة اقول مش حقووول يا ماما.. حرام عليكم بقي.. حرام

وتركت السماعة لتسقط من يدها وتستقر الى جانب قدمها
بينما دفنت وجهها في راحتها وأجهشت بكاء عميق قوي.. وفوق
فخذها امتد سلك سماعة الهاتف التي خرج من طرفها همهمة أمها
غير المفهومة والتي تدل على انها ما زالت مُصرّةً اصرارًا رهيبًا
على معرفة سبب حزن "سعادة"!

أشرف يوم العمل على الانتهاء.. ولم يتبق من الوقت سوى
دقائق على موعد انصراف الموظفين.. بينما انهمك "حلو" في
كتابة تقرير حول إحدى المخطوطات التي تسعى دار الكتب
إلى توثيقها إلكترونيًا بواسطة أجهزة المسح الرقمي الحديثة التي
لا يوجد مثيل لها في الشرق الأوسط كله.. والتي قامت مكتبة
الكونجرس الأمريكي بإهداءها إلى مصر لتوثيق هذا التراث الإنساني
والحضاري الذي يُعد الأكبر على مستوى العالم بلا منازع.. وذلك
حين دلف "عصام" إلى المكتب وهو يحمل بعض الملفات قائلًا
- حلو.. الاستاذ احمد عبد النبي عاوزك!!

ارتفعت رأس "حلو" وانعقد حاجباه في دهشة وهو يقول
- الاستاذ احمد عبد النبي؟! غريبة! عاوزني أنا؟! طيب
مكلمش الرئيسة ليه؟! يا ترى وكيل الوزارة شخصيًا عاوزني في
إيه؟! على اخر اليوم كدة.. استر ياللي بتستر يا رب.. هو يوم
مدوحس من أوله

أردف "عصام" في سرعة

- يا عم يعني حيكون عاجزك في ايه؟ قوم بسرعة روح شوف
الراجل عاجز ايه وانت تعرف

اغلق "حلو" تقريره دون أن يكمله.. ونهض من مكتبه وبدأ
في تعديل هندامه ياهتمام وهو يستقل المصعد متجهاً إلى الطابق
الأخير في المبنى حيث ينتظره الاستاذ "أحمد عبدالنبي"..
الذي استقبله بترحاب وبشاشة.. وعلى الرغم من حالة الرهبة
التي تملكته "حلو" في البداية لفارق السن والمستوى الإداري
الكبير.. إلا أن الرجل استطاع بخبراته وساحته الكبيرتين أن
يكسر هذا الحاجز ويتجاذب أطراف حديث ودي لطيف خارج
سياق العمل مع "حلو" الذي بدأ مع مرور الدقائق يشعر
بالإرتياح.. ولكن هذا الإرتياح لم يُخَفِ ابداً نظرات التساؤل
والفضول في عينيه حول ماهية استدعائه بهذه الطريقة وفي مثل
هذا الوقت.. وهي النظرات التي شعر بها الاستاذ "أحمد" بخبرة
سنواته الكبيرة.. وكانت سبباً في ابتسامته المستمرة التي حاول من
خلالها ادخال شعور الطمأنينة على قلب "حلو".. واتباعها بقوله

- ها بقى يا حلو.. أخبار الشغل ايه؟

ابتسم "حلو" ابتسامة واسعة وهو يرد في أدب وأهتمام

- الحمد لله يا فندم كل شيء ممتاز بفضل توجيهات سعادتك

- يعني مبسوط في الشغل هنا؟

- يا فندم مش بس مبسوط.. انا كمان مُستمتع وسعيد جدًا
والله

ابتسم الاستاذ "أحمد" ابتسامة أبوة.. وهو يقول

- عارف يا حلو.. انت بتفكرني بنفسى زمان وأنا فى سنك..
كنت بحب الشغلانة دى قوى.. المكان ده يا حلو.. مش عاوز
موظفين.. ده عاوز اصحاب مزاج عالي.. ناس بتحب الشغل ده..
مش بتأديه بس

ابتسم "حلو" وقد تفهم المغزى من كلمات الاستاذ "أحمد"
وعاود النظر بأهتمام وكأنه يطالبه بمزيد من الإفصاح عن سبب
استدعائه.. فأردف الأستاذ "أحمد" مُكملاً

- احنا عندنا موقف مهم محتاجين فيه حد زيك يا حلو..
حد زيك انت بالذات

بدت علامات الأهتمام على وجه "حلو" وهو يقول

- أأمر يا فندم.. تحت أمرك

ابتسم الاستاذ أحمد ابتسامة هادئة وهو يعاود الحديث

- الموقف اللى محتاجينك فيه.. موقف كان بيتطلب منا
نختار شخصية معينة.. شخصية محترمة ومؤمنة بشغلها.. وبتحبه..
وتخاف عليه.. زيك كدة يا حلو.

اطرق "حلو" والابتسامة لم تغادر شفثيه وهو يقول

- يا فندم كلام حضرتك شرف ليا فعلاً.. وانا في منتهى السعادة بالإشادة دي.

أكمل الاستاذ "أحمد" قائلاً

- دي مش مجرد إشادة يا حلو.. دي متابعة لسنوات طويلة.. وتقارير بتترفع لينا.. واختيارات دقيقة لناس معينة.. عندها خبرات محددة.. ودراسات أكاديمية مخصوصة.. واهتمام حقيقي وحب للتاريخ والوثائق.. وانت عندك كل ده من واقع تواجهك معنا هنا الفترة دي كلها.. انا عارف ده.. عشان كدة.. الوزير وافق على طلبي اللي وصيت عليك فيه بنفسي.. انك تكون مندوب دار الكتب في الموضوع ده

بدى الاهتمام مقترناً بالتردد على وجه "حلو" مخافة ان يكون قد تم انتدابه للعمل في اي شئ يبعده عن التعامل المباشر مع الوثائق والمخطوطات.. ولكن توتره لم يطل كثيراً حيث أكمل الاستاذ "أحمد"

- انت يا حلو حتكون مندوب دار الكتب في حصر المخطوطات الاثرية الجديدة اللي اكتشفناها في غرفة سرية تحت متحف دار الكتب القديم اللي في باب الخلق

بدت الاندهاشة على وجه "حلو" وهو يكرر السؤال بخذر

- غرفة سرية؟!!!

أكمل الاستاذ "أحمد" حديثه قائلاً

- أيوة.. غرفة اكتشفناها من حوالي خمس سنين.. والوزارة
تكتمت على الخبر في الوقت ده.. وحافظت على السر تمامًا لحد
ما نكون جاهزين دلوقتي نعمل الحصر للغرفة دي

صمت "حلو" للحظات قبل أن يسأل

- طيب مين حيكون في اللجنة يا فندم معانا في الحصر

اسرع الاستاذ "أحمد" في اجابته

- لا لا.. لجنة ايه؟.. اللجنة دي حا تتكون بعد الحصر..

الموضوع لسة في طي الكتمان.. احنا عاوزين نعمل حصر مبدئي
بعدد الكتب الأول وبعدين نشكل لجنة لرفع المحتويات ونقلها هنا
عشان التوثيق والدراسة وباقي الشغل بتاعنا.. المهم ان في البداية
عاوزين نعمل الحصر ده في هدوء بعيد عن الإعلام والكلام ده

نظر "حلو" إلى الاستاذ "أحمد" لوهلة.. ثم بادر بسؤاله

- طيب يا فندم معلش.. سؤال.. انا مين حيوصلني للغرفة

دي وحضرتك بتقول انها سرية ومحدش يعرف عنها حاجة

ابتسم الاستاذ "أحمد" لسؤال "حلو" الذي يدل على انه

في غاية التركيز وأن الموضوع بالفعل قد استرعى اهتمامه.. ثم قال

- الحج محمد العزازي

نظر له "حلو" نظرة تساؤل مما جعل الاستاذ "أحمد"

يكمل قائلاً

- الحج محمد العزازي موظف قديم جدا في متحف دار الكتب
آخر سنة ليه في الشغل السنة دي قبل المعاش.. حيكون في
انتظارك بكرة الصبح عشان يساعدك في الوصول للمكان وهو
الوحيد في المتحف اللي يعرف مكان الأوضة

صمت "حلو" وعلى وجهه علامات التفكير.. وما هي الا
لحظات قليلة حتى سأل في أدب

- بس يا فندم مش ممكن التعامل في الموضوع ده في فترة
النهار يخلي الموضوع عرضة إلى انه يخرج من نطاق السرية
المفروض؟!

نظر الاستاذ "احمد" إلى "حلو" نظرة اعجاب وهو يقول

- واضح اننا ما غلطناش ابدا اننا اخترناك انت بالذات للمهمة
دي.. كلامك بيوضح تمامًا انك مهتم بتفاصيل الموضوع.. مش مجرد
مهمة وظيفية حتأديها وترجع مكتبك.. طبعاً عندك حق.. عشان
كدة اتفارقنا مع الحج محمد العزازي انك تكون موجود معاه آخر
النهار.. وما تبتدوش شغل غير بعد مواعيد العمل الرسمية.. بعد
انصراف كل الموظفين اللي شغالين في المتحف

اوماً "حلو" برأسه متفهماً.. ثم قال متسائلاً

- طيب يا فندم.. الوقت المحدد للموضوع ده قد ايه؟

اجاب الاستاذ "احمد" في هدوء

- الموضوع ده مهم يا حلو.. خد وقتك.. اعتبر نفسك في
مأمورية مفتوحة لمدة اسبوع مبدئياً من أول بكرة.. ولو الموضوع

محتاج أكثر من كدة.. قولي وكمل المأمورية.. المهم.. تخرج من البيت على هناك.. وتخلص شغل قبل النهار ما يطلع.. وتروح بيتكم.. اعتقد أسبوع سيكون كفاية للحصر المبدئي وتقدر تعمل تقرير أولي وبعد كدة نشوف خطة حصر طويلة الأجل

تردد "حلو" قليلاً قبل أن يقول في خفوت

- ايوة يا فندم بس.. الريسة.. انا ما اخدتش موافقتها ولا قلت لها حاجة لسة وعاي...

قاطعها الاستاذ "أحمد" في حسم قائلاً

- انا كلمت الريسة خلاص يا حلو وفهمتها اني محتاجك في مأمورية خاصة بالوزارة ضروري من غير تفاصيل واخذت الإذن ابتمس "حلو" ابتسامته البشوشة قائلاً

- خلاص يا فندم.. اعتبر الموضوع منتهي ان شاء الله.. من بكرة حاروح اقابل الحج محمد العزازي وابدأ شغل.. وان شاء الله انهبي الموضوع ده في اسرع وقت ممكن

اقترب منه الاستاذ "أحمد" وربت على كتفه قائلاً

- عارف انك قدها يا حلو.. وعشان كدة اخترتك بالذات للموضوع ده.. بالتوفيق يا ابني.. خللى بالك.. الموضوع مش سهل أبداً

ابتسم "حلو" وصاح الاستاذ "أحمد" مع تبادل عبارات
الشكر والامتنان والوعد ببذل اقصى الجهد.. وخرج من مكتبه
ودقات قلبه تزداد سرعة من فرط الاثارة.. مع كل خطوة يخطوها

صعد "حلو" الدرج إلى شقته في همة ملحوظة.. مرتقيًا
درجات السلم بسرعة.. ثم دخل إلى منزله وهو يُطلق صفيحًا مميّزًا
يدل على انه رائق البال ويشعر بسعادة غامرة.. على غير عادته
في سنواته الأخيرة التي تبدل فيها حاله رويدًا رويدًا حتى بات
صامتًا اغلب الوقت.. هادئ الطباع.. غابت عنه روح الدعابة
التي كانت تجري في عروقه مجرى الدم منذ نعومة اظفاره

كان يعيش لحظات لم تتكرر منذ سنوات طويلة للغاية..
كان يشعر بالسعادة بالفعل.. وكان احساسه بأنه يعيش تلك
اللحظات.. يزيده سعادة في حد ذاته.. لذا ترك لنفسه الاستمتاع
كاملاً بتلك اللحظات

وما ان اغلق باب المنزل وراءه.. حتى إلتفت ليجد "سعادة"
تجلس في كرسيها تملأه بلا حراك.. وهي تنظر إليه نظرات
دهشة وارتياح كبيرتين.. حتى انه تلثم وهو يخاطبها قائلاً

- بسم الله الرحمن الرحيم.. سلامه عليكم.. مالك قاعدة كدة

يا روجي؟

حدقت فيه لوهلة قبل ان تجيب بنبرة غريبة

- روحك؟! مممم.. وعليكم.. السلام.. ورحمة.. الله.. وبركاته

ثم إلترمت الصمت وهي ترقبه كالصقر.. بينما وقف يتطلع اليها وهو لا يفهم سر جلوسها في مواجهة الباب وسر تلك النبرة المخيفة التي ردت بها.. فكر ان يسألها ثم شعر انه لا داع.. تردد.. ثم حسم أمره في النهاية مُتسائلاً

- خير يا سعادة يا حبيبيتي.. إيه الي مقعدك في وش الباب كدة؟؟ انتي قافشة فار جبلي من الي بتطارديهم في المطبخ.. وجري على الصالة وخايفة يفتح الباب ويُخرج؟؟ هاهاهاها.. هاها.. ها

قضم ضحكته التي خرجت على الرغم منه بلهاء لا تمت للموقف بصلة.. بينما ظلت ترمقه بنظرة ثابتة لم يبد عليها اطلاقاً أنها قد استمعت لحرف واحد مما قال.. مما جعله يتوتر قائلاً في محاولة لإزاحة هذه اللحظات

- يا ترى.. يااااا هل ترى.. عمللنا ايه من ايدك الحلوين دول النهاردة يا بطبوبة انتي يا كلبوطة يا كروناية حياتي؟؟؟ كروناية انت.. وربنا.. مش كدة؟؟؟ يا كرومباية.. كروووومبة.. هاهاهاهاها.. هاها.. ها.. ها

ضحكة بلهاء أخرى قضمها بعد ان شعر انه مصطنع للغاية.. وكأن "سعادة" قد تحولت إلى تمثال من الرخام وهي ترمقه بنظرة لا تزيغ.. وعلى وجهها علامات الاندهاش المخلوط بالانتهام.. مما

جعل "حلو" هذه المرة يُجزم بأن هناك كارثة ما قد حلت عليه.. ولكنه لا يعلمها بعد.. لقد كان في حالة مزاجية رائعة ولا يود ابداً ان يُعكر صفو هذا الاحساس اي شيء يُنقص عليه تلك اللحظة.. فقال في هدوء حذر

- هو.. ان شاء الله.. بإذن الله تعالى يعني.. خير ان شاء الله يا رب.. في حاجة يا سعادة يا حبيبتي؟؟

نظرت إليه سعادة وقتاً طويلاً بذات النظرة مرت عليه كالدهر.. دون ان تحرك ساكناً من مكانها.. ثم اجابت في هدوء - انا اللي محتاجة اجابة على السؤال ده يا حلو.. هو في حاجة؟؟؟

بدت على وجه "حلو" علامات عدم الفهم ليتسائل

- في حاجة ازاى يعني؟؟ مش فاهم السؤال.. فين السؤال؟

ازداد انعقاد حاجبي "سعادة" وهي تقول

- انت عارف بقالك كام سنة ما سمعتكش بتصفرف؟؟؟ عارف بقالك كام سنة بتخش ترمي السلام اكنك بترميه على ناس قاعدة على قهوة وانت معدي وتخش اوضتك تغير وتاكل وتنام من غير كلمتين على بعض؟؟؟ عارف بقالك كام سنة ما هزرتش معايا حتى قبل النوم!!!

توتر "حلو" للحظات وهو يُفكر في المأمورية التي ادخلت على قلبه الفرح.. وبالطبع حاول ان يُخفي تلك السعادة عن "سعادة".. فالأمر لا يزال سريعاً.. في طي الكتمان كما وعد الاستاذ

"أحمد".. وهو عادة لا يتحدث في تفاصيل عمله مع "سعادة" منذ زواجهما.. ولن يغير هذه العادة الآن.. بحث في رأسه عن اجابة مُقنعة.. ولكنه لم يجد.. مما دفعه إلى القول

- عادي يعني يا سعادة.. ده انا طول عمري يعني لذيذ وسكر ولطيف وقمر.. وبعدين ما انتي عارفاني من ايام الجامعة.. هو مين اللي كان بيضحكك على طول ومضحك امة لا اله الا الله.. ما هو أنا.. حصل ايه يعني؟!

نظرت له "سعادة" بتوجس.. وهي تُحدق فيه محاولة سبر اغواره.. ثم قالت

- شكك كدة انهارده.. مش مطمئني.. مش عاجبني

انعقد حاجبا "حلو" مع شعوره انها قد لاحظت تلك التغيرات التي صاحبت شعوره بالفرح لمهمته الجديدة.. وشعر بالحنق انها تملك دائماً تلك القدرة على معرفة ما يخفيه من مشاعر.. فأجاب في توتر

- ليه يعني؟؟؟ في بُقع مثلثة في وشي؟؟؟ حصبة؟؟؟ داخل من باب الشقة على ثلاث حتت مثلاً؟؟؟ ولا ساحب معايا كائن فضائي مريخي أخضر من غير دماغ؟؟؟؟ هو إيه اللي شكلي مش عاجبك ده!!؟

ولكن محاولاته لم يكتب لها النجاح.. وظهر ذلك جلياً على وجه "سعادة" التي عاودت سؤاله

- انت ناسي انك نازل النهاردة الصبح.. وبوزك.. الله كبير..
اللهم لا حسد.. اطول من بوز العربية الكاديلاك موديل سنة
سبعين؟؟ يا ترى ايه اللي مھوي على مراوحك قوي كدة
ومخليك راجع مبسوط وبتصفر لحن اغنية "وبقولك ايه تجيش
نعيش"؟

اجاب "حلو" في توتر وسرعة

- ده مش لحن "وبقولك ايه تجيش نعيش" على فكرة

- لا هو لحن "وبقولك ايه تجيش نعيش"

- والمصحف الشريف يا سعادة ما لحن "وبقولك ايه تجيش
نعيش"

- يا حلو.. انا سمعاه بوداني هو لحن "وبقولك ايه تجيش
نعيش"

بدأ "حلو" في الإنفعال مع إصرار "سعادة" فقال بصوت
بدأت نبراته في الإحتداد

- انتي بتسمعي اي كلام يا سعادة.. وأنا بقولك إنه مش
"وبقولك ايه تجيش.. نتزفت.. نعيش" خلاص بقى

- هو اللحن.. لما تعمل ايه.. انا متأكدة

توقف "حلو" وقد بدأت الدماء تتصاعد إلى رأسه.. وأشار
بكلتا يديه إلى اعلى.. وهو ينظر إليها في غضب مستنكر

- إيه ده؟؟؟ آه... هو انهارة تلاتاشر في الشهر؟؟؟
مش تقولي من الصبح.. انا كنت ناسي يا شيخة.. تصدقي
ظلمتك.. فهمت فهمت.. ده يوم النكد الشهري بتاعنا.. انتي
عاوزة تتخافني.. معلىش ما اخدتش بالي.. هيا بنا.. هيا بنا نبداً
فقرات نكد الفيل البتسواني المأسوف على شبابه

احمر وجه "سعادة" وهبت من كرسيها واقفة في حدة.. وهي
تقول في صوت بدأ في الارتفاع

- الفيل الي بتتريق عليه كان غزال قبل ما يدخل بيتك..
وطبعاً محاولتك انك تغير الموضوع مش حتنفع يا حلو
اردف "حلو" صائحاً

- قولت لك مش لحن زفت "وبقولك ايه تجيش نعيش"
اشارت له "سعادة" بالتوقف قائلة

- ما تستهبلش يا حلو.. انا مش بتكلم عن اللحن.. انا عاوز
اعرف السبب.. حالاً يا حلو.. حاليلاً
اجاب "حلو" في سرعة ونبرة تدل على العناد

- سبب؟؟ مفيش سبب.. ده العادي بتاعي.. انا طول
عمري كدة.. ظريف وخفيف ودي سُكر.. ايه؟؟ جري ايه؟؟؟
مستكترين عليا اكون مبسوط؟؟؟
ازداد غضب "سعادة" وهي تقاطعه قائلة

- يا حلو ما تخلينيش اتجنن يا حلو.. انت بقالك فوق
السنتين شبه دولاب خزين المطبخ اللي بعجل.. ما بنشوفش
سنانك غير وانت بتاكل او بتتاوب.. وما ضحككتش مرة واحدة
غير اما عرفت ان ماما عضها كلب وهي بتجيب الخضار من
السوق

اسرع "حلو" بالمقاطعة قائلاً

- انا كنت بضحك على الكلب على فكرة.. مش على
طنط.. وبعدين ماهي كمان جريت وراه بعد كدة لحد ما طلع
على الشارع العمومي وخطته عريية.. اهو اخذ جزاءه.. يستاهل
عشان يبطل رمرمة

اكملت "سعادة" بنبرة حادة وصوتها ما زال مرتفعاً

- ما لاكش دعوة بماما وقولي بقى من الاخر كدة.. مين
دي اللي مخلياك مبسوط قوي وسعيد وراجع عمال تصفر..
تصفر.. ولا اكنك حكم ماتش المانيا والبرازيل!!؟

ارتفع حاجبا "حلو" في اندهاش حقيقي.. وهو ينظر لها
مكرراً في استنكار

- مين اللي "مخلياني"؟؟؟ نععم؟؟؟ مش فاهم.. انتي
فاكراني مبسوط بسبب واحدة ست مثلاً؟؟؟

اشاحت "سعادة" بوجهها.. وهي تتحرك في غضب وتوتر
مرددةً في صوت مرعب

- اومال حيكون ايه مثلاً؟؟؟ شغلك الي شغاله بقالك
عشر سنين؟؟؟ ولا جالك خبر ان عمك فائن الي في البرازيل
عضها قرد بابوني وماتت وانت ورثت عنها كل املاكها من أروع
منتجات مزارع البُن البرازيلي بتاع شارع فيصل؟؟؟

قطاعها "حلو" في اقتضاب

- انا ماليش عمه اسمها فتن عايشة في البرازيل.. عمتي فتن في الكويت

صرخت "سعادة" بكل قوتها قائلة

- حلللللللوو.. ما تجنيش.. مين اللي مخلياك مبسوط
قوى كدة؟؟.. انطق ما تجنيش

اجاب "حلو" في سرعة ممتزجة بالغضب ونبرة صوته تتسم بالضجر

- ان شالله اطفحها لو كانت حاجة من الي في دماغك..
"مخلياني" ايه وزفت ايه؟؟ هو انا ناقص قرف اصلاً.. حد
يتهبب يفكر كدة تاني؟؟؟ دا انا بقالي خمس سنين من السرير
للحمام للشغل للسرير تاني.. ده أنا وحشتني بالكونة.. أنا مش
طايق نفسي في الأساس.. ارحميني بقى يا شيخة

اشاح "حلو" بوجهه.. ملوحًا بيديه في غضب وضجر بينما توقفت "سعادة" فجأة.. وعلى وجهها علامات صدمة بأئسة.. تحجرت الدموع في مُقلتيها وهي تنظر إليه للحظات.. قبل أن تقول في خفوت

- بقيت قرف خلاص دلوقتي يا حلو؟.. سعادة اللي
مستحيلة وشايلة المر ده كله.. السنين دي كلها.. ومستنيك..
ومستحملك.. بقت قرف؟!

صمت "حلو" تمامًا وهو يستند إلى ظهر احد المقاعد في
المنزل دون ان يلتفت اليها.. مما جعلها تُردف مكملة

- انما انت عندك حق.. خلاص.. سعادة اللي ضحت والي
استحملت ما بقتش سعادة بتاعة زمان.. لا الشكل ولا الطبع ولا
أي حاجة.. حتى مش عارفة تحيب لك الولد اللي نفسك فيه من
يوم ما اتجوزنا من خمس سنين

انتفض "حلو" ملتفتًا وكأنما ضربته صاعقة.. وهو يصيح في
غضب هادر قائلاً

- الخلفة الخلفة الخلفة.. إيبيبويه؟!!.. انتي كل شوية حتنكدي
علينا بسبب الخلفة؟؟ ما خلاص بقى.. ارحمني وارحمي نفسك..
حاولنا ومش عارفين بقالنا سنين.. خلينا بقى نعيش في الهم اللي
احنا فيه واحنا مستحلميين وساكتين.. ارحمينا بقى.. ارحميينا
وارحمي نفسك

وهنا فقط.. اطلقت "سعادة" لدموعها العنان في صمت..
اخيراً باح "حلو" عن مكنوناته بدون ان يشعر.. مما جعلها تقول
- فعلاً يا حلو.. هو هم وعاشين فيه.. فعلاً.. لا بنتكلم ولا
بنشوف بعض تقريباً الا صدف.. انت صاحي وانا نائمة.. وانا

نايمة وانت صاحي.. الي كان ممكن يجمعنا ويخلينا نسيتم.. مش مكتوب له انه يكون موجود

توقفت "سعادة" للحظة.. قبل ان تقول في نبرة اصرار وعناد

- انا ماشية يا حلو.. ماشية وساية البيت.. هاروح لأمي..
على الاقل حاكون متأكدة انها مش حتبقي عايشة معايا في هم
لم ينبس "حلو" بينت شفة.. وهو يستمع إليها.. ففي داخله
كان يوافقها في كثير مما قالت عن سبب تفاصيل حياتها التي
أصبحت مملة.. بالفعل مسألة الأولاد لها عامل كبير فيما وصلت
إليه حياتها من توتر وفتور.. ولكنه أيضا كان يحبها بالفعل.. ماذا
يفعل؟؟ ماذا يفعل؟؟

كرامته وكبرائه كرجل.. منعاه من أن ينطق في تلك اللحظة..
وكان سكوته ايذاً لها يبدأ التحرك الفعلي.

في خلال دقائق.. كانت "سعادة" قد انتهت من تحضير
حقيبة ملابس خفيفة لها.. وأبدلت ملابسها.. لتفتح باب المنزل..
وتصفقه ورائها في عنف.. بينما جلس "حلو" في طرف المنزل..
دون حراك.. وفي داخله تتصارع ألف رغبة بين اللحاق بها.. وبين
تركها بضعة أيام حتى ينتهي من مأموريته علّ الأمور تهدأ قليلاً..
وفي النهاية تملكته رغبة اليأس في اللحاق بها.. فجلس بلا حراك..
بينما تبتعد "سعادة" عن المنزل في طريقها إلى منزل والديها القريب
من منزلها

ودموعها تعكس ضوء شمس المغيب في صمت



استيقظ "حلو" منتفضًا على صوت المنبه الذي اشارت عقاربته إلى الحادية عشرة صباحًا.. مما جعله ينتفض مجددًا وهو يحدق فيه بذهول وعقله يصرخ بأنه قد تأخر عن موعد العمل.. واعتدل في مجلسه فوق الفراش مُسرعًا منتفضًا.. وهو ينادي بصوت منزعج

- حرام عليك يا سعادة الساعة حذاشر.. انتي بتستهيلي؟!
سايياني نايم كل ده؟!!

ولكن "سعادة" لم تجب هذه المرة.. مما جعله يسترجع ما حدث امس ليتذكر انها ليست في المنزل لأول مرة منذ زواجهما.. وانه من قام بضبط توقيت استيقاظه لأول مرة في تاريخ عمله على هذا التوقيت.. بعد ان قرر الاتجاه إلى مأموريته التي يجب ان تبدأ بعد موعد انصراف العاملين بمتحف دار الكتب

جلس "حلو" قليلاً وهو مُطرق الرأس.. تبدو على ملامحه علامات الحزن والإرهاق.. ولكن عقله الباطن ظل يرسل إليه مبررات لتجنب هذا الحزن على شاكلة

"يعني هو انت أول واحد مراته تسيب البيت شوية.. يا عم كبر مخك"

"معلش.. اهو اسبوع ترتاح فيه شوية من نكد الفيل البتسواني المأسوف على شبابه المُسَـقَـمَـر"

"مراقي مسافرة وحأعمل حفلة بس يا ريت ما تجيش على غفلة"

نفض "حلو" رأسه بعنف.. وكأنه يحاول ان يُسقط منها تلك الأفكار.. في الوقت الذي شعر قلبه بمرارة حقيقية حين تذكر "سعادة"

في الحقيقة لم يعتد ابداً عدم وجودها.. كانت له كل اركان حياته.. كانت تملأ عليه دنياه

قفز عقله الباطن مرة أخرى وهو يصور له "سعادة" قائلاً
"اه طبعاً.. لازم تملأ عليك ديتك واخرتك.. انت مش شايف بقت ادايه؟؟ انت وش فقر شكلك"

نهض "حلو" من طرف فراشه وهو يزفر في غضب وكأنه يحاول النيل من عقله الباطن الذي يُلقي اليه بتلك الأفكار الشريرة على الدوام.. حاله حال كل الازواج الرجال

اتجه إلى الحمام ليغتسل كما يفعل كل يوم.. امتدت يده
ليسحب المنشفة.. فوجدها جافة عكس كل يوم.. حيث دأبت
"سعادة" على تركها مبللة بالماء

شعر "حلو" بغصة في حلقة.. حزن يعتصر قلبه

غصة ما لبثت ان تصاعدت بسرعة.. ليتخذ في اعماقه
قرارًا نهائيًا منتصرًا على عقله الباطن.. قرارًا بأنه سوف يعود
مع "سعادة" للمنزل بعد انتهاء اعمال مأموريته الليلة.. الليلة
وليس غدًا.. سيذهب إليها.. سيُطِيب خاطرها ببعض الكلمات
الضاحكة كالعادة.. ستتدلل في البداية.. لها كل الحق.. ثم ستحوم
أحما حولها كطائر العنقاء الذي يبحث عن فريسة.. هكذا اخبره
عقله الباطن.. حقًا انها المرة الأولى التي يوافق عقله الباطن على
ما يلقي إليه من كلمات هذا الصباح.

سيحاول "حلو" ضبط النفس مع أمها رغم الاستفزازات كما
كانت قوات الشرطة تحاول مع المعارضين.. وفي النهاية.. لا بأس
إن انطلقت رصاصة طائشة استقرت في رأس أمها.. قضاء وقدر..
والاجابة جاهزة.. "إحنا ما عندناش خرطوش".. لكم سيكون
سعيدًا.. سوف يبذل كل شيء حتى يعود مع "سعادة" إلى منزلها
بدأ الشعور بالراحة يعود تدريجيًا إلى كيان "حلو" مع
شعوره بأنه افتقدها بالفعل.. لم تمر ساعات الا وكان قد افتقدها..
لا شك.. انه يحبها بالفعل

أكمل "حلو" ارتداء ملابسه على عجل.. وفي تمام الثانية عشر
والنصف ظهرًا.. خرج من منزله بعد أن وضع بعض اللقيات من

الجبن في فمه رأسًا من داخل الثلاجة.. مُتجهًا إلى متحف دار الكتب.. حيث ينتظره عمل شاق.. ومثير

لهث الاستاذ "محمد العزازي" وهو يسرع الخطى نحو بوابة الأمن التي تتواجد على مدخل متحف دار الكتب.. حيث ينتظره "حلو" حسبما ابلغه رجال الأمن

كان الأستاذ "محمد العزازي" رجلًا في بدايات العقد السادس من العمر.. طويل القامة رفيع الجسد.. تبدو على ملامحه علامات النشاط والكد والعمل.. حليق الذقن.. اشيب الرأس.. ورغم الوصف الذي يبدو في مجمله دالًا على المشيب الا ان الرجل كان شعلة نشاط وحيوية وتطل من نظرات عينيه علامات الذكاء والتركيز

استقبل "حلو" في ترحاب وبشاشة.. واقتاده إلى داخل المتحف حيث اشارت عقارب الساعة إلى الثانية والنصف عصرًا.. وهو يسأله

- قالولي ان اسم الكريم حلو.. وقعدت فترة طويلة عقبال ما إستوعبت.. يا ترى الاسم بالكامل ايه؟؟؟
- ضروري يعني يا استاذ محمد؟؟؟

ابتسم الاستاذ "محمد" وهو يتوقف في منتصف الطريق
ويلتفت إلى "حلو" متسائلاً

- هو ايه اللي ضروري يا ابني؟ هو سر لا سمح الله؟؟
انا جايا لي التعليمات ان الاستاذ حلو جي في مأمورية معينة..
ومحدث يعرف عنها حاجة.. حتى زي ما شفت.. لا سجلنا اسمك
في كشوف الأمن ولا حاجة.. انما انا ما اتعودتش غير اني اخد
احتياطي دائماً واعرف بتعامل مع مين.. المواضيع دي مهمة جداً
بالنسبة لي.. دي أثار بلد يا ابني مش لعبة

ابتسم "حلو" في تفهم وهو ينظر إلى الاستاذ محمد قائلاً
- الله ينور عليك يا استاذ محمد.. أنا بس اسمي عاملي
مشكلة من زمان ومش علوز اشغلك بيها
نظر اليه الاستاذ "محمد" وهو يقول

- مشكلة؟؟ في اسمك؟؟ خير يا ابني؟؟ هو اسمك
عيب؟؟!!

- لا.. اسمي جميل
- طيب طالما جميل.. ما تقول عليه
ابتسم "حلو" مداعباً وقد اعتاد مثل هذا الارتباك الذي
يسببه لكل من يسأل عن اسمه
- ما انا بقول جميل اهو

- ايوه يا ابني.. خلاص عرفت انه جميل.. ان شاء الله يطلع
جميل.. اسمك بقى حلو ايه؟؟؟

- جميل يا استاذ محمد

بدأ وجه الاستاذ "محمد" في التغير.. وظهرت عليه بوادر
الانزعاج.. مما دفع "حلو" إلى الاسراع في حل الموضوع قبل أن
يتفاقم مع الشيخ الكبير.. أسرع يستخرج البطاقة من محفظته..
ويناولها للاستاذ محمد الذي نظر إليها برهة.. ثم انفجر ضاحكاً
حتى كادت شرايينه تنفجر.. إستند إلى كتف "حلو" وهو ما
زال يقهقه.. إلى أن ختم ضحكاته التي استمرت قرابة دقيقتين بفقرة
من السعال المتواصل.. بينما "حلو" مُبتسماً وهو ينظر إلى سقف
المتحف غير مُبال وقد اعتاد على مثل هذه الأمور منذ ان وُلد
وأخيراً تماسك الاستاذ "محمد" وهو ينظر إلى "حلو" ويده
ما زالت تحتل نفس الموضوع على كتفه قائلاً

- تصدق بالله.. أنا مضحكتش كدة من زمان يا ابني.. ومن
أول دلوقتي.. انا مش "الاستاذ" محمد.. انا اسمي الحج عزازي زي
ما كل القريين يقولولي

ابتسم "حلو" وهو ينظر إلى الحج "عزازي" الذي ظهرت في
نظراته تطلعات أبوية بينما واصلا السير إلى حيث مكتب الحج
"عزازي".. حيث جلسا ليتبادلا أطراف الحديث حول تاريخ
المكان.. وتواجد الحج "عزازي" منذ أكثر من أربعين عامًا بمخدمة
هذا الصرح.. مروراً بكثير من المواقف والبطولات والذكريات
التي تملأ أرجاء المكان

كان "حلو" مستمتعًا جيدًا.. لم يشعر أي منهما بمرور الوقت
إلى ان نظر الحج "عزازي" في ساعته وقال

- يااه.. الساعة بقت خمسة ونص.. الوقت سرقنا.. كدة
مفيش حد في المتحف من الموظفين خالص.. مفيش غيرنا.. إنت
عارف المتحف مقبول للزوار والموظفين الى هنا كل شغلهم
اكاديمي للتوثيق مش أكثر

أوماً "حلو" برأسه مؤكداً قائلاً

- اه طبعاً عارف.. انا شخصياً ياما خلصت شغل هنا في
المتحف بس الغريبة يا حج عزازي اني ما شفتكش ولا مرة
ابتسم الحج عزازي وهو يجيب

- اصل انا يا ابني شغلي مالوش علاقة بالمعروضات اللي
بتشوفها وتتفرج عليها الزوار.. انا شغلي من أول اخر الطريقة
هنا.. وانت نازل

انقعد حاجبا "حلو" في عدم تفهم لمعني الكلمة الأخيرة في
حديث الرجل مما دفع الحج "عزازي" إلى الاستطرد

- اقصد يعني ان شغلي في الاجزاء بتاعة البدروم اللي فيه
المخزن الاثري للمخطوطات والبرديات الى تحت المتحف.

نظر اليه "حلو" وهو يقول

- تصدق يا حج عزازي.. أنا طول عمري نفسي أشوف المخازن
الأثرية دي.. حتى نفسي اتعرف على شكلها.. وسبحان الله.. على
الرغم من إن عندنا في المبنى الجديد عُرف ومخازن كثيرة قوي

لحفظ المخطوطات الأثرية.. إلا إنني طول عمري كان نفسي اشوف
المكان التاريخي ده نفسه بعيني

إبتسم الحج "عزازي" وهو ينظر إلى "حلو" قائلاً

- اللي يُصبر يُنول يا ابني.. وواضح إن ربنا راضي عنك لأن
في ناس بتقضي عمرها الوظيفي كله تتمنى تدخل المخازن دي وما
تعرفش.. ده في وزراء دخلوا الوزارة وما عرفوش يدخلوها

تبسم "حلو" مستمتعاً بالحديث.. في الوقت الذي نهض فيه
الحج "محمد" واقفاً ببطئ وعلى وجهه اثار ألم بسيط ناتج من
تبيس مفاصله من طول فترة جلوسهما.. وهو يقول

- بص بقى.. إحنا حنعمل كوبايتين شاي خمسينة.. نخلصهم..
وننزل على المخزن تشوف اللي وراك.. وحاعملك كوباية شاي
بقى.. إنما إيه.. أراهنك إن مراتك نفسها ما تعرفش تعمل زيها

قفزت صورة "سعادة" إلى رأس "حلو" فور انتهاء كلمات
الحج "محمد".. فتغيرت ملامح وجهه إلى الإقتصاب.. شعر بالحنين
إليها.. مع شعور آخر بالسعادة أنه سوف يتوجه لها فور انتهائه
من عمله الليلة.. ساعتين عمل فقط تفصله عن التوجه لها

ولكنه لم يعلم أو يتخيل للحظة.. أنه في طريقه إلى ان يواجه
ما لم يكن يتوقعه

ما لم يكن يتوقعه أبداً

جلست "سعادة" على الأريكة العتيقة في منزل والدتها..
تلك الأريكة التي تحمل ذكريات شبابها وخطبتها وزيارة "حلو"
لها قبل الزواج.. وعادت بعقلها وروحها إلى الماضي

- حلو.. يااااا حلوووو

- حبيبة قلب حلو.. زغازيع جنب حلو الي مخلياه على
طول بيضحك زي العبيط في كل حته.. أموت أنا بقي

ضحكت "سعادة" ضحكة جذلة ثم سألته

- ها؟ إيه رأيك بقي في أكل ماما؟

- يعمعم

- حلوما تهرجش!!

- أنا ما عجبنيش منه غير السلطة اللي انت عاملها.. أنا
كلته بس عشان اجاملك.. وعشان برضه أمك ما تخليش يومنا
أزرق منقط كحلي في كاروهات بُني

ضحكت "سعادة" مرة أخرى ثم قالت

- يا رب تسمعك وتيجي تتطلع عينيك.. أخص عليك يا
حلو.. ده حتى أكل ماما جميل

- جميل؟! زي ابويا كدة؟!

انفجرت "سعادة" ضاحكة وهي تمد يدها إلى "حلو" بكوب
الشاي الساخن ولم تتمالك نفسها بعد أن استمعت إلى جملته

الأخيرة فأنسكب الكوب بالكامل على قدميه فأطلق صرخة ألم
ووقف يتقافز كالفار الذي ضربته صاعقة وهو يقول

- احييييييييه.. امك غالية الشاي عشان تغليني.. عاوزة
تضيع مستقبلي.. اااااااه.. مش قاااادر.. شوفولي تلج.. تلللللج..
التسلخات حتهدلللللني

بينما ضحكات "سعادة" تتعالى حتى كادت تفقدها وعيها.

عادت "سعادة" مرة أخرى إلى واقعها وهي لا تزال تجلس
على ذات الأريكة.. وجدت ابتسامة الماضي لا تزال عالقة على
شفتيها.. فعادت لتتذكر موقفًا آخر على ذات الأريكة بعد كتب
الكتاب وقبل الزفاف

- بقولك إيه يا سعادة؟

- نعم يا حلو؟

- ما تجيبي بوسة

- احمر وجه "سعادة" خجلاً وهي تتراجع في الأريكة قائلةً

- حلو.. ما تستهبلش

- شوفي.. أنا مش حمشي من هنا انهاردة غير لما أخذ
بوسة.. أنا معايا ورقة تثبت أحقيتي في الموضوع ده

- يا نهاري.. حلو!! ما تستهبلش.. كلها أسبوعين على
الفرح.. ماما لو سمعتني بضحك كدة حتيجي تخرب بيتي

قفز "حلو" من كرسيه ليحتل موضعًا قريبًا من "سعادة"
على الأريكة قائلاً

- حتجبي بوسة بالذوق؟ ولا نلجأ للعنف؟ أمك في المطبخ
بتغسل المواعين.. دي فرصتنا الأخيرة.. هاتي بوسة قبل ما تهجم
علينا بسلكة المواعين

ضحكت "سعادة" وهي تحاول كتمان ضحكتها بيدها ويدها
الأخرى تدفع "حلو" للابتعاد عنها وهو لا يزال يحاول مُصرًا على
ما قال وعلت ضحكتها أكثر وأكثر بينما ابتسامته تزداد اتساعًا
على ضحكتها التي تسعد قلبه

أخذت ذكريات "سعادة" تمر الواحدة تلو الأخرى.. إلى أن
قطعها شعورها بدفء الدموع المنسالة على وجنتيها.. دموع تسيل
في صمت.. مما زادها حزنًا

تذكرت "حلو" وتألمت بشدة.. كيف له أن يتركها ترحل
وتترك المنزل.. كيف يمر يوم كامل دون أن يعيرها أي اهتمام

إلى هذه الدرجة إنتهى الحب من حياتهما؟؟!

إلى هذه الدرجة فترت مشاعره تجاهها؟؟؟

لماذا؟؟؟

هل أهملت في نفسها إلى أن وصل إلى هذه الحالة؟؟؟!

أم أنه بكل تأكيد موضوع الخلفة.. بالتأكيد هو ذلك الموضوع

ماذا تفعل؟؟؟ ماذا تملك في هذا الموضوع؟؟؟

لا شيء....

يبدو أنها قد كتب عليها أن تعيش في ألم وحزن على غير
ما طمحت وتخيلت في بدايات زواجهما بحبيها "حلو" .. يبدو أن
القدر دائماً يحمل ما لا تشتهي السفن للمحبين

يبدو أن حكايتها سوف تكون تلك الحكاية المكررة للسواد
الأعظم من السيدات المتزوجات واللاقي انتهى بهن المطاف إلى
ذات الجلسة.. وذات الدموع المنهمرة

قطع دموعها وحبل افكارها المتواصل دخول والدتها إلى
غرفة المعيشة حيث تجلس هي وحيدة
وفي خطوات متثاقلة.. اقتربت الأم قائلة

- انتي لسة بتعيطي؟؟ جتك خيبة!! إيش حال ان ما كان
اراجوز وهايف.. يا ما قتللك.. دا مش حينفعك وانتي راكبة
راسك.. العرسان كانت بتتحدف تحت رجلكي وانتي ماسكة
في زعزوعة القصب دي.. وكم ان قاعدة بتعيطي؟؟! يا خبيتك
القوية.. محدش جابلنا الحنية دي غيرك انتي وابوكي.. جاتكم وكسة
انتم الأثنين

مسحت "سعادة" دموعها براحتها من فوق وجنتيها وقالت
لوالدتها في لهجة حادة

- ماما.. انا مش ناقصة.. ارحمني وسيبيني لوحدي.. هما
يومين ثلاثة بالكثير وحارجع البيت

كانت أمها في طريقها للجلوس على احد الكراسي ولكن
كلمات "سعادة" جعلتها تقفز كالمسوسة صارخة

- يوميين وترجعي؟؟؟ ترجعي من نفسك؟؟؟ يا ختاناااااااااااي.. أصوّت والمّ عليا الناس؟؟؟ إنتي عاوزة ترخصي نفسك وترخصينا أكثر من كدة؟؟؟ مش حتتحركي من هنا غير أما اشوفه.. أشوفه وأفشفه بإيديا دول.. فُرع لوز ده.. البلياااشووووووو.. وأطبق في زمارة رقابته وأطلع أحباله الصوتيه في إيدى

وبدت على وجه أمها وعينيها علامات شيطانية تنذر بأنها في طور التحول لشيطان مريد.. إلا أن "سعادة" قاطعتها في اثناء استمتاعها بتخيلات تمزيق "حلو" إربًا قائلة

- ماما!!!! أنا قتلتك.. ما تتدخليش في حياتي مع حلو.. إحنا بنحل مشاكلنا سوا من زمان.. الحكاية كلها زي ما قتلتك مليون مرة.. أنا اعصابي تعبانة ومحتاجة أغير جو عشان قاعدة في البيت بقالي كثير.. هما يومين.. حستحمليني ولا اروح عند خالتي؟؟!

أشاحت أمها يدها في غضب وهي تتوجه نحو الكرسي وتجلس في بُطء العجائز ولسانها يهمهم بكلمات غير مفهومة تحمل في نبرتها سبابًا ووعيدًا للمخلوق الأكثر استفزازًا في حياتها الآن..

"حلو"

شعرت "سعادة" بالارتياح جزئياً مع سكون أمها.. إلا أنها في
 قرارة نفسها كانت تعلم أن أمها لن تجعل الأمر يمر مرور الكرام..
 وأنها ستنتهز أول فرصة لتحيل الأمر إلى بؤرة من بؤر الجحيم

لم تأخذ تلك الأفكار من "سعادة" سوى لحظات قليلة.. ثم
ما لبثت أن عاودت مرة أخرى الدخول في عالم الخيال والذكريات
الذكريات التي حملت لها في الماضي كل شعور "حلو"
وكل لحظات "سعادة"



انتهى "حلو" والحج "عزازي" من ارتشاف آخر رشفة من كوب الشاي الساخن الذي أعده الحج "عزازي" بنفسه.. تبادلا اثناء الإنتهاء منه الحديث حول الوثائق والمخطوطات والبرديات الأثرية التي عملا خلال سنوات حياتهما الوظيفية على توثيقها وحفظها رغم اختلاف السن وسنوات العمل

شرح "حلو" للحج "عزازي" ما وصلت إليه التكنولوجيا الحديثة في هذا المجال.. وكيف ساعدت على الارتقاء والإهتمام بهذا الكم الذي يفوق الملايين من الوثائق المختلفة الحجم والحامة والزمن

بينما حدثه الحج "عزازي" عن مدى تأثره واهتمامه بالوثائق بشكل شخصي وشعوره وهي بين يديه حاملاً أثراً تاريخياً عظيماً.. يُشعره بمدى وجوب حفاظه عليها من أجل نقل التاريخ إلى المستقبل.. تاريخ مصر والعالم أجمع

تحركاً سوياً خروجاً من مكتب الحج "عزازي" .. متجهين إلى
حيث سيبدأ "حلو" عمله.. خلال أروقة المتحف.. إلى أن وصلا
إلى المدخل المؤدي إلى المخازن القابعة أسفل المتحف

ذلك المدخل المغلق ببابٍ حديدي.. يحمل في جانبه رتاجاً
إليكترونياً رقمياً حديثاً.. وهو الأمر الذي شعر معه "حلو" ببعض
الحنق.. حيث شعر أنه من غير اللائق أن يتم التعامل مع ذلك
المكان الأثري بتلك التكنولوجيا التي لا تناسب طبيعة المكان
وعبقه التاريخي.. إلا أنه عاد على الفور ليقنع نفسه أن ما تحمله
الغرف أسفل المتحف من كنوز تاريخية يجب الحفاظ عليها بأي
ثمن.. لا يهم إلا حمايتها والحفاظ عليها

نقرت أصابع الحج "عزازي" الأرقام في تتابع بطيء.. فأصدر
الرتاج صوت صفير قصير.. وتغيرت لون أضوائه من الأحمر إلى
الأخضر كمؤشر على صحة أرقام التوليفة الإليكترونية.. ولم يلبث
الحج "عزازي" أن سحب مقبض الباب بهدوء
كان الباب.. يحمل وراءه ظلاماً ممتداً.. ودرجات تهبط إلى
اللامكان

أطل "حلو" برأسه في فضول محاولاً أن يمد بصره على
يستطيع تحديد أي شيء في الأسفل ولكنه فشل
إبتسم الحج "عزازي" وهو ينظر إلى إنفعالات "حلو" قائلاً

- أصبر على رزقك.. ما تستعجلش.. حنزل أهو بس
استنى عشان أجيب الكشف معايا لأن مفيش كهربا تحت في
المخزن

تراجع "حلو" مندهشًا وهو ينظر إلى الحج "عزاي" في
استنكار متسائلًا

- مفيش كهربا؟؟؟ ازاي؟؟؟ انا عارف ان في كهربا في
مخازن المتحف السفلية من زمان!!

إبتسم الحج "عزاي" وهو ينظر إلى "حلو".. محاولاً إضافة
أكبر قدر ممكن من التشويق إلى كلماته وهو يقول
- أيوة طبعا في كهربا في المخازن.. بس...

انتظر "حلو" ثواني مرت كالساعات وهو يتطلع إلى الحج
"عزاي" الذي تبدو على ملامحه علامات الاستفزاز.. قبل أن
يقول بلهجة حادة...

- بس ايه يا حج عزاي.. أحنا حنلعب من سيربح
المليون؟؟؟ بس ايه يا حج قرداحي الله يكرمك؟؟؟
ضحك الحج "عزاي" في جذل وهو يستند إلى كتف
"حلو".. ثم قال له

- في كهربا طبعا.. بس.. مش في الدور اللي إحنا حنزله

ضغط الحج "عزاي" على كلماته في الجزء الأخير دليل على
الإشارة إلى شيء ما.. وهو الأمر الذي فطن إليه "حلو" في لحظة
واحدة متسائلًا في ذهول

- ايه ده ؟؟؟ الدور اللي حنزله ؟؟؟ هو في دور تاني غير
دور البدروم اللي فيه الكتب ؟؟؟

لم ينطق الحج "عزازي" وهو ينظر إلى "حلو" نظرة تشويق
وإثارة كبيرتين.. كانت عيناه تلمعان سعادة لرؤيته تلك الانفعالات
على وجه "حلو" الذي فغر فاه في ذهول.. وزاغت عيناه في
محجرهما.. وتسارعت أنفاسه من هول الإثارة.. فأسرع في السؤال
- يا حج عزازي.. في كام واحد يعرفوا أن في دور تاني تحت
البدروم ؟؟

تطلع إليه الحج "عزازي" بذات النظرة الجذلة.. وهو يشير
إليه بأصابع كفه قائلاً

- أقل من صوابع الإيد الواحدة.. وانت بقيت منهم

تسارعت ضربات قلب "حلو" في عنف.. وتدفق الأدرينالين
إلى عروقه غزيراً.. فشعر بنشاط مفاجئ.. دفعه إلى القول في
سرعة

- طب ياللا يا حج عزازي.. الله يكرمك.. ياللا بينا.. عاوز
أنزل.. مش قادر.. مش قادر أستنى

ضحك الحج "عزازي" وسعل قليلاً على سبيل الروتين.. ثم
نظر إلى حلو قائلاً في نشاط مرح

- ياللا بينا يا عم.. خطي برجلك اليمين وسمي الله

إبتسم "حلو" في فرحة طفل صغير.. وتحرك خلف الحج
"عزازي" متخذاً الدرج نزولاً وهو يقول

- وأدي رجلنا اليمين.. وبسم الله
وبدأت أولى ليالي المأمورية المثيرة

جلست "سعادة" في غرفتها القديمة التي شبت فيها والوجوم
يحيط بملاحمها حيث اظلمت ارجاء الغرفة إلا من ضوء الاباجورة
الملاصقة لفراشها.. في الوقت الذي دخل إلى غرفتها والدها ذلك
الرجل الكهل الأشيب.. بعد ان طرق الباب في هدوء واقترب
من سريرها الذي جلست فوقه مستندة إلى ظهره وهي تضم
ركتبها إليها وتحتضنها وإلى جوارها فوق مكتبها القديم ذلك المنبه
القديم الذي أشارت عقاربته إلى الساعة مساءً.. حتى جلس إلى
جوارها وابتسم قائلاً

- حبيبة بابا حفضل قاعدة لوحدها هنا كثير؟.. مش
حتيجي تقعدي معانا شوية برة بقى؟؟

- لا يا بابا.. معلش.. كنت محتاجة اقعد لوحدي شوية

- اممم.. بهيري من أمك طبعًا ولسانها الى عامل زي
المبرد.. عشان تعرفي بس اني ضحيت بنفسي من زمان وقاعد
معاه لوحدي بعد ما اتجوزتي انت.. تعالي اقعدي معانا عشان
خلاص وداني حتشف و تقع زي ورق الشجر من زنها

ابتسمت "سعادة" لمداعبة أيها.. ولكنها لم تنطق مما جعله
يكمل كلماته

- يا بنتي.. دي أول مرة تباتي برة البيت من غير جوزك..
حلو انسان طيب ومحترم.. واكيد لو في اي مشاكل بينكم لازم
تتحل بالمناقشة والكلام

- يا بابا احنا لا بنتناقش ولا بنتكلم.. احنا عايشين زي اللي
مش عايشين.. كل واحد عايش مع نفسه تحت سقف بيت
واحد

- غلط يا سعادة.. الست الشاطرة هي اللي تتكلم مع جوزها
وتعرف تعرض المشكلة.. والراجل الشاطر هو اللي يسمع ويطلع
دائماً من كل المشاكل كسبان مراته.. مش خسران مراته
ترقرقت الدموع في عيني "سعادة".. وقالت

- انا حاسة يا بابا انه خلاص ما بقاش يجبني.. حاسة انه
كل يوم يبعد عني فيه أكثر من اللي قبله ومش عارفة أعمل ايه
ابتسم الأب ابتسامة حانية.. وهو يقول

- يا بنتي.. كل البيوت بيعدي عليها الأوقات دي.. كل علاقة
بيجي وقت ويمر بيها شعور رهيب بالفتور.. وعدم الإهتمام..
ودائماً العلاج ما بيكونش بالسكوت.. انما دائماً بالكلام والمناقشة
والتواصل.. دا انتي متعلمة وعارفة.. مش كدة؟

- مش قادرة يا بابا.. حاسة اني عاملة عملة.. ومش قادرة
اتكلم.. من ساعة موضوع الخلفة ده وأنا ما بنطقش.. ومش قادرة
انطق

- لا إله إلا الله !! ليه يا بنتي كدة؟؟؟ هو انتي عاقر لا قدر
الله؟؟ ده كل الدكاترة قالوا لكم ان مفيش أي موانع للحمل وإن
ده موضوع بتاع ربنا فقط.. ليه حتحملوا روحكم أكثر مما تحتملوا
يا بنتي!!

سالت الدموع دافئة على وجنتيها وهي تقول
- أعمل إيه يا بابا.. قولي.. انصحي.. أعمل إيه؟
رَبَّتْ الأب على كتفها بحنان.. وهو يتبسم قائلاً
- انتي بتحيي حلو؟؟

اومأت "سعادة" برأسها إيجاباً.. فأكمل الأب
- يبقى بكرة الصبح تاخدي شنطتك.. وترجعي بيتك يا
سعادة.. وأنا حتصدّر لأمك بنفسي.. يعني هي موتة و الا أكثر؟!
نظرت له "سعادة" نظرة تردد وكبرياء دون أن تنطق.. مما
جعله يُعقِب

- يا بنتي العند ما يجيش إلا العند.. وأنا لو مش عارف
حلو كويس قوي أكنه إبنِي ومريه.. مكنتش قولتلك رَوْحي..
رَوْحي يا سعادة.. واتكلموا يا بنتي بهدوء.. واتناقشوا.. فضفضوا
لبعض.. واتفقوا.. وغيروا حياتكم.. الموضوع زي المذاكرة في المرحلة
دي.. ومحتاج تركيز.. عشان تعدوا في الامتحان وتنجحوا.

نظرت إليه "سعادة" في شرود وهي تحاول أن تستوعب كلماته.. وتحاول أن تقنع نفسها بصحتها أمام كبرياتها كإمرأة.. وتفهم الأب ما يجول في خاطرها من صراع.. فضعها إليه وأسند رأسها على كتفه مرتبًا على ظهرها في حنان وهو يقول

- بكرة تفتكري الأيام دي يا بنتي.. وتفتكري إنك اتصرفتي صح.. وانتي قاعدة وسط ولادك وعاملين دوشة.. وجنبك جوزك حلو اللي يبجبك وبتحبيه.. ولا نسيتي يا سعادة؟؟؟ نسيتي كنتي بتقوليلي عليه إيه أيام الجامعة يا بنتي!!

صمت "سعادة" وهي تستعيد ذكرياتها مع "حلو".. وذكريات حديثها مع أبيها عنه.. وسعادته بها وبأنها قد أصبحت فتاة راشدة تشعر بالحب.. وتصارع أباه.. تذكرت نصائحه لها.. وما ترتب عليها من قربها من "حلو".. تذكرت كل هذا وهي تتخذ في قرارة نفسها قرارًا هامًا

سوف تعود إلى المنزل في الصباح الباكر

كان الدرج مظلمًا

خاصة مع دخول الوقت إلى ما بعد وقت العشاء...

ولكن المصباح الذي حمّله الحج "عزازي" أمّن رؤية مناسبة
لكليهما أثناء النزول..

حتى وصلا إلى الطابق السفلي "البدروم"

جال "حلو" ببصره في ذلك المكان بهدوء.. وظل يتطلع إلى
تلك الأحجار المكونة لجدران المبنى العتيق.. تلك الأحجار الكبيرة
الحجم التي مر عليها من الزمن ما يتعدى المائة عام ويزيد..

امتدت يد الحج "عزازي" لتضيئ قابس الكهرباء.. فأضيئت
بعض المصابيح خافتة الإضاءة المعلقة في جوانب السقف.. وبدأت
ملامح المكان تتضح شيئاً فشيئاً.. كان البهو الذي انتهى إليه
الدرج متسعاً.. ليس له سوى ذلك المخرج الذي دلفا كل منهما
من خلاله بالإضافة إلى ذلك الممر الطويل المظلم المقابل للدرج..
والذي يحتوي على غرفٍ متقابلةٍ على جانبيه.. بالكاد تتضح
ملامح نهايته من خفوت الإضاءة

تقدم الحج "عزازي" إلى الممر.. يلاحقه "حلو" في لهفة
والإثارة قد بلغت منه مبلغها فهو يسير الآن في قلب الممر الذي
طالما تحدث عنه الكثيرون في أروقة الإدارة.. وتفاخر القليلون
جداً بأنهم ممن هبطوا إليه مرة في حياتهم

عبرا سوياً خلال الممر الطويل والأبواب الخشبية العتيقة على
اليمين واليسار.. أبواب مغلقة مصمتة مقتضبة الشكل واللون..
وكأنها تنظر إليهم تحذره من الإقتراب منها.. تحمي وتحمل ورائها
من المخطوطات والكنوز ما يجعل مصر ترتفع على قمة العالم في

اقتناء الآثار بلا منازع طوال التاريخ القديم والحديث.. كان كل منهما يعلم هذا جيداً

حتى وصلا إلى إحدى الغرف.. وتوقف الحج "عزازي" أمامهما.. وبدوره توقف "حلو".. ونظر الحج "عزازي" إلى "حلو" في محاول منه لإضفاء مزيد من التشويق وهو يستم ويقول - ها؟؟؟ جاهز؟؟

ابتسم "حلو" محاولاً التماسك وهو يجاهد لإضفاء القدر الأكبر من الهدوء على كلماته وهو يقول في سخرية - جاهز طبعاً يا حج "عزازي".. أحنا حنطع هوا خلاص؟؟ جاهز إن شاء الله.. ذيع

ولكن نبرة كلماته خرجت ممزوجة رغماً عنه اخفت طابع السخرية في كلماته.. مما جعل الحج "عزازي" يبتسم ابتسامة أبوة وهو يفتح مزلاج الباب ويدفعه إلى الداخل.. ويخطو بداخلها ومن ورائه "حلو"

كانت الغرفة خالية تماماً.. مما أثار دهشة "حلو".. لا تحتوي على أي شيء.. لا وجود لأي وثيقة أو مخطوطة أو بردية واحدة.. لم تكن سوى غرفة كبيرة خاوية ليس أكثر.. لم يدم اندهاش "حلو" على حال الغرفة كثيراً حيث طغى عليه اندهاشة أكبر وأكثر تأثيراً وصلت إلى حد الذهول التام حين توجه الحج "عزازي" إلى أحد الجدران الحجرية.. وتوقف أمامها قليلاً يتأملها.. ثم لم يلبث أن امتدت يده وقام بدفع أحد الأحجار المكونة لذلك الجدار

بيده في قوة إلى الداخل.. فتحرّكت استجابة للدفع مُصدرةً صوتًا مكتومًا.. بدأ معها الحائط ذاته في الانقسام والتباعد إلى جانبي الغرفة ببطء شديد مُحدثًا صريرًا مُدويًا.. لم يكن أكثر دويًا من صوت شهيق "حلو" والتأثر الذي ظهر على ملامحه في تلك اللحظة.. إلى أن توقف جانبي الحائط عن التباعد.. ليكشف عن درج آخر لا تظهر نهايته من شدة الظلام.. درجٌ يقود إلى حيث لا يعلم عن هذا المكان سوى القليلون في مصر والعالم بأجمعه...

لحظات من السكون مرت على الغرفة التي انشق جدارها منذ لحظات

صمتٌ تامٌ خيم على المكان وسط ذهول "حلو" الذي فغر فاه وكادت عيناه تقفز من محجريهما وهو يُحدق في الفراغ الذي خلفه الجدار وتظهر على بداياته درجات هابطة.. لم يقطع الصمت إلا التفاتة الحج "عزازي" ليتطلع إلى وجه "حلو" ويراقب تعبيرات الذهول على قسماته.. ويتسم قائلًا

- إيه رأيك؟!

انتفض "حلو" وهو ينظر إلى الحج "عزازي" الذي أخرجه بسؤاله من حالة السبات العميق التي كان عليها.. وأجاب في سرعة

- انت بتسألني يا حج أكنك بتاخذ رأيي في طعم الملوخية اللي
عاملها مراتك!!!

إنفجر الحج "عزازي" ضاحكاً لشواني أعقبها كالعادة ببعض
السعال.. ثم قال

- الله يجازي شيطانك.. أنا قصدي إيه رأيك في اللي شفته
لحد دلوقتي يا حلو

هز "حلو" رأسه مرة أخرى قائلاً

- برضو يا حج عزازي السؤال ده يتسأل لواحد بيتابع طريقة
عمل شاورما سوري من غير استخدام لحمه على قناة فتايت!!!
رأيي في ايه؟؟ أنا مش مستوعب إيه ده.. ولا مصدق.. أنا أكيد
بحلم.. أكيد ده حلم.. دي حاجة زي الأفلام الأجنبي
أبتسم الحج "عزازي".. وهو يشير إلى "حلو" بالاقتراب
قائلاً

- أفلام أجنبي مين يا عم وبتاع مين؟! تعالى ننزل عشان
تشوف اللي حتى مستحيل يتخيلوه في الأفلام الأجنبي.. تعالى
يالا بينا

تقدم "حلو" في بطئ من الجدار المنقسم في خطوات حذرة..
بينما سبقه الحج "عزازي" إلى الدرج الهابط نزولاً.. وعلى الفور
لحق به "حلو"

كان الدرج مختلفاً هذه المرة.. كان حجم الدرج كبيراً.. وكانت
النقوش والحروف العربية العثمانية تزين جدران الدرج.. كان يراها

بالكاد نتيجة الضوء الصادر من المصباح الذي يحمله الحج
"عزازي"

كانت المسافة هذه المرة أطول من سابقتها في الدرج المؤدي
إلى الطابق السفلي.. كانت تبدو هذه المسافة أكثر من ضعف
سابقتها.. حتى أن "حلو" بدأ يشعر بالقلق.. ولكن قلقه لم يدم
طويلاً.. حيث انتهت بهم الدرجات إلى نهاية الطريق
باب غرفة خشبي كبير

يحمل نقوشًا وكتابات متداخلة.. حاول "حلو" ان ينظر إليها
عبر الضوء المنبعث من المصباح اليدوي.. وتسمر ذهبولاً

كانت النقوش والكتابات متداخلة بحرفية وفن عظيمين.. ولم
تكن تلك هي سبب دهشة "حلو" فقط.. بل كان سبب دهشته
الاساسي يكمن في أن تلك الكتابات كانت خليطاً ممتزجاً من
حروف عربية ولاتينية ونقوش فرعونية.. كانت لوحةً متكاملة
الإبداع من عدد كبير من الحروف التاريخية.. كانت تبدو وكأنها
لغة ما.. جمل معينة.. كلمات منسقة منتقاة بعناية.. ولكنه لم يكن
يفهم معناها

قطع تركيزه في النقوش يد الحج "عزازي" التي ادارت مزلاج
الباب الخشبي العملاق.. ودفعته في رفق.. تحرك معها الباب
مستجيباً محدثاً صريراً معدنياً قوياً تردد صداه عدة مرات في

ذلك المهبط حتى أن "حلو" شعر بالخوف للحظات من الصوت الذي يعود من وراءه مرارًا وتكرارًا

كانت الغرفة مظلمة تمامًا.. دلف إليها الحج "عزازي" الذي بدأ جبينه يندى بقطرات عرق نتيجة المجهود الذي بذله في النزول إلى هذا المكان.. تحرك في ضوء المصباح الخافت.. ليضغط زرًا على قاعدة خشبية تم تعليقها على الجدار.. يبدو انه قد أعد حديثًا داخل الغرفة.. يتصل بمجموعة اسلاك خفيفة تزحف فوق الجدار وتتغلغل وتغيب في الاجزاء التي لا تظهر في الغرفة من شدة الظلام

وفور أن ضغط القابس حتى اضاءت الغرفة بشكل متتابع.. جعل الرؤية تتضح شيئًا فشيئًا.. حينها.. حينها فقط.. كانت دهشة "حلو" تعد الأكبر في حياته.. كان الدهول يملأ ملامحه وكأنه كما لم يملئها من قبل

كانت مساحة الغرفة كبيرة بشكل لا يصدق.. كانت مساحتها تتجاوز مساحة المتحف بالكامل في حد ذاته.. كانت ممتدة بشكل لا يصدق.. ولم يكن هذا هو السبب الوحيد لحالة الدهول التي اصابته "حلو".. بل أن تلك الحالة قد اصابته من عدد الكتب والمخطوطات والوثائق التي رآها.. إنها المرة الأولى في حياته التي يرى فيها هذا الكم من تلك المخطوطات والبرديات والكتب باختلاف احجامها واشكالها مجمعة في مكان واحد

تحرك "حلو" بلا شعور.. وتوجه نحو مجموعة من المخطوطات الملقاة على الأرض بلا مبالاة.. اقترب منها في هدوء.. انحنى

ببطيء مستندًا على ركبتيه.. امسكها وحملها في حذر شديد..
وازاح تلك الأتربة التي تغطيها عبر النفخ فوق المخطوطة بهدوء..
حتى بدأت ملامحها تتضح

إحدى وثائق العصر الروماني في مصر قبل ميلاد المسيح
عليه السلام

ترقرقت عينا "حلو" بالدموع وهو يحمل بين يديه مخطوطة
يعود تاريخها إلى أكثر من ألفي عام.. فأعاد وضعها في حرص
شديد.. ثم وقف مرة أخرى

استدار ليطالع وجه الحج "عزازي" الذي يراقبه في صمت..
وعلى شفثيه ابتسامة اعجاب.. اعقبها بسؤال "حلو"

- شفت يا حلو احنا عندنا ايه؟؟؟

- شفت يا حج عزازي.. شفت ويا ريتني ما شفت.. انا
مش قادر أمسك نفسي من الإنهار.. ده كنز!! كنز بكل ما
تحمله الكلمة من معاني.. الأوضة دي فيها ما لا يقدر بمال.. فيها
تاريخ الإنسانية بالكامل يا حج.. فيها اللي يملأ خمسين متحف زي
متحف دار الكتب.. لأ خمسين ايه؟؟ قول مية.. قول ألف

ابتسم الحج "عزازي" في حنان وهو يقول

- بالراحة يا ابني على نفسك.. انا عارف يا ابني.. عارف كل
ده.. بس خللي بالك.. زي ما اتفقنا.. احنا محتاجين نتعامل مع
الموضوع ده بهدوء شديد وسرية تامة في الوقت الحالي

هز "حلو" رأسه مُتفهِّمًا في نشاط.. وهو يتلفت حوله قائلاً

- يا لهوي.. يا لهوووي.. يااا لهوي.. ايه كل ده؟؟؟ أنا مش عارف ابدأ منين ولا أعمل ايه؟؟!!

قهقهه الحج "عزازي" كالعادة وسعل أيضا كالعادة.. ثم قال

- إعمل الي عاوز تعمله يا عم براحتك.. أنا بقى حسيبك تشوف شغلك هنا.. وأطلع أقعد في مكتبي.. اخلص شوية حاجات على كام مكلمة تليفون اشوف الحاجة في البيت عاوزة حاجة ولا لأ وأطمئنها

نظر إليه "حلو" في دهشة قائلاً

- حتسيبني لوحدي في جنيئة الكتب دي يا حج عزازي؟؟؟
طب افرض حبيت أشرب ولا اخش التلاويت.. حأعمل ايه؟؟

ضحك الحج "عزازي" ثم قال

- بص.. خيلنا نمشي على نظام كويس.. أنا كل ساعتين حأنزل اشقر عليك.. واجيبلك كوباية شاي معايا وازازة مية.. احنا لسة شاربين شاي.. الكوباية الجاية كمان ساعتين شغل.. وأهي الساعة داخله على تمانية مساء.. قصادك شغل لحد عشرة.. وأجيلك.. اتفقنا؟؟

- اتفقنا قوي يا راجل يا سُكرة.. انا كنت ناوي اقضي ساعتين شغل.. بس الكلام ده قبل ما اشوف ملعب الكتب ده.. أنا كنت فأكرها أوضة أربعة في خمسة زي أوضة نومي البيج كدة.. مكنتش عارف انها اد المنطقة اللي ساكن فيها كلها على بعض.. يا لهوي.. يا لهوووي.. ياااااا لهوي

ضحك الحج "عززي" مرة أخرى.. ثم قال

- طيب أنا حاقفل ورايا مدخل الأوضة من فوق.. الحيطه
وباب الأوضة العلوية.. وحسيب باب الأوضة ده مفتوح.. أمان
بس مش أكثر

اوماً "حلو" برأسه في تفهم قائلاً

- براحتك خالص يا حج عززي.. أنا شخصياً مش حتحرك
من هنا غير أما ألف شوية اشوف قد كام ألف كتاب ومخطوطة
من الي هنا وهنا وهناك.. وهناك كمان.. يا لهوي.. يا لهوووي..
يا ااااا لهوي

ابتسم الحج "عززي" وكاد يهم بالانصراف.. لولا ان استوقفه
"حلو" بسؤال

- بس قولي يا حج عززي.. انت نورت المكان كدة ازاي؟؟
شد الحج "عززي" قامته وبدت علامات الفخر على وجهه
وهو يقول

- بالجهود الذاتية يا حلو.. مكانش في كهربا واصلة.. وانا
جبت شوية اسلاك على كام دواية على كام لمضة موفرة..
وبطارتين عربية نقل.. وواحد صديق مهندس كهربا عملي محول..
واتصرفت بقى

ابتسم "حلو" وهو ينظر إلى الحج "عززي" ثم قال

- عفريت انت يا حج.. والله عفريت.. ده شغل موالد بالصلاة
على النبي

قهقهه الحج "عزازي" وحاول أن لا يسعل ولكنه فشل.. ثم قال
- الجيش قالك اتصرف.. وانا اتصرفت.. المهم.. حسيبك بقى
لشغلك.. ومعادنا كمان ساعتين.. عاوز حاجة دلوقتي يا ابني ؟
نظر "حلو" حوله في تشتت تام.. وقال للحج "عزازي"
بدون أن ينظر اليه

- انا عاوز حد يقولي ابتدي منين ولا منين ولا منين.. انا
حتجن من الحلاوة.. يا لهوي.. يا لهوووي.. ياااااااا لهوي
ابتسم الحج "عزازي" في سعادة.. ثم التفت وهو يتخذ
طريقه للصعود قائلاً منهياً
- معادنا كمان ساعتين.. سلام

وقف "حلو" دون أن يلتفت.. وهو يتطلع إلى مكان بعيد
يظهر فيه تلٌّ من الكتب المتراكمة.. وقال محدثاً نفسه
- ايوة.. أنا ابتدي من عند الجبل اللي هناك ده.. أكيد في
بلاوي هناك.. يا ترى كتب إيه و الا مخطوطات إيه اللي هناك
دي؟ قلبي حيقف.. مش مصدق نفسي.. دا انا حبات هنا..
مش حتحرك من هنا.. مش مروح.. يا لهوي.. يا لهوووووي..
ياااااااا لهوي

وبداً في التحرك نحو زاوية الكتب التي حددها.. وقلبه
يرقص طرباً.. وعقله ينبئه أن هذه التجربة ستكون الأروع في
حياته



أشارت عقارب الساعة إلى التاسعة والثلث مساءً.. بينما
جلس الحج "عزازي" فوق مكتبه وهو يُطالع بعض السجلات
الأرشيفية باهتمام

كان الحج "عزازي" بالفعل رجلاً يعشق عمله للغاية..
ويقضي وقته بالكامل في محاولة التطوير والإهتمام بالكنوز المحيطة
بالمكان.. والمكدسة في كل ركن من أركان هذا الصرح التاريخي
العظيم

لم يقطع انتباهه الشديد إلى السجلات.. الا صوت هاتفه
المحمول وهو يرن فجأة.. مما جعله ينتفض مذعوراً مثل كل مرة
يرن فيها الهاتف وهو يعمل في هذا المكان وسط الهدوء

لم يعتد أبداً صوت الهاتف المفاجئ.. رغم حملة له لسنوات
قليلة.. الا انه كمعظم كبار السن.. كانت تعاملاته مع المحمول
محدودة للغاية.. لم يذب أو ينكسر أبداً ذلك الجدار الجليدي بينه
وبين التكنولوجيا المتطورة.. إلا في أضيق الحدود

استعاد الحج عزازي سيطرته على نفسه في لحظات.. ثم
التقط الهاتف الذي كان يرن كالمسعود بلا توقف.. ونظر إلى
شاشته في ضجر وغضب وفي رأسه شياطين الدنيا تخبره أن
يحطم هذا الهاتف المزجج اللعين.. ليطلع اسم "أم سلمى" .. فيزفر
في ضجر.. ويضغط زر إجابة الإتصال

- الو.. ايوة يا حجة.. ايوة خير؟؟ حكون فين يعني؟؟ في
الشغل يا حجة

ثم بدأت قسّات وجهه في التغير بصورة مفاجأة.. وهو
ينصت بأهتمام ثم يقول في صوت مضطرب..

- ليه كدة يا ام سلمى؟؟ مالك؟؟؟ تعبانة حاسة إايه
طيب؟؟ طيب طيب.. انا جي حالاً.. مسافة السكة

أنهى الحج "عزازي" الإتصال في سرعة.. ونهض من مكانه
في بطئ فرضته عليه آلام الخشونة في مفاصل ركبتيه.. ثم أسرع في
إغلاق السجل وإعادته إلى مكانه في نظام خلفته سنوات طوال
من العمل.. والتقف هاتفه المحمول ودسه في جيبه.. ثم توجه نحو
الباب في سرعة.. أخرج مفاتيح باب المكتب من جيبه.. ثم توقف
فجأة وتحدث مخاطباً نفسه

- يا ربي!! كنت حا أنسى حلو!!! يا ستار.. اعمل ايه
دلوقتي؟؟!!

بدأ عقله يفكر للحظات يشوبها التوتر والتردد الشديدين ثم
ما لبث ان اتخذ قراره وهو يغلق الباب في سرعة محدثاً نفسه
من جديد بلهجة إقناع

- هي ساعة واحدة.. حاروح اطمن على الحجة.. واكلم
البنات يجوا يشوفها مالها.. وارجعله هوا.. مش حتأخر ان شاء
الله.. استر يا رب

تحرك نحو الباب الأمامي في خطوات مسرعة وهو يُحوقل
ويُسمل ويقرأ بعض الأدعية.. وعبر بوابة المتحف الخارجية التي
جلس على طرفيها حراس الأمن.. الحراس الذين وصلوا منذ
ساعة لاستلام ورديتهم الليلية.. فباشروه بسؤال

- خير يا حج عزازي.. مالك؟؟ شكلك في حاجة!

- لا الله يكرمكم.. الحجة بس بعافية في البيت

- ألف ألف سلامة عليها يا حج.. ربنا يطمئنك عليها.. مش
عاوز أي حاجة طيب؟؟

- ربنا يخليكم يا رجاله.. دعواتكم

ثم أنصرف الحج "عزازي" في خطوات مسرعة متبوعاً
بدعوات رجال الأمن وعلامات الأجهاد تظهر على وجهه من
فرط بذل المجهود في الإسراع نحو منزله بالإضافة إلى توتر أعصابه
وشعوره بالقلق البالغ.. ليطمأن على شريكة حياته

شارع.. وراء شارع.. وراء شارع.. وهو يُمد الحُطى نحو
المنزل.. ورغم برودة الشتاء القارصة.. إلا أن قطرات العرق بدأت
تظهر كجبات لؤلؤ تعكس أضواء أعمدة الإنارة على جبينه..
وبدأت أبخرة الشتاء تتصاعد من فمه في مثل هذا الوقت من
الليل بشكل مُتسارع.. دليل على انه يبذل مجهودًا كبيرًا..

كانت الشوارع شبه خالية

البرودة والشتاء والليل وموسم المدارس.. جعل الجميع يقبع
في منزله بلا أدنى مخاطرة بالخروج في مثل هذا الطقس.. حتى
سائقي سيارات الأجرة

خلت الشوارع من المارة تقريبًا.. إلا من البعض القليل هنا
وهناك

ومع الخطوات المُتسارعة.. والمجهود الكبير الذي لم يعتده الحج
"عزازي".. بدأت الصور تبهت من حوله.. وبدأت الأشكال في
التغير أمام عينيه

حاول أن يُحرك يديه إلى رأسه.. حتى يزيل ذلك الدوار
السخيف.. ولكن الدوار ازداد شيئًا فشيئًا في سرعة.. حتى تمكن
من عقله تمامًا في لحظات قصيرة

تباطأت خطوات الحج "عزازي".. وتثاقلت حركته فجأة.. لم
يعد يعرف ماذا يحدث.. ولكن انتباهه الشديد كان لتلك الأضواء
التي بدأت تخفت وتتداخل من حوله.. ورأسه التي لم يعد يدري
ماذا يحل بها؟!!!

امتدت يده تتشبث بالفراغ.. وتضرب الهواء محاولة الوصول
إلى أي شيء يمكن الارتكاز عليه.. ولكنه فشل
وسقط مغشياً عليه.. بلا حراك

كانت عينا "حلو" تبرقان كما لم تبرقان من قبل.. كانت
الابتسامة على وجهه تكاد تصل من الأذن إلى الأذن الأخرى..
وهو يردد بين الحين والآخر في سعادة جذلة

- يا لهوي.. يا لهوووووووي.. يااااا لهوي

كانت يداه تتفحصان في هدوء وعناية مجموعة من أروع
الكنوز فوق كوكب الأرض

كتب من كل مكان في الدنيا

ما نجى من التتار في بغداد.. ما نجى من المحارق في أوروبا
في العصور الوسطى.. مخطوطات فرعونية وقبطية تعود لأزمان
سحيقة.. مخطوطات يونانية تاريخية

كانت أصابعه ترتعد من فرط الإثارة.. وهو يُخاطب نفسه
في سعادة قائلاً

- كنز.. ده كنز.. اكيد ده كنز الملك سليمان.. ده اغلى من
كل كنوز الأرض.. الورقة الواحدة من دول لا تقدر بتمن.. أنا لولا
خايف على الورق كان جالي تبول لا ارادي من الفرحة
كان يتنقل بين تلال المخطوطات والكتب كالذي يتنقل بين
بساتين الأزهار والفواكه

لم يعر الوقت أي انتباه

لم يلتفت إلى أن الساعة قد تجاوزت بالفعل الحادية عشر
مساءً.. لم يلتفت إلى أن موعده الدوري مع الحج "عزازي" قد مر
عليه ساعة كاملة وأن الرجل لم ينزل إليه كما اتفقا سويًا

ولكن.. لم يعد للوقت أي أهمية.. ولم يعد للأشخاص أي ذكر
في هذه اللحظات.. ما يحيط به من كنوز جعله يفقد القدرة على
تمييز كل الأوقات والوعود والالتزامات.. حتى وعده الذي قطعه
مع نفسه بالذهاب إلى زوجته "سعادة".. تناساه تمامًا أمام رغبته
السعيدة في الارتواء مما يحيط به من واحات الكنوز المكتوبة
والمخطوطة والمرسومة

واصل "حلو" التنقل لنصف ساعة أخرى.. وهو لا يشعر
بأي ملل أو كد أو تعب.. السعادة تغمره من قمة رأسه إلى
أخمص قدميه

تقدم هنا وهناك.. حتى وصل إلى مجموعة من الكتب
المتراصة بعناية.. وفوق قمتها.. كان ذلك الكتاب..

المختلف

كتابٌ مختلفٌ.. كبيرٌ للغاية.. عدد أوراقه ضخمة.. ولكن.. لم يكن ذلك فقط هو ما لفت إنتباه "حلو" إلى الكتاب وجذب نظره إليه

فقد استرعى إنتباه "حلو" في تلك اللحظة حالة الكتاب التي كانت أفضل من كل الكتب الموجودة في القبو الكبير.. بل أن "حلو" قد لاحظ أن حالته تكاد تكون أفضل من الكتب الحديثة الطباعة.. وكأنه قد خرج لتوه من المطبعة حديثاً.. ولكن في شكل قديم عتيق.. بعنوان مكتوب بحروف مزر كشة تعود إلى عصر الرسم العثماني

عقد "حلو" حاجبيه.. واقترب من الكتاب وهو يقرأ اسمه في بطيء.. بصوت خرج منه وهو يحدث نفسه

- حواديت السعادة

إزداد حاجبي "حلو" انعقاداً.. وهو يفكر في هذا الأسم الغريب.. الأسم المكتوب باللغة العربية السليمة.. الذي توسط غلاف الكتاب وحيداً.. والذي لا يشير إلى محتوى الكتاب على عكس ما هو متعارف عليه في الكتب القديمة وحقبة استخدام هذا النوع من أنواع الخطوط.. فقال "حلو" في تساؤل مخاطباً نفسه

- إيه يعني مش فاهم؟؟ حواديت السعادة بتاعة إيه يعني؟؟ الواحد متعود يقرأ مثلاً.. حواديت السعادة في تنضيف السجادة مثلاً.. حواديت السعادة في.. في.. بشرها سادة.. تصدق

تمشي.. ممكن برضه.. حواديت السعادة في كيفية إنتقاء العرييات
اللادا.. حيقى كتاب كاتبه واحد ميكانيكي يخل.. إنما.. حواديت
السعادة حاف كدة؟؟!! غريبة.. يمكن الكتاب ده بتاع ولاد الحج
"عزازي" مثلاً؟؟!! استنى كدة.. حواديت السعادة في الدراسات
الإجتماعية للإبتدائية.. كدة راحت على الأضواء وسلاح التلميذ
والمعاصر.. بس ايه ده صحيح؟! الحج عزازي!!! يا لهوي!!!
الراجل ده راح فين صحيح؟؟؟

نظر "حلو" في ساعته بسرعة فوجدها قد تجاوزت الحادية
عشر مساءً يبضع دقائق.. ففكر للحظة.. ثم ما لبث أن قال
محاولاً اقناع نفسه

- تلاقيه عارف إني ملهي هنا.. وقال يسيني شوية زيادة
كمان الف واشوف البلاوي اللي حواليا دي كلها.. كلها شوية..
وحلاقيه نازل بكوباية الشاي والمية بيعرج زي الكنغر اللي مخبوط
في فخاده.. أكون أنا شوفت اللي في إيدي ده

إقترب "حلو" بوجهه أكثر فأكثر من الكتاب وهو يتفحصه
في عناية.. وامتدت يده لتمسك به في بطيء.. وترفعه من مكانه
في حرص

سار به وهو يحمله عدة خطوات للوراء.. مسافة لم تتجاوز
المترين وجلس مستنداً بظهره إلى إحدى تلال الكتب المجاورة..
إمتدت يده بتلقائية شديدة.. تمسح وتزيل غباراً لم يكن موجوداً
في الأساس فوق جلدة الكتاب.. مما زاده حيرةً ودهشة

امتدت أنامله.. وفتحت الكتاب في هدوء شديد
ومع فتح الكتاب.. انفتحت أبواب الجحيم..
في منتهى العنف

جلس الطبيب يخط بعض أنواع الأدوية على ورقة ومن
حواله وقف أفراد أسرة الحج عزازي.. تتوسطهم زوجته الحجة "أم
سلمى" التي احمرت عيناها وانفها دليل على بكائها منذ لحظات
قليلة

والى جانبها وقفت ابنتها وهما تحيطان كتفها بأذرعتهما..
ويربتان عليها في حنو.. بينما وقف زوجها ابنتي الحج عزازي وهما
يراقبان الطبيب في أهتمام.. حتى فرغ من كتابة العديد والعديد
من الأدوية.. ثم إلتفت إلى زوج سلمى قائلاً في لهجة أمرة

- الدواء ده لازم يجي بسرعة

- حاضر يا دكتور حالا.. حأنزل اجيبه حالاً

تدخلت الحجة أم سلمى متوجهة إلى الطبيب بسؤال واللوعة
تظهر في نبراتهما

- طمني يا دكتور والنبى.. الحج ماله

- بصراحة يا حجة الحج تعبان شوية.. وعنده الدنيا كلها
متلخبطة جامد.. الضغط والسكر وحشين قوي.. انتوا ازاي
ساييينه ده كله يا حجة!؟

- والله يا دكتور هو اللي تاغبنا.. ولا بيسمع كلام حد.. ولا بيرضى يحافظ على نفسه.. ومن صباحية ربنا ينزل يروح الشغل ما يرجعش الا وش الفجر ويا دوب ساعتين تلاتة ويجري جري تاني على الشغل

- وده كلام برضه يا حجة؟؟ الحج كبير في السن.. ولازم يخللي باله على صحته.. اللي عنده ده شبه انهيار تام في وظائف الجسم.. ارهاق شديد جدًا جدًا.. ولازم يتنقل المستشفى.. مش اقل من اسبوع ما يتحركش من السرير.. وانا حعدي عليه كل يوم بليل وانا راجع من العيادة اطمئن عليه بنفسي في المستشفى إمتنع وجه إم سلمى بعد سماع كلمات الطبيب وقالت

- مستشفى؟؟ هو تعبان للدرجة دي يا دكتور؟!

ابتسم الطبيب وهو يحاول إضفاء أكبر قدر ممكن من الهدوء على كلماته ونبرته وأسلوبه قائلاً

- يا حجة الحج عزازي كبير في السن، ومحتاج رعاية طبية كويسة عشان يقوم زي الفل ودي أهم حاجة ترقرت الدموع في عيني أم سلمى ثم قالت

- ربنا يكرمك يا دكتور.. احنا أهل وطول عمرك ابن حلال

- ما تقوليش كدة يا حجة.. شوفي.. انا مديله حقنة حتخليه نايم فترة كويسة.. وأنا حابعت للمستشفى تجهز أوضة وتبعث عريّة الإسعاف الليلة دي وننقله في هدوء قبل دوشة النهار

- ربنا يكرمك يا دكتور.. وما يجرمناش منك.. انت لولا
اهتمامك ومساعدة ولاد الحلال اللي لحقوه في الشارع وجابوه على
هنا من عنوان البطاقة كان الراجل راح مننا

ثم انخرطت الحجة أم سلمى في بكاء شديد.. واقبلت ابتهاها
عليها لتضامها وتطمئنها في الوقت الذي استطرده فيه الطبيب
قائلاً

- أهم حاجة الراحة و المتابعة ودي حاجات مش حيلاقها
غير من متخصصين في المستشفى يا حجة.. إن شاء الله يومين
تلاتة ويفوق و إسبوع بالكثير ويخرج معاكم من المستشفى زي
الفل.. أنا عاوزك تطمني ولما يخرج بالسلامة تخلي بالك عليه في
فترة النقاهة

من بين دموعها اجابت الحجة أم سلمى قائلة

- حاضر يا دكتور.. محطه في عيني زي ما هو موجود طول
عمره

ابتسم الطبيب ابتسامة ودية وأردف

- ومهم برضه إنتي كمان يا حجة تاخدي الدوا اللي كتبتهم لك
من شوية.. مش عاوزين موضوع التعب ده يتكرر تاني.. شوية
فيتامينات كدة وانتي الحمد لله.. ضغطك كويس والسكر معقول..
بس نخلي بالننا بقى ده المهم

اومأت الحجة أم سلمى برأسها إيجاباً وهي تحاول التماسك قائلة

- حاضر.. حاضر يا دكتور.. بس المهم هو يبقى كويس..
انا مش مهمة.. هو اللي مهم.. ربنا ما يجرمناش منه ابداً ولا من
دخلته علينا

ثم عاودت البكاء مرة أخرى.. في حين تدخلت ابنتها
محاولة الشد من أزرهما.. مستعintان بكلمات الطبيب
ومستدلتان على كلماته التي تطلب الراحة لوالدهما

استأذن الطبيب للمغادرة مع وعده بالمرور على الحج عزازي
في المستشفى مساء الغد للإطمئنان على حالته وتأكيده على أن
سيارة الإسعاف سوف تكون متواجدة في خلال ساعتين على
الأكثر لنقله

تسللت أم سلمى إلى حجرة الحج عزازي.. ووقفت لدى
الباب.. وهي تنظر إليه في حب ولهفة.. وتتمنى من كل قلبها أن
يعود إلى وعيه ويملاً الدنيا بصوته وطلباته التي تملأ عليها حياتها
تطلعت إلى حيث يرقد على فراشه.. وهو غائب في غيبوبة
عميقة

وعالم آخر.. لا يعلم أحد متى سيعود منه

أضواء ملونة ساطعة...

تتلاً

أنارت كل ركن من أركان القبو الواسع...

أضواء أحالت ظلام أركان القبو إلى نهار.. أصوات متداخلة
من كل صوب تدور في أرجاء المكان..

بينما جلس "حلو" وهو يرتعد ممسكًا بالكتاب وكأنه يحتمي
به.. وعلى وجهه علامات فزع رهيب ولا يدري ماذا يحدث من
حوله

مر ما يقارب الدقيقتين والأضواء ترتفع وتنخفض وألوانها
تتداخل وكأن قوس قزح قد انفجر في المكان.. والأصوات تعلو
وتنخفض وهي تتحدث بكلمات حملت كل لهجات الأرض.. ولكن
"حلو" لم يستطع أن يميز منها جملة واحدة من شدة تداخلها
وبدأت الأضواء تخفت تدريجيًا

وبدأ الوضع يعود إلى سابقه.. لتحتل الإضاءة البسيطة
مكانها من جديد.. وتعود أركان القبو إلى قلب الظلام مرة أخرى
نظر "حلو" حوله في فزع.. وفرائسه ترتعد في عنف.. شعر
أن دقات قلبه تكاد تحطم عظام قفصه الصدري لتقفز هاربة إلى
مكان آمن.. بينما لا يكاد يقوى على أن يحرك قدميه لينهض من
جديد

مرت دقيقة أخرى.. استعاد فيها "حلو" سيطرته على
انفعالاته.. بينما لا تزال حالة الفزع تتملك أطرافه.. قاوم بصعوبة..
ونفض من مكانه.. وهو يدور حول نفسه في ترقب.. و ذراعا
ما زالتا تحيطان بالكتاب و تحتضناه وعيناه تتطلعان إلى الأركان

المظلّمة.. والهواجس المخيفة تتقاذف إلى عقله بلا رحمة.. وتحدث إلى نفسه بصوت مسموع قائلاً

- يا مراري.. يا نصيتي.. يا نايتي.. يا بلوتي.. استر يا رب..
بسم الله الذي لا يضر مع اسمه شيء في الأرض ولا في السماء..
استر يا رب.. طبعًا حتطلع علي سحلية حولة عملاقة من الركن
الضلمة اللي هناك ده وحتطلب مني ارقص بلدي يا أما تتكاثر
معايا بالانقسام.. وأكيد من الركن الثاني ده.. حيطلع عفريت بعين
واحدة وحتطلب مني احطله قطرة بريزولين فيها وحيهدلني لاني
معائش البريزولين.. اه ياني يا أما.. يا ترى حيحصل ايه يا أما..
معائش بريزولين يا أما

لم يكد "حلو" ينتهي من كلماته وتساؤلاته.. حتى جائته
الإجابة من بين ذراعيه تمامًا

- حيحصل ايه يعني؟؟؟ كل خير يا حلو

انتفض "حلو" انتفاضة كادت تنخلع معها رقبتة عن جذعه..
وارتد مبتعدًا قاذفًا الكتاب من بين يديه قبل حتى أن يحاول
النظر إليه وهو يطلق صرخة جذعة رفيعة.. وما أن ابتعد عدة
خطوات واختبئ خلف تل كتب مجاور.. حتى اطلّ برأسه
ليرى من أين صدر هذا الصوت.. فلربما يكون الحج عزازي
وحينها.. لم يجد أي شخص في الجوار.. مما زاده رُعبًا.. وبدأت
قسّات وجهه في التحول إلى البكاء من شدة الرعب

ظل "حلو" يحدق في المكان في فزع ثم قال في صوت مرتجف

- سلامووو عليكووو.. أيووة.. مين اللي هنا يا جماعة؟؟

خرج الصوت رصينًا من قلب الكتاب قائلًا

- أنا يا حلو.. أنا كتاب الحوادث

حلق "حلو" في اتجاه الكتاب فاغترًا فاه في عدم فهم.. وبدأت قدماه في الارتعاد مجددًا وهو يقول في نبرة رعب

- كتاب إيه يا جماعة؟؟؟ يا جماعة ارجوكم بلاش الهزار ده لو سمحتم.. يا حج عزاللا ازي بلاالاش سخافة.. حاشتم على فكرة

عاود الصوت الصادر من الكتاب التحدث مرة أخرى قائلًا

- حتشتم ليه بقى؟؟ مش انت اللي فتحت الكتاب؟؟ خايف من إيه؟ ده أنا مجرد كتاب ورق

ازدرد "حلو" لعابة وهو يحدق في موضع الكتاب وقد تأكد أن الصوت صادرٌ بالفعل من ناحيته.. وبدأت مشاعر الفزع تملك منه أكثر وأكثر فقال

- انت إيه بقى بالصلاة على النبي كدة؟؟ انس ولا جن؟؟ لو إنس يبقى أأمر.. وقول عاوز إيه عشان أنا على الترتوفة وحفرق الدنيا بيبي.. ولو جن.. قول برضه عشان أغرق الدنيا بيبي علطول من غير ما تعمل حاجة

صدرت ضحكة جوفاء من قلب الكتاب المفتوح الملقى على الأرض.. وخرج منه الصوت مُخاطبًا "حلو"

- جن مين يا ابني؟؟ أنت بتصدق في الكلام ده برضه؟؟
ما عفريت الا بني آدم يا حلو

بدت بعض علامات الارتياح على وجه "حلو" الذي استعاد صوته بعض من ثباته.. وان كانت نبرته ما زالت تحمل كثيرًا من الخوف وهو يقول

- طب طالما انت إنس الحمد لله.. جيت هنا ازاي؟؟
وعاوز إيه؟؟ إنت فين بقى؟ متداري فين لو سمحت؟ انت بعتك الحج عزازي طيب؟؟ واياه اللي مخبيك ورا الكتب كدة يا استاذ.. عيب يا استاذ الحركات دي.. اظهر.. دي مش لعبة يا استاذ.

علت الضحكة الصادرة من قلب الكتاب ثم صدر الصوت مرة أخرى ليخاطب "حلو" قائلاً

- لا.. اطمن.. انا بقاى أكثر من الف سنة عايش كدة.. وما تخافش على الكتب.. أنا اخاف عليها أكثر منك

استتعت عينا "حلو" في خوف.. وهو يُردد

- ألف سنة.. هي ليلة سوخة من الأول ومش فايته.. انت حتهزر يا عم انت ولا اياه الموضوع؟ اتفضل بالذوق اظهر كدة وكلمني.. لو الحج عزازي باعتك تهرج.. والنبي أنا مش ناقص..

انا ركبي أساسًا مش شايلاني.. اظهر كدة وقولي دخلت هنا
ازاي

صدر الصوت من قلب الكتاب مرة أخرى في هدوء قائلًا

- انا ما دخلتش يا ابني

- احنا حنجر يا حج.. انا لفيت البدروم كله بقالي ثلاث
ساعات بلف ومكنش فيه بني آدم.. والحج عزازي مأكدي ان
مفيش حد دخل هنا غيري

- يا ابني.. انا ما دخلتش.. انا جوة أصلًا.. ما بخرجش

- وبعدين بقى في الشبكة السوداء دي.. احنا حنجر يا عم
انت؟ هو إيه اللي ما دخلتش.. وما بتخرجش.. جوة فين؟؟؟

تحدث الكتاب قائلًا

- أنا الكتاب اللي انت كنت لسة ماسكه في حضنك ده
وشايله زي ابنك من شوية

نظر "حلو" إلى الكتاب لحظة.. ثم قال

- وبعدين بقى في الليلة الكويتية دي؟ كتاب ايه اللي انت
جواه يا سيدي؟ هو أنا ناقص؟؟

وفجأة.. ارتفع الكتاب المفتوح عن الأرض.. وطار في الهوار
مارًا من فوق رأس "حلو" الذي تابعه وهو متحجر في مكانه..
ورأه يعبر من فوق رأسه ويستقر فوق تل آخر من الكتب.

انفغر فاه "حلو" مرة أخرى.. ثم بدأت ملامح وجهه في
التغير إلى الرعب حتى كاد يبكي.. وهو يقول بنبرة رعب اقرب
إلى البكاء

- ينفع كدة؟؟ تضحك عليا وتقولي إنس.. وما عفريت الا
بني آدم.. وتشغلني.. مين حيغيرلي هدومي دلوقتي؟؟ عارف
كمية المية دي زمانها بوظت كام مخطوطة أثرية في الأرض؟

صدرت ضحكة بسيطة من داخل قلب الكتاب ثم قال

- أنا يا ابني بيسموني كتاب الاحلام.. ويدلعوني يقولولي
يا "حليمو"

- حليلة؟؟؟ حليلة مين؟ عاوز مني ايه يا حليلة؟؟

- يا ابني بقولك حليمو.. مش حليلة!!

- حليمو.. حليلة.. قولي عاوز مني ايه لان كدة حيجيلي برد
من المية اللي مبهدلاني دي

تحدث الكتاب مرة أخرى قائلاً

- انا مش عاوز حاجة يا ابني.. انت اللي عاوز

- لا وربنا ما عاوز حاجة.. الغيار حاتصرف فيه.. مش عاوز
حد يغيرلي ربنا يخليك ويكرمك

- هو انت مش فتحت الكتاب؟؟

- كتاب ايه يا عم انت؟؟

- حواديت السعادة يا حلو؟؟!!

- اه فتحته.. هو عيب؟؟؟ ما انا فتحت زلّوخ كتاب قبل
كدة.. وما حصلش حاجة.. ايه الجديد في ده؟ ارحم اعصاب امي
قال الكتاب مُخاطبًا "حلو"

- انا حكيك يا ابني

رد عليه حلو قائلًا

- اتفضل احكي يا عم الحج اما نشوف اخرتها.. كلي اذان
صاغية ومياه جارية كمان.. البرد حيهدلني
صدرت ضحكة قصيرة عن الكتاب.. ثم بدأ في سرد قصته

- انا يا ابني موجود من أيام ملهاش عدد.. وشغلتني إني أتابع
الحواديت اللي حصلت في كل العصور واتقلها للناس بعد كدة
عشان نخلي جواهم الأمل ونصحيه كل فترة.. كل الحواديت.. وكل
حدوته منهم تبتي موت كل كام قرن.. انزل بيها على تفكير بني
ادم في اي مكان في الأرض.. اخليه يفكر فيها.. ويألفها.. وينشرها..
وتتعاد تاني الحدوته.. مرة ورا مرة ورا مرة.. من الآخر.. انا
شغلتني اني احافظ على الحواديت واسمقراريتها

نظر "حلو" إلى الكتاب للحظات.. وهو يستمع إلى ما يتلوه
عليه.. ثم قلب شفتيه وقال له

- مؤثر قوي الكلام ده.. المفروض بقى أنا الريالة تغرقني من
فوق.. زي ما البيبي مغرقني كدة من تحت.. وتبقى دي حدوته
"حلو المبلول وحليمو المخبول".. مش كدة؟؟؟

ضحك الكتاب مرة أخرى.. وهو يقول لـ "حلو"

- طيب يا ابني.. قولي تحب اثبتك صدق كلامي ازاى ؟
ارتفعت اصابع "حلو" وهى تداعب رأسه وتحكما.. وعيناه
تنظران إلى الفراغ مفكرًا.. ثم قال

- والله يا عم حليمو.. الموضوع مش محتاج اثبات.. الموضوع
محتاج قميص خلف خلاف في حالتك دي

- يا ابني جرب.. قولي بس.. اسأل.. انت خسران حاجة ؟

- يا عم انت اسأل على ايه؟؟ أنا مش فاهم حاجة.. اسأل
على ايبويه؟؟ لا حول ولا قوة الا بالله.. اسألك عن حدوتة
"سنووايت" مثلا؟؟؟؟؟؟

- قبل الطلاق ولا بعد الطلاق؟؟

- طلاق؟؟؟ احنا حنهرج يا جدع انت؟؟؟ بقولك
"سنووايت"

- أيوة يا ابني.. عارفها.. الأميرة والاقزام السبعة.. ما هي بعد
ما اتجوزت الأمير بكذا شهر.. اتطلقت واتجوزت القزم الصغير

- الله يخرب بيت عيشتك كتاب.. دا انت أول كتاب يكون
ضارب كمية برشام متنوع عامل دماغ حبر زباله.. سنووايت ايه
اللي اتطلقت؟؟؟ الكلام ده مش موجود في الحواديت يا كتاب
الطبخ انت.. انت شكلك مش عارف حاجة

- يا ابني انا زي ما قتلتك.. اللي بأنقله للناس هو الجزء اللي
بيخلي جواهرهم الأمل.. ما ينفعش مثلاً احكيلهم ان الأمير اكتشف

ان "سنووايت" كانت على علاقة غير شرعية بالقزم الصغير..
دي تفاصيل تعمل مشاكل في الحدوتة

- سنووايت؟؟؟ علاقة غير شرعية مع القزم؟؟؟ أَلطم؟؟؟
ايه الحكاية القذرة دي إلهي تولع سنووايت و القزم في ساعة
واحدة!!!!

- البيوت ياما بتداري يا حلو يا ابني
- لا يا شيخ.. والمفروض أنا بقى اصدق الكلام الفاضي
ده؟؟؟

- يا ابني وانا حضحك عليك أو اغشك ليه بس؟؟؟

- ممم.. طيب.. سندريلا مثلاً؟؟

- اشمعنى؟؟

- انت حتخشلي قافية؟ انت كتاب نكت و لا ايه؟؟!!

- يا ابني انا قلتلك اسأل وأنا اجاوبك

- في مشاكل في حكاية سندريلا؟؟؟

- مفيش بيت مفهوش مشاكل يا حلو

- يا عم فكك من جو برنامج "حياتي" ده.. انت جي
تهرج؟؟؟

- يا ابني سندريلا بعد ما اتجوزت الأمير.. طمعت في كل
فلوسه لانها كانت طول عمرها فقيرة.. ومع مرور الوقت.. خلته

يتنازل لها عن كل ما يملك ومضته على كمبيالات وشغلانة..
وطرده في الشارع في نصاص الليالي

- كمبيالات؟ دي سندريلا؟؟؟ اومال لو كانت فضة
المعداوي كانت عملت فيه ايه؟؟؟ ممممم.. لا بس حلوة اللعبة
دي.. خيالك واسع يا جدع انت.. الصنف اللي بتسفه ده عالي
عالي عالي

- انت لسة مش مصدقي يا حلو؟؟؟

- ما علينا.. احكي لي عن.. عن.. طرزان

- الغوريلا جاعت ونهشته واتوفي في الدمرداش

- اخبار سودة ما شاء الله.. طيب.. عقلة الأصبع؟

- الواد كان بيلعب بالعجلة وابوه ما أخذش باله وهو راجع
من الشغل قام هارسه بالجزمة

- ما شاء الله.. لا.. نهايات مبشرة كلها.. اومال بس عمالين

تقولوا عاشوا في تبات ونبات وخلفوا صبيان وبنات.. دي نهايات
كلها محتاجة طيب شرعي للكشف على الجثث!! وبعدها احتفال
نهائي في مشرحة

- يا ابني انا فهّمتك.. الحواديت دي أمل.. لازم تدي الناس

أمل.. ولا كل حاجة من حواليم يملأها اليأس.

- أيوة بس كدة الحواديت دي كلها كذب في كذب.. يعني

مثلاً لو حكيت للناس ان الذئب أكل ذات الرداء الأحمر في نهاية

القصة.. مش الصياد اللي موته.. حتكون حكاية سليمة والناس
ممكن تتعلم منها برضه

- هو ما اكلهاش.. هي اخدت اربعين غرزة في وركها والصياد
شغلها في مصنع سجاد يدوي بعد كدة لما باظت وبقت تعرج
بدل الشحاتة بالمناديل في الاشارات

- أظم يا ناس؟؟؟ اربعين غرزة؟؟ ومصنع سجاد يدوي؟؟؟
ذات الرداء الاحمر اخدت اربعين غرزة؟؟؟ هي اتفتح عليها مطوة
في شارع الوحدة؟؟؟ ومصنع سجاد ايه وهباب ايه؟؟؟ هي كانت
عايشة في كرداسة يا عم المجنون انت؟؟؟

- يا ابني ده اللي حصل.. بس الكلام ده سر

- لا والنبي ايه؟؟!! حامشي أنا اصلي زي الأهل في الشوارع
اقولهم ان سنوايت كانت مرافقة قزم.. او اركب الاوتوبيس
واحكي للناس على سندريلا الواطية اللي ضحكت على
البرنس وشفطت اللي وراه واللي قدامه.. انت عاوز تجني يا عم
انت؟؟؟؟!!

- هو ده الواقع يا حلو يا ابني

- ايوه يا عم حليمو ده واقع مهبب فعلاً.. بس اكد يعني
الحواديت بتبقى ليها حلاوة غير كدة خالص.. مش معقول كل
الحواديت سودة في نهايتها بالشكل ده.. معقول؟؟؟ مفيش ولا
حدوته تكمل للأخر كويس؟؟

- لا فيه طبعا.. ازاي بقى؟! طبعا فيه

- أيوة كدة.. قولي.. حدوتة مين اللي خلصت على خير؟؟؟

- بنت جميلة كدة.. اسمها "أليس"

- أيوة أيوة عارفها دي.. "أليس في بلاد العجائب" عارفها..

مالها بقى.. احكي لي اخرة قصتها ايه جميل فيه؟؟

- اتعالجت من الفصام اللي كان عندها.. والوساوس اللي

كانت بتشوفها والخيالات.. وبعد سنتين خرجت من المصحة زي

الفل.. بس سحبت كهربا كتير قالولي

- تصدق بالله.. انت لولا انك شكلك كتاب مهم و أشري

انا كنت استخدمت معاك اسلوب مش محترم.. "أليس"..

سحبت كهربا يا كتاب يا فيشة انت؟؟ كل الحدوتة طلعت فصام

وخزعبلات؟؟؟ روح إلهي يسد نفسك.. ودي بقى بالصلاة على

النبي كدة النهاية الحلوة؟؟؟

- ما هي اتعالجت يا ابني وبقت زي الفل!!!!

- عاجلك بتوع التأمين الصحي يا بعيد.. قفلتني

- يا ابني انت فاكرا ان الحواديت دي تأليف؟؟؟ دي حكايات

ومواقف حصلت لناس فعلاً.. وأحنا بنقلها جيل بعد جيل بعد

جيل.. مش أكثر.. ندوّقها.. ونحط فيها أمل.. عشان تقروها

- تحط فيها أمل؟؟؟ أمل تلاقيها اتجوزت دراكولا على

مراته يا عم حلیمو بعد اللي بتقوله ده

صدرت من داخل الكتاب ضحكة مجلجلة ترددت في أرجاء

القبو.. ثم خاطب "حلو" قائلاً

- الله يحظك يا حلو يا ابني.. انت باين عليك ابن نكتة..
هما المصريين كلهم كدة.. بس انت باين عليك دمك خفيف
بزيادة

- الله يكرمك يا عم حليمو.. بس نصيحة مني.. الحواديت
دي.. انا شايف انها ضحك على دقون الناس.. معقول؟؟؟
معقول مفيش حدوته واحدة توحد ربنا.. تبقى كويسة من أولها
لآخرها؟؟؟ انا لو مكان اي بطل من ابطال الحواديت دي..
كنت حاربت عشان اكمل الحدوته للآخر بشكل جميل وسعيد
صدر الصوت من داخل الكتاب يهدوء و بنبرة تدل على
عدم الاقتناع بكلمات "حلو" وقال "حليمو"

- طب عيني في عينك كدة!!!!

- حنرج؟ عين ايه الي ابص فيها؟ كتاب بعيون؟ ايه
شغل جرايد المخبرين ده؟

- اقصد اقولك.. انت مقتنع باللي بتقوله ده وانت شخصيًا
عندك نفس المشكلة؟

اقتضب وجه "حلو" وتوترت ملامح وجهه حين تذكر
مشاكله مع "سعادة" فاستطرد "حليمو" قائلاً

- يا ابني أنا عارف كل حاجة.. وعارف حكايتك.. انت
وسعادة.. انا شغلتي زي ما قلتلك.. اشوف الحواديت.. وانقل
السعيد منها للناس عشان الأمل.. وده بيخليني طول الوقت
اتفرج على حواديت الناس.. في كل مكان وزمان

- ده اسمه شغل مصاطب يا عم حليمو.. انت كتاب شغال
في أمن الدولة؟

صدرت قهقهة من داخل الكتاب بصوت مرتفع.. ثم عاود
الكتاب مخاطبة "حلو" قائلاً

- عمومًا.. انت سايب حدوتك الخاصة.. وبتعيب في حواديت
غيرك.. بدل ما تحاول تصلح الحدوتة اللي كانت سعيدة في أولها..
وابتدت تنتهي نفس نهايات الحواديت اللي عندي.. قولي بقي..
ايه الفرق بيني وبينك؟؟!! ها؟؟؟

صمت "حلو" فترة طويلة.. وهو يفكر في الكلمات الصادرة
من قلب الكتاب.. انها كلمات صحيحة بالفعل.. لقد اصبحت
قصته مشابهة لكل القصص المحيطة.. الواقع يفرض عليه ان
يعيش قصة مكررة.. اين ذهب حبه لحبيته "سعادة"؟؟ اين
ذهبت الأشواق والمشاعر الملتبة التي اشتعلت قبل الزواج؟
متى انطفأت؟ اين اختفت؟

تذكر آخر حوار دار بينهما.. واصابته غصة في حلقه شعر
معهما بمرارة شديدة

هل إلى هذا الوضع آلت الأمور بالفعل؟؟

هل ستستمر حياته مع "سعادة" في هذا الوضع الذي لم يكن
ليتخيل أن تصل إليه الأمور؟؟

قطع حبل افكاره صوت "حليمو" الذي قال

- لسة في ايدك كل حاجة يا حلو.. انت يا ابني مع مراتك
اللي ممكن تختاروا طريقة حياتكم.. ممكن تبقى زي الحواديت اللي
في الكتب قبل الجواز.. وزياها برضه بعد الجواز.. وتبقى حدوتك
مكررة.. وممكن تغير كل ده

نظر "حلو" إلى الكتاب في وجوم للحظات.. ثم قال

- أنا عمري ما اتمنيت أبدا غير أني اسعد سعادة يا عم حليمو

- عارف يا ابني.. بس الدنيا بتغير.. والظروف الجديدة
بتخللي البني آدم احواله تتبدل.. ومع الوقت.. الواحد بينسى
نفسه.. وينسى كان فين ويحلم بإيه مع شريكة حياته.. ويتندي
ييعد.. وييعد.. وييعد.. لحد ما فجأة كل واحد يلاقي نفسه في
أبعد نقطة عن الثاني وصعب جدًا جدًا الرجوع والقرب مرة ثانية
- كلامك للاسف صحيح يا عم حليمو

- يا ابني انا كتاب حواديت قديم قوي.. وشفت ياما.. بس
اقولك على حاجة.. انت جواك حاجة مختلفة.. انت جواك حب
كبير لسعادة.. والغريب ان الحب ده.. لسة موجود عندك بعد
الجواز زي ما كان موجود قبل الجواز.. حب زي حب الحواديت
اللي بنقلها

ابتسم "حلو" مع سماعه لتلك الكلمات.. وظهرت علامات
الخلل على وجهه.. وهو يقول

- الله يكرمك يا عم حليمو.. بس للأسف الدنيا برضه تلاهي..
واحنا عندنا مشاكل طرأت على حياتنا مخليانا مش مركزين

- قصدك يعني على موضوع الخلفة؟؟؟

- ده انت فاضيلي بقي؟؟!!!

- يا ابني.. لو ركزت.. "حتعيشوا في تبات ونبات وحتخلفوا
صبيان ونبات"

- لو ركزت ازاي يعني؟؟!!! لا لا لا لا.. أنا مش مقصر.. انا
زي الفل الحمد لله.. وميت فل واربعناشر.. أنا أسد

- يا ابني مش قصدي كدة.. انا قصدي انك تركز في حبيها..
زي ما كنت بتحبيها.. لازم ترجعلها احاسيس زمان.. احساس ما
قبل الجواز.. انها مرغوبة.. انها محبوبة.. انك تكون كل اللي تتمناه
هي.. انها تكون سعيدة بس.. وعلى فكرة بقي.. انا اقدر اساعدك
ظهرت علامات الاهتمام على وجه "حلو" وهو يقول في
تساؤل

- تساعدني؟؟؟ تساعدني ازاي يا حليمو؟؟

صمت الصوت الصادر عن الكتاب لوهلة.. ثم اردف قائلاً

- شوف.. انت تقدر تقرأ القصص من قلب الكتاب..
وتشوف كل بطل من ابطال الحواديت.. وكل بطل من الابطال
دول.. يبقى ليه موهبة.. يقدر بيها يسعد اللي حواليه.. المهم
تكون انت عارف انت علوز ايه.. وأنا ممكن أساعدك في تفاصيل
الحدوتة

توترت ملامح "حلو" في شدة وهو يفكر في آخر كلمات
الكتاب العتيق

بالفعل؟؟؟ ماذا يريد؟؟؟ كيف يمكن أن يعيد لها
الاحساس والشعور القديم مرة اخرى؟؟ كيف يمكنه أن يتخطى
معها الحاجز الكبير الذي ارتفع بينهما مع مرور الأيام؟؟ خاصةً
الأخيرة منها؟

لا بد من أن يتذكر الأيام الخوالي.. وكيف كان يُدخل إلى قلبها
البهجة طوال الوقت

لا بد ان يستعيد رونقه من جديد.. ويقدم لها ما كان يقدمه
على طول الخط
يقدم لها

- "السعادة"

نطق حلو بهذه الكلمة وهو ينظر إلى الفراغ.. في الوقت
الذي تحركت فيه صفحات الكتاب بسرعة فور أن نطقها "حلو"..
ثم ما لبث "حليمو" أن نطق قائلاً

- فعلاً.. انتوا يا ابني بتتشغلوا وسط هموم الحياة
والالتزامات.. وكل واحد بيبتي يودي دور تاني خالص غير
الإهتمام بشريك حياته.. فجأة بتلاقي نفسك بتبعد وتبعد وتبعد..
لحد ما يبجي عليك يوم وتلاقي نفسك بتسأل.. مين الولية اللي
معدية من الحمام للصالة دي؟؟ انت عندك حق.. السعادة حلوة
مفيش كلام.. وأنا فتحتملك الكتاب على قسم السعادة.. ممكن

تفر في الحوادث و تشوف تقدر تستفيد منها ازاى.. السعادة حلوة.. حلوة مفيش كلام

- ايه شغل محمود عبدالعزيز في ابراهيم الابيض ده؟؟

ضحك "حليمو" ضحكة قصيرة ثم قال متابعًا

- السعادة حاجة مهمة.. طول عمري في الحواديت بدور عليها.. شوف.. خليني اقولك أنا أسهل.. أكثر واحد قدم السعادة للناس في دنيا الحواديت.. حبيبي.. ياما قضينا ايام حلوة زمان.. ياما اتفصحنا في عربيته.. و هو حاططني ورا في الشنطة.. بصراحة كان ابو الكرم كله.. وعمره ما كان بيعدي على بيت الا اما يسعد أهله.. معطاء معطاء مش تهريج

- ده بتاع اللبن.. صح؟؟؟ غريب انت يا عم حليمو.. كان بيعدي على البيوت الصبح يصب اللبن في ايكاس نايلون ويربطها وتقع منك في ارضية المطبخ.. وتنزل تلمه بسفنجة.. عارفه انا جو الشحاتين ده

- يا ابني بتاع لبن ايه بس وبتاع ايه ؟.. بُص.. انت حتخرج للعالم الحقيقي دلوقتي.. تشوف مراتك.. وتسعدها.. انت يا حلو..
حتبقى تالالجر السعاللادة

- احلف!!! معقول؟؟؟ ابوتركية؟؟؟ الله عليك يا حبيب والديك

- يا ابني ارحمني وبطل كلام شوية.. انت حتخرج دلوقتي
للعالم...

قاطعه "حلو" في سرعة..

- تقصد حثدخلي عالم الحواديت ؟ ايوة ايوة.. زي ايمان الطوخي في مسلسل الأطفال بتاع زمان ده.. عارفه انا عارفه.. فاكده.. وحفضل اغني وأقول العقل زينة.. ترالم.. وسط السفينة.. ترالم

- يا ابني ايمان الطوخي ايه بس ؟؟؟ لا.. حثخرج للعالم الطبيعي.. بشخصيتك الطبيعية اللي حثساعدك على تحقيق السعادة.. بس.. مش بنفس شكلك ده.. لازم تاخذ شكل صاحب الحدوتة.. ولازم تقدم اللي في عقلك انت.. ولازم مراتك تفتحع باللي حثقدمه من غير ما تعرف انك حلو.. لازم تفهم منها سر السعادة من وجهة نظرها اللي انت بنفسك لسة قايل أنها ناقصاكم عشان تقدر تقدمولها بنفسك لما تخرج من هنا

توترت خلجات "حلو" وهو يستمع إلى كلمات "حليمو".. وبدأت دقات قلبه في الإسراع وهو يفكر.. كيف سيفعل كل هذا؟ في الوقت الذي أكمل فيه الكتاب كلماته

- تنتهي الحدوتة مع دقات منتصف الليل زي سندريلا بالظبط

- يعني حثلبسني فستان بمبي في موف ؟؟؟ أطم ؟؟؟ حستهوى في البرد برة كدة!! الدنيا تلج يا ناس يا جبابرة.. يتمطر برة يا جدعانا

ظهرت علامات الضجر في نبرات الصوت الصادرة من
"حليمو" في قلب الكتاب وهو يقول في غضب

- بس بقى بلاش غلبة.. خليني اقول الجملة السحرية عشان
تلحق تشوف شغلك

قاطعته "حلو" في سرعة مرة أخرى قائلاً

- كلمة سحرية؟؟؟ عارفها على فكرة.. "افتح يا سمسم"
صح؟؟؟

- يا ابني بس شوية!! لا.. غلط.. مش افتح يا سمسم

- بس بس بس.. عرفتها الثانية.. "الهابرا كدابرا" بتاعة هاري
بوتر صح؟؟ شفتها في السينما من سنتين

كاد صوت "حليمو" ينفجر غضباً وهو يقول بصوت مرتفع

- حلو.. لو نطقت كلمة ثانية حاسخظك قرد

أشار "حلو" إلى الكتاب إشارة مفادها أنه سيصمت ولن
يتحدث مرة أخرى

وفجأة.. بدأت الجدران تترج من حول "حلو" وبدأت تلال
الكتب في الإهتزاز.. بينما بدى الصوت جهوراً صادراً من قلب
الكتاب وهو يرح المكان

- كل وقت.. وله حدوتة.. بس المهم.. تكون مضبوطة

وعلى الفور.. بدأت الأضواء الملونة في الظهور من جديد..
وارتفعت الأصوات المتداخلة بكل اللغات الصادرة من العدم.. و

لكن هذه المرة.. وجد "حلو" جسده يذوب ويفني.. وتتجه ذراته
إلى قلب الكتاب.. لم يشعر بأي ألم.. لم يشعر إلا بخمول طفيف..
وأخذ جسده رويدًا رويدًا يختفي مُتجهًا إلى داخل الكتاب.. وبعد
مرور دقيقة واحدة.. عاد كل شيء إلى ما كان عليه من هدوء..
إلا شيء واحد فقط

لم يكن "حلو" موجودًا في القبو.. كان قد اختفي بالكامل في
قلب صفحات الكتاب



ألوانٌ وألوانٌ وألوانٌ...

هذا ما رآه "حلو" في اللحظات التالية.. كان يطير وسط كم هائل من الألوان المتداخلة.. تحيط به أصواتٌ وكلماتٌ بعدد لا حصر له من اللغات..

لم يعد يشعر بالزمان أو المكان.. لم يعد يشعر بالاتجاهات أو يستطع حتى أن يُحدد أي شيء خلال ذلك الوقت.. وفجأة.. إختفي كل ما يحيط به في لحظة واحدة..

ووجد نفسه واقفًا في ردهة منزل خشبي ذو تصميم بسيط.. تحرك "حلو" في ترقب محاولاً التأكد من قدرته على السيطرة على تحركاته.. وفي أثناء محاولته التحرك.. لمح شيئاً ما يتحرك على الجدار الموازي له.. فارتجف في رعب وتراجع خطوات إلى الخلف في سرعة.. واستدار لينظر إلى ذلك الجسم المتحرك الذي تراجع معه في تزامن عجيب.

ولكن رعبه تحول إلى فزع حقيقي.. ظهر واضحًا في شكل صرخة طويلة رفيعة صدرت من حلقه وهو يُطالع ذلك الكائن الضخم الذي ظهر أمامه والذي اتضح سريعًا أنه ليس سوى إنعكاسة صورته في المرأة

صاعقة هوت على رأس "حلو" وهو يُطالع نفسه في المرأة من بعيد.. مما جعله يقترب منها في حذر.. مُحركًا أطرافه في حركات عشوائية.. فقط ليتأكد أن ذلك الجسد هو جسده بالفعل.. ثم ما لبث أن صرخ في لوعة قائلًا

- الله يحرقك يا حلیمو الكلب.. إيه ده؟؟ بابا نويل؟؟؟ أطم على وشي؟؟؟ قصدي أطم على كرشي؟؟؟ كل ده كرش؟؟؟ وإيه ده؟؟؟ يا مراري.. إيه الحمار ده كله؟؟ كل ده أحمر؟؟؟ وأنا اللي كنت معترض على فستان سندريلا البمبي؟!!.. أديني لابس أحدث منتجات محلات "جويا" أهو.. إلهي وانت جاهي.. يوريني فيك يوم يا "حلیمو".. أروح فين بالجوانتي ده؟؟؟ والزعبوط اللي على راسي ده؟؟ والجزمة فرو الخروف دي.. جوتشي دي؟.. أروح بيها فين الساعة دي؟؟؟؟ ده المطر حبيدها وحتشيل طين الشارع كله

ظل "حلو" ينظر إلى نفسه في المرأة فترة طويلة وهو ينظر إلى شكله الذي تغير تمامًا.. كرش ضخم.. مؤخرة كبيرة للغاية.. جسد مترهل.

لم يقطع نظراته إلى المرأة إلا دقائق الساعة التي أشارت إلى الخامسة صباحًا مع إنبعاث أول شعاع للشمس في الأفق ظهر من نافذة المنزل.. مما جعله يقول في تلقائية.

- يا فتاح يا عليم يا رزاق يا كريم.. ايه ده؟؟ ايه اللي انا بقوله ده؟؟؟ بابا نويل ايه اللي حيقول يا فتاح يا عليم يا رزاق يا كريم...؟؟؟ ده بابا نويل ولا واقف على مكنة عجينة الطعمية اللي على أول الشارع عندنا؟؟

بدأ "حلو" في البحث حوله.. عما يشير إلى مكانه.. ولكنه لم يستطع التعرف على هذا المكان أبدًا.

توجه إلى باب المنزل الخشبي.. وفتحه لتصطدم به برودة الجو القارصة.. ومساحة من الثلوج تمتد امتداد البصر.. وإلى جانب المنزل.. كان يقبع الشيء الأكثر غرابة الذي رآه في حياته. عربة "بابا نويل" التي تجرها ست أزواج من حيوانات الرنة الثلجية.. وقد امتلئت مؤخرة العربة بعشرات وعشرات من الهدايا المغلفة والألعاب الملونة.

فكر "حلو" للحظات.. ثم ما لبث أن استجمع شجاعته.. وأغلق باب المنزل مُتجهًا إلى العربة الخشبية الجميلة.. وركب فوق مقدمتها مُتخذًا مكان السائق.. قائلاً بصوت عالٍ.. مخاطبًا الفراغ. - طبعًا أنا مش عارف أنا بعمل ايه هنا؟؟ بس أنا عاوز أروح مصر.. ودوني القاهرة.. كايرو معاك لو سمحت.. وبليز..

بلاش محور.. ولا دائري بليز.. ولا أكتوبر.. وشغل العداد..
وحراضيك برضه في الآخر.

وكان حيوانات الرنة الجميلة قد فهمت تمامًا ما يقوله "حلو" في شكله الجديد.. فبدأت في التحرك فورًا.. زاحفة فوق الثلوج.. وأخذت سرعتها تزداد شيئًا فشيئًا.. حتى وصلت إلى سرعة كبيرة بدأت معها العربة في الارتفاع.. والطيران في الهواء.. وهنا بدأ "حلو" يرتجف رعبًا مُحدثًا نفسه داخل عقله

"ايوة.. صح كدة.. بابا نويل كان بيطير بالعريّة.. ربنا يستر ومايكونش مصيرها نفس مصير طيارات مصر للطيران.. أنا بقى لازم اسبُك الدور على حيوانات الرنة دي لتستفرد بيا وتمرمطني..
أيوة.. بابا نويل الحقيقي كان يقول ايه في الحواديت؟؟.. كان يقول ايه يا حلو؟؟؟ ايوة.. ايوة افنكرت"

تنح "حلو" استعدادًا للصيحة.. أخذ نفسًا عميقًا.. ثم قال بكل ثقة.. بصوت جهور

- یا خراباااااااااااااااااااااااای

وترددت صرخته مرارًا وتكرارًا.. وهو يبتعد في الأفق.. تاركًا
صدى الصوت يكرر عباراته.. وأخذ يبتعد
ويبتعد

* * * * *

كانت عقارب الساعة تشير إلى الساعة صباحًا.. في الوقت الذي افتتح فيه باب شقة "حلو" ودلفت من خلاله "سعادة" بوجه مبتسم بشوش

حاملةً في يدها ذات الحقيقة التي خرجت بها من خلاله منذ
ليلتين مضتتا

لم تلبث أن وضعت الحقيبة بجانب الباب.. واغلقتة وراءها في هدوء.. ثم اتجهت إلى غرفة النوم.. لتبحث عن "حلو" ولكنها وقفت فجأة أمام باب الغرفة حين وجدتها خالية

استدارت "سعادة" بسرعة لتلقي نظرة على باب الحمام لتجده مفتوحًا كدليل على أن "حلو" ليس بالداخل وقتت "سعادة" للحظات.. ثم قالت مخاطبةً نفسها في صوت منخفض

[illegible]

- يا ترى قضى الليلة دي لوحده ازاى؟؟؟ دي الشقة زي ما سبتها بالضبط.. شكله ما دخلش المطبخ شرب كوباية مية حتى.. انتى وحشة يا سعادة.. انتى جزمة قديمة.

جلست على الكرسي المواجه للباب.. وظلت تفكر قليلاً..
ثم ما لبثت أن نهضت مرةً أخرى بعد برهة قصيرة وهي تقول
- أنا كمان ساعتين ثلاثة كدة.. أكون خلصت شوية شغل
في البيت.. وأنزل السوق بقى.. اشتري شوية حاجات.. وأعمله
أكلة حلوة من الحاجات اللي بيعها حبيبي.. اخص عليكى يا
سعاااادة.. اخص عليكى

واتجهت إلى المطبخ وبدأت في عاداتها اليومية بمطاردة بعض الحشرات الزاحفة التي دفعها قدرها الأسود للخروج في تلك اللحظة ظناً منها أن البيت قد خلا من ساكنيه

ظلت تطاردها في تؤدة وهي تفكر.. كيف مضى ليلته الأولى بدونها؟؟!

ولكنها لم تعلم ابداً أن ليلته السابقة كانت حافلة بكل أنواع
الإثارة...
وأكثرها دهشة...

* * * * *

ظهر نهر النيل مع ظهور أشعة الشمس التي بدأت اشعتها
تنعكس على سطحه.. لتحول لون النهر إلى لون ذهبي...وتداعب
عيون الطيور في السماء

وعينا "حلو" أيضًا.. الذي كانت العربّة تسير به بسرعة رهيبة طوال ما يزيد عن ثلاث ساعات من الزمن في ذلك البرد القارس.. وعلى ذلك الارتفاع الشاهق.. مما جعله يقول في إرهاق - خلاص.. مترين كمان وحرّجّع في شنطة العربية.. كان لزمّتها إيه أم الخمضة دي يا حلیمو إلهی تهد.. مكانش ينفع تحدفني في حتة قرية.. لازم رحلة السفر دي كلها؟؟ وشي تمّل من البرد والتلج.. مش حاسس بمناخيري خلاص.. حاسس اني بقيت عبارة عن زعبوط ونازل منه عينين.. ولا الدقن دي عامله حاجة.. متقلّة وشی والسلام.

تباطأت سرعة العربة التي نجرها "الرنة".. وبدأت في الهبوط واقتربت من سطح الأرض في سرعة بينما بدأ "حلو" ينظر حوله قائلاً

- ايه ده؟؟؟ ايه ده؟؟ مش هنا يا جدعان.. دي رمسيس
دي.. أنا ساكن في المعادي يا.. يا.. يا بهاءااايم.. مش هنا
واصلت حيوانات الرنة الهبوط.. حتى استقرت على الأرض
في قلب ميدان رمسيس في تمام الساعة التاسعة صباحًا
في وقت الجحيم..

"اتحرررك يا اناااا بحجججججججججج"

قالها أحد سائقي السيارات الملاكي.

"طول ما البلد فيها عريجية زيكم مش حنفلح ولا حنشوف
خير ابداً.. اتحرك يا حيوان"

قالها أحد سائقي الأجرة..

"خش عجلة يا برنس عشان لو العجلة إتحككت حانزل اعمل معاك السليمة"

صاح بها أحد سائقي السرفيس...

"إيه اللي انت لابسه ده يا راجل يا مُهزاً"

قالتها عجوز شمطاء مُسنة كانت تعبر الطريق مرتكزة على عصاً خشبية

"ما تيجي"

قالها أحد المخبولين المجاذيب الذين تبدوا على هيتئتهم الجنون بشعر طويل ووجه متسخ وهو مرتكنٌ إلى أحد أسوار الميدان الحديدية..

وبين صرخات هذا وذاك.. وقف "حلو" فوق ظهر العربة منتصباً لا يدري ماذا يفعل.. ثم قال مخاطباً حيوانات الرنة

- عاجبكم كدة؟؟؟ انا قلت كدة؟؟؟ حسبي الله فيكم.. دا احنا حتى لو حيننا تننيل نطير تاني مش حنعرف من الزحمة إلهي يوعدكم بدب قطبي يطلع مصارينكم في ايده.. أعمل ايه أنا الساعة دي؟؟؟ ده وقت انفجار ميدان رمسيس يا كفرة.. طب كنا نزلنا على الكورنيش.. لما انتوا ما بتعرفوش تحصنوا؟ بتسووووقوووا لبييه؟؟!

بدأت أبواق السيارات ترتفع في إحتداد بينما "حلو" يحاول مخاطبة الجميع معتذراً وهو في زي الإحتفال الرسمي ويحاول إمتصاص غضبهم بلا جدوى.. ولم يجد في النهاية مفرًا من الإمساك بلجام حيوانات الرنة.. ثم محاولة البدء في تحريك العربة التي توسطت ميدان رمسيس وسط أبواق السيارات المعترضة بلا توقف

وبدأ في شد اللجام قائلاً

[illegible]

وبالفعل.. بدأت حيوانات الرنة في الاستجابة وجذب العربة والتحرك بها.. والابتعاد شيئًا فشيئًا عن قلب الميدان حيث شيعه المارة بفاصل من السباب واللعان طالت أبعد جذور عائلته.. فقال "حلو" لحيوانات الرنة

- عاجبكم قلة القيمة دي؟؟؟ ينفع كدة؟؟ كل الشتيمة دي بسببكم.. ولسة.. حنسمع قدها خمسين مرة واحنا رايعين لحد المعادي.. الله ينتقم منك يا حليمو.. إلهي تشوف الذل اللي أنا شوفته.. يوعدك بشوية عيال صغيرة تقطع صفحاتك و تعملها دبابير بقتلة من اللى لسة حشوفه.

وبدأ "حلو" في السير بالعربة.. متخذًا طريقه نحو المعادي..
وسط آلاف مؤلفة من السيارات التي امتلئت بها شوارع القاهرة

في هذا الوقت المزدهر من اليوم.. وبين الحين والآخر.. كان يطلق
صيحته لضمان استمرار حيوانات الرنة في السير
- يا خر|||||||بابا|||||||اي

* * * * *

قاربت الساعة على الواحدة ظهرًا.. في الوقت الذي ظهرت فيه عربة "حلو" التي تجرها حيوانات الرنة وهي في حالة يرثى لها من أثار الطين الذي ملأ الشوارع في هذا الوقت من العام نتيجة الأمطار الغزيرة

ظهرت العربية تسير وسط شوارع المعادي الهادئة وقد خلت
مؤخرتها من الهدايا والألعاب التي كانت تمتلئ بها عن آخرها
كان "حلو" في حالة إنهاك.. ظهر من خلال نبذة صوته وهو
يخاطب حيوانات الرنة للمرة الألف هذا اليوم

- سووووقوووا.. سووووقوووا.. عشان تحرموووا.. فاكين
نفسكم في ستوكهلم منك له؟؟؟ سووووقوووا.. تستاهلوا الي
جرالكم.. حتى الهدايا.. العيال بتاعة المدارس الي ناطة من فوق
السور قلبتها.. الحمد لله انهم سابولي الزعبوط

وفي أثناء مروره.. واقتربه من المنزل شيئاً فشيئاً.. رأى ما جعل قلبه يرقص فرحاً.. رأى أمامه الإنسانة الوحيدة التي يريد رؤيتها الآن

الهادئ الخالي من المارة تمامًا كعادة معظم شوارع حي المعادي..
وحين اقترب منها قال لها في شاعرية بصوت "بابا نويل"

- اقدر اساعدك يا مدام؟؟؟

انتفضت "سعادة" وكأن صاعقة من السماء قد ضربتها حيث
لم تشعر باقترابه مما أدى إلى سقوط بعض أكياس الخضروات
من يدها وتبعثر محتوياتها مما دفع "حلو" إلى الانقضاض على
محتويات الأكياس المبعثرة سريعًا مُنحنيًا جاثيًا على ركبتيه مُحاولًا
انقاذ ما يمكن انقاذه وهو يقول

- يا دي السباخ.. قُطعت.. وقُطع سيريتها

بينما وقفت "سعادة" متحفزة وهي تراقب ذلك المهرج ذو
الرداء الأحمر الذي افترش الأرض بجسده المترهل ولحيته البيضاء
التي شابتها علامات الإلتساخ بفعل السير في الشوارع وسط
الأتربة منذ الصباح.. وهو يعيد تعبئة ثمار الخضروات داخل
الأكياس مرة أخرى وينهض ليمد لها يده بها وهو يعطيها أفضل
ابتساماته ويقول

- الحمد لله.. لميتلك كل الحاجة.. بس افتكسر السباخ حتتري..

مش حتتنفع.. ارميها أحسن

لم تنطق "سعادة" وهي تمد يدها في حذر لتأخذ منه أكياس
الخضروات في توجس.. مما جعله يحاول كسر حالة السكون بقوله
- تحبي أوصلك بالحاجات دي لحد البيت؟ شكلها ثقيل

عليكي

هنا فقط.. تحولت "سعادة" إلى كائن مفترس.. تغيرت
ملامح وجهها وارتفع صوتها حتى كاد "حلو" يقسم ان هذا ليس
صوت زوجته وهي تصرخ كالمجنونة في وجهه

- بيت إيه يا راجل يا واطي يا مُهزأ الي عاوز توصلني
ليه ؟ انت فاكِر عشان واحدة ست ماشية في الشارع لوحدي
حتستفرد بيا ؟ لاااااا.. دا أنا حفرج عليك أمة لا إله الا الله يا
راجل يا مُهزأ... انتوا جنس ملتكم إيه ؟ ؟ مفيش عندكم دم ولا حيا
ابداً ؟ ايه السفالة دي ؟! يا شاااايب يا عاااايب

ومع استقرار "سعادة" في وصلة الرشح اللا متتية.. ظهر
الناس من كل صوب وحذب وكأن الأرض قد انشقت عنهم أو
كأنهم بزغوا من الفراغ.. وتحول الشارع الهادئ إلى نقطة جذب
كالمغناطيس لكل مخلوق حي في محيط كيلومتر مربع.

حاول "حلو" إظهار أداب الحوار وإظهار أي نوع من أنواع
التحضر والرُقي.. ولكن محاولاته جميعاً ذهبت أدراج الرياح أمام
تجمهر الناس من حوله وتداخلهم في الحوار بكل الطرق المشروعة
والغير مشروعة

"ايه الي انت لابسه ده يا حج ؟ انت مجنون يا حج ؟"

قالها أحد المتجمهرين

"في من اللبس ده رجالي يا اسطى ؟"

قالها آخر...

"مش عيب عليك وانت راجل كبير وتعاكس واحدة اد بنتك وانت لابس اللبس ده؟ انت عارف احنا حنعمل فيك ايه دلوقتي؟"

قالها ثالث..

"يخبيك يا دي الرجل.. شوفي يا بت يا فاتشن الرجل
الشايب العايب لابس إيه وعامل في نفسه ايه؟ يا عيب الشوم
على الرجالة"

قاتلها امرأة عجوز إلى ربيعة طريقها المتشحة بالسواد.

ووسط ارتفاع هممة المتجهرين وسخطهم.. ظهر آخر ما
 يتنى "حلو" ظهوره في هذا التوقيت.

ضابط شرطه...

شق جموع المتجمهرين.. وهو يصيح

- وسع يا جدع انت وهو.. إيه؟؟ في إيه؟؟

تطوع عشرات من المتجهمرين في وصف ما حدث بسرعة
رهية...

"يا باشا كان ماسكها بييوسها بالعافية وخلصناها من ايده المتوحش"

قالها شخص ما...

"يا باشا خطف شنطة فلوسها وحصلناه في الشارع هنا
واخذنا منه الشنطة"

تطوع شاب ما لوصف تلك الفعلة البطولية...

"يا باشا ده ماشي وراها من الكورنيش لهننا بالعربية وعمال
يكلكسلها عشان تركب معاه والست محترمة وفي الاخر نزل من
العربية ومد ايده عليها وشدها من الجيبة"

قالها سايس يعمل في القرب من المكان.. وهنا انعقد حاجبي
الضابط.. وهو ينظر إلى "حلو" الذي افقدته كمية الأكاذيب
والخيالات قدرته على النطق وقال له بلهجة حادة

- يا سواد ليل ابوك.. بطاقتك فين يا ض ؟ ؟

امتدت يد "حلو" تتحسس ملابسه التي خلت من الجيوب
تمامًا وهو يبحث عن الفراغ في إشارة منه أنه لا يحمل أي اثبات
شخصية وعاود النظر إلى الضابط في ابتسامة بلهاء بلا كلمة
واحدة.. وهو الأمر الذي استوعبه الضابط على الفور.. فقال
في حدة..

- كمان مش شايل بطاقة ؟ ؟ ؟ الله.. لأ يجد الله على الإبداع..
أنا مش عارف حأعمل فيك إيه بصراحة.

هنا بدأت علامات الفزع تظهر على وجه "حلو" وهو يقول
للضابط

- سعادتك في سوء تفاهم.. الحكاية كلها وما فيها إني كنت
عاوز اسـ...

قاطع الضابط في عنف...

- انت تحتكيلي حواديت؟؟؟ إخرس.. دا انا حارب
بيتك.. ماشي من غير بطاقة.. وكمان متحرش؟!
ثم إلتفت إلى "سعادة" وهو يتمالك نفسه مُتحدثاً إليها بهدوء
قائلاً

- ممكن بطاقتك لو سمحتي اطع عليها؟
استجابت "سعادة" بسرعة إلى طلب الضابط واخرجت
بطاقتها الشخصية التي نظر إليها الضابط سريعاً.. ثم أعادها إليها
وهو يقول
- معلىش.. حنحتاج نعمل محضر.. عشان الحيوان ده.. انا
النيق "عمار محمد" من قسم المعادي
توتر "حلو" وهو يستمع إلى "سعادة" وهي تقول...
- أه يا ريت نعمله محضر يا باشا.. وتجبسوه.. كفاية القرف
الي في الشوارع.. إحنا مش ناقصين قرف بصراحة
- اطمني حضرتك.. احنا حنعرفه شغله.. حنحتاج منك بس
زيارة للقسم عشان نقفل المحضر على الساعة تسعة ليل.. مجرد
امضاء بسيط واحنا حنضبط المحضر
استدار الضابط "عمار" وسط الجموع المحتشدة وامتدت
يده لتمسك بتلايب ملابس "حلو" الحمراء.. وهو يقول
- وكمان لابس أحمر.. إيه الحلاوة دي؟ إيه العظمة اللي
انت فيها دي؟؟ دا احنا يومنا زي الفل ان شاء الله.. دا انا
حوريك أيام

ارتعدت فرائص "حلو" وهو يسير إلى جانب الضابط
ولا يقوى على الرفض ولا نهشته المجموع المحيطة.. وما هي إلا
خطوتان فقط وتذكر "حلو" العربة.. حيوانات الرنة.. وسيلة
عودته.. توقف وهو يقول للضابط

- حضرتك بس.. ممكن بس العربة.. عشان ما ينفعش
نسيبها مركونة هنا.

وأشار إلى العربة التي أحاط بها العديد من الناس وارتكنوا
إليها وهم يتابعون المشهد منذ البداية.. مما دفع الضابط "عمار"
إلى القول في دهشة

- وكم ان كارو؟؟ الله.. الله.. تصدق بالله؟؟ انا ارتحتك و
قلبي افتحتك.. أنا حاسس ان اليوم انهاردة خلاص كدة.. مش
محتاج حاجة تاني.. فين يارض رخص الكارو؟؟
- رخص ايه حضرتك؟؟

- رخص الكارو يارض؟؟ ولا كمان مفيش رخص؟؟ والنبي
تقول مفيش؟؟ وحياتة أبوك ما يبقى ليها رخص يا شيخ
- لا حضرتك عشان الحلفان.. هي ملهاش رخص بصراحة..
يا رب تكون انبسطت

- الله عليك.. الله عليك يا حبيب والديك

- بس حضرتك دي مش كارو أصلاً!!

- أو مال دي ايه ان شاء الله؟؟؟

- دي زلاجة سعادتك

- يا عيني؟؟ يااا عيني.. تلاجة؟؟؟ وانت راكب التلاجة
وماشي بيها في الشارع كدة؟؟؟ طب ده حتى الجو برد لوحده
مش محتاج تلاجات.. مش خايف تستهوي يا حبيبي؟

- يا باشا بقولك زلاجة.. زلاجة

انقلبت سحنة الضابط في عنف وهو يصرخ

- اخرس يا حيوان.. وكم انتناشر حمار؟؟ انتناشر حمار؟؟؟ في ايه بالضبط؟؟ انت سارق الحمير دي يا ض؟
- يا فندم دي مش حمير والمصحف!!

- انت حتستعماني يا روح أمك؟ بتستهزأ بيا قصاد الناس؟
او مال دول ايه؟ زحالف؟

- يا فندم دول حيوانات رنة ثلجية.. مش حمير سعادتك

- اخرس بدل ما اهزقك.. انت راجل كبير ما تجيش لنفسك الضرب قصاد الناس.. قال رنة قال.. اخرس بدل ما ارنك أنا قلم يفوقك من الي انت فيه.. انت ضارب ايه بالظبط؟

- بص أنا حفهم سعادتك الحكاية.. بس بعيد عن الناس الله يكرمك.. ومفيش داعى للقسم ده خالص.. إلهى يستر عرضك

تحرك الضابط "عمار" وهو مُمسكاً بملابس "حلو" إلى جانب الطريق وظهرت على ملامحه علامات الاهتمام وهو يقول - طب قول كدة.. فهمنى وتعالى معايا دوغري

- بص حضرتك.. الموضوع بسيط.. أنا بابا نويل وكنت جاي اشوف مدام سعادة عشان هي محتاجة السعادة.. والعربية دي أنا جاي بيها من القطب الشمالي وكان المفروض انزل بيها المعادي على طول بس للأسف نزلت بيها غلط في رمسيس.. تقريباً شخنها خلص.. وقعدت ساعة أدور ملقتهاش مدخل يو إس بي اشخنها منه سعادتك.. ومعايش حتى شاحن ولاعة عربية.. وانتض...

قاطعہ الضابط "عمار" في غضب هادر وصوته يكاد يسقط
وريقات الشجر من فوق فروعها

- اخذ خنجر رررس.. انت بتستعبط يا روح أمك.. دا انا حافخك.. ان ما لفتك محافظات مصر كلها.. ما ابقاش أنا عمار وأشار في عنف إلى اثنان من العساكر المرافقين له.. قائلاً
في عنف

- شوفولي الكارو دي فيها ايه؟؟ مخبي ايه الحيوان ده ومخليه عمّال يستعيط؟؟

اتجهت عساكر الشرطة في زيهم الأسود إلى العربات حاملين اسلحتهم.. وبدأوا في تفتيشها.. حتى انتهوا وقال أحدهم - يا باشا مفهياش غير شوية مسدسات.. وسوارىخ بس

انقلبت سحنة الضابط "عمار" في عنف وهو ينظر إلى
"حلو" قائلاً

- يا نهار ابوك اسود ومنيل بنيلة سودة؟؟؟! مسدسات
وسوارخ؟؟؟! في وسط الشارع كدة عادى؟؟!!

- يا باشا ورب الكعبة دي لعب.. هدايا

- يا حلاوة يا ولاد.. مسدسات وسوارخ وماشي بيهم في
الشارع عادي كدة؟؟؟

- يا باشا والمصحف تاني.. لعب.. لعب

- ودقنك دي؟؟؟ لعب برضه؟؟؟ انت اخوان ياض ولا
سلفي؟؟ ولا قاعدة ولا حكايتك ايه؟!

- يا باشا أنا مسيحي أساسًا.. فيه بابا نويل سلفي؟؟!!

- انت إن شاء الله حتشوف معانا أيام زي الفل.. كدة
خلاص.. قضيت كدة انهارة.. احنا بقى نرجع على القسم نقضي
وقت لطيف مع بعض.. وتنسلى.. انا حاسس اني حاخذ ترقية
استثنائية بسببك والله.. نهارك اسود ان شاء الله

ثم صرخ في العساكر المرافقين له بجدة

- هاتووووه على البوكس ولموا الاقماع من الطريق وتعالوا
ورايا

انقض العساكر على "حلو" وسحبوه كما تُسحب النعاج بينما
هو يصرخ في صوت رفيع مُكرراً

- انا باباااا نويبيل.. انا باباا نويبيل.. انا باباا نويبيل

ومن أمامه تقدم الضابط "عمار" إلى سيارة الشرطة وهو يرد دون أن يلتفت إليه قائلاً بصوت جهور

- وأنا حوس حوس يا لالا

~~~~~

وانطلقت السيارة بعد أن تكوم بداخلها "حلو" بجسده  
السمين مُتجهَةً إلى قسم الشرطة.. ومن خلفه جموع المشيعين  
الذين انفضوا من حول "سعادة" وتركوها وحيدة مرة أخرى وهي  
تشاهد سيارة الشرطة تتعدّد.. وقلبها مُقتضب.. وشعور داخلي  
غريب يُلح عليها بشدة.. شعور بأنها قد قابلت هذا الشخص  
سابقاً.. أو أنها تعرفه قبلاً

تعرفه بشكل غريب وقريب

\* \* \* \* \*

كانت عقارب الساعة تقترب من التاسعة مساءً حين دخلت "سعادة" إلى رواق القسم تتقدمها أمها التي كانت في حالة مزاجية عكرة، وصوتها ينم عن غضب شديد وهي تخاطب زوجها "سعادة" بصوت عالٍ غير مبالية بالعابرين في رواق القسم قائلةً - ما هي لو كان ليها راجل أنيها مكانش حصلها الي حصلها، إنما حقول إيه؟ شُرابة خُرج ولا ليه لازمة ولا فيه منه أمل، بليتونا بيه إن كان إنت ولا بنتك

اقتضبت "سعادة" وهي تتلفت حولها لتطالع نظرات الناس  
من حولها ثم اقتربت من أمها في حدة قائلة

- يا ماما لو سمحت، لو سمحت يا ماما قتلتك مليون مرة  
ما تتكلميش عن حلو بالطريقة دي

نظرت لها الأم في عدم اكتراث ثم تابعت

- مش كنتي كلمتي سبع البرومة يجي معاكي القسم طالما  
محموقة عليه قوي كدة؟ ولا فالحة بس تدافعي عنه ووقت  
المصايب ما تلاقهوش؟

احمر وجه "سعادة" غضبًا وهي تقول

- أنا اسفة يا ماما، دي آخر مرة اقولكم على حاجة وحأبقى  
بعد كدة أتصرف لوحدي، هو في الشغل وتأخر شوية على  
غير العادة، أنا حتى ساينة الأكل متحضر على السفرة وكنت  
مستنياه، آخر مرة يا ماما.. آخر مرة.

ربت الأب على كتف "سعادة" وهو يقول لها في حنان

- بالهداوة يا بنتي، امك ما تقصدش اللي بتقوله

توقفت الأم دفعة واحدة وهي تلتفت إلى الأب في شراسة مما  
جعله يتوقف هو الآخر وقالت

- لا.. أقصد طبعًا، انت حثقولي على مزاجك؟ مش كفاية  
مجوزها على مزاجك وطاوعتها في جواز المنكوب على عينه؟ أنا  
قاصدة.. قاصصصصصة

لم ينطق الأب الذي شعر أن الأم على حافة الانفجار، و استكمل الجميع السير حتى وصلوا إلى مكتب الضابط "عمار" بعد السؤال عن مكانه وما أن دلفوا إلى الداخل حتى استقبلها الضابط في ترحاب بعد أن تذكر "سعادة" قائلاً

- اهلاً وسهلاً استاذة سعادة اسمك مميز ما يتنسّيش، اهلاً وسهلاً يا حاجة، اتفضل يا حج، متأسفين جداً اننا نزلناكم في الجو ده بس معلىش بقى محتاجين نخلص اجراءات المحضر وعلى العموم المحضر جاهز أهو وعلى الإمضاء بس، وبرضه حنستأذنك محتاج أبعت أجيّب الراجل المهزأ عشان قرفنا طول النهار ولازم يمضي هو كمان على المحضر.

توترت "سعادة" وهي تجيب الضابط

- أنا اللي متشكرة لأهتمام حضرتك، ويا ريت نخلص بسرعة ونمشي لإني مش عاوزة اقعد كثير  
- لا أبداً.. ثواني ونخلص

وامتدت يده لتضغط زرّاً فوق المكتب دخل على اثر الصوت الصادر عنه في الخارج أحد المخبرين الأشداء وهو يؤدي التحية العسكرية ليأمره الضابط "عمار" قائلاً

- هاتلي الراجل المجنون اللي لابس احمر من الحجز بسرعة

أدى المخبر التحية وأنصرف لتنفيذ الأمر وما هي إلا لحظات حتى عاد وبصحبه "حلو" الذي بدت على ملامحه الإجهاد وتمزقت اجزاء من ملابسه وفور أن رأى "سعادة" ارتسمت على

ملاحه ابتسامة عريضة ووقف ينظر لها بهيام مما دفع الأم إلى الصراخ فيه

- إيببييه؟ في إيه يا راجل انت؟

قال "حلو" في صوت منخفض وكأنه يحدث نفسه

- إتي جيتي؟ ان شالله تنطسي رصاصة غلط

تدخل الضابط "عمار" وهو يقول مخاطبًا "حلو" في احتداد

- انت بتقول إيه يا حيوان انت؟ مش كفاية الجنان اللي

عاملهولنا في الحجز جوة وسط المساجين

- يا باشا حرام عليك.. دول مرمطوني وبهدلوني.. مجرد محاولة

حفاظي على الـ.. الـ.. الزعبوط كانت محتاجة معجزة جوة.. السفلة

- اخرس بقولك

- معلش حضرتك بس أنا محتاج اسأل على الزلاجة اللي

كانت معايا.. ودتوها فين؟ حيوانات الرنة ما اكلتش من صباحية

ربنا اتقوا الله

- تاني؟ تلاجة؟ ورثة؟ و كلام فارغ؟ تاني؟ يعني لسة ما

اتريتش برضه؟

- إلهي يسترك إرحمني.. ريحني بس.. العربية فين؟ الحمير

فييين طيب؟!

- موجودين برة وفكناهم منها وأكلناهم

- فكتوهم منها؟؟ ما طاروش منك طيب!!

- هما ايه دول اللي طاروا؟

- الحمير سعادتك

- الحمير بتطير؟! وانت راكب التلاجة؟ لا لا.. انت زي الفل الحمدلله.. و الامور دي ما تخشش عليا أنا.. بعدين ليناكلام ثاني بعد ما نخلص المحضر.. حقوق لك بقى.. إمضي على المحضر ده وخلصنا

- أنا مش حمضي على حاجة حضرتك.. أنا معملتش حاجة..  
حتى ممكن تسأل الاستاذة سعادة  
قاطعته الأم بسرعة قائلة في حدة

- وانت عرفت إسمها منين بقى إن شاء الله؟

توتر "حلو" مع هذا الخطأ الذي صدر عنه ولم يجد ما يجب  
به مما دفع الأم إلى الصراخ

- ده شكله مجرم يا حضرة الضابط ولازم تعدموه.. ده شكله  
يبراقب البت بقاله فترة وخصوصًا ان المعدل جوزها مش فاضيلنا  
صاحت "سعادة" في حدة معترضة

- ماما!!!!!!

وانقلبت سحنة "حلو" في غضب وهو يقول

- مش فاضيلكم ليه يا ترى؟ أكيد إنتي قاعدة معاهم في  
البيت وهو طفشان بسبك.. شكله مش يحب يتابع حلقات  
سيد قشطة بتاعة انيال بلانيت





- يا بنتي هو انتِ زعلانة مع جوزك ؟  
هبت الأم واقفة مرة أخرى قائلة في هياج  
- وانت مااااا أمك ؟؟؟؟!

صرخ الضابط

- وبعد يyyyyyyyyyyyyyyين

أكل "حلو" مُوجِّهاً كلماته إلى "سعادة"

- يمكن يا بنتي ما بقتيش سعيدة معاه ومحتاجة منه حاجة  
يجيبالك أو حاجة يعملالك أو حتى كلمة كان بيقولها وبطل  
يقولها؟

نظرت له "سعادة" في توجس ثم قالت في حذر

- مع أني ما اعرفكش ولا اعرف أنت مالك ومال الموضوع  
ده.. بس لازم تفهم أن الست مننا مش مستنية هدية ولا موقف  
ولا كلمة عشان تبقى عايشة في سعادة.. كفاية قوي قوي من  
الراجل انه يضحك في وشها لما يشوفها.. كفاية إنه يبقى فعلاً  
سعيد عشان تحس هي كمان بالسعادة في بيتها.. كفاية إنها تبقى  
عارفة إنها محور حياته وإنها أهم حاجة عنده بجد عشان تكون  
سعيدة.. عمر الهدايا ولا الحركات ولا الكلام ما حققوا السعادة  
من القلب لأسرة

وقف "حلو" مشدوهاً بكلمات "سعادة" وهو ينظر لها  
مستمعاً.. ثم ما لبث أن قال لها في تساؤل

- وجوزك يا بنتي مكانش محسسك إنك محور حياتك؟!  
أطرقت "سعادة" رأسها في حزن وهي تقول في صوت  
خافت  
- كان

شعر "حلو" بغصة في حلقه بينما انتفضت أم "سعادة" قائلة  
في حدة

- انت حتملنا مُصلح اجتماعي يا مجرم انت؟ إنت مالك  
ومالنا.. الراجل ده لازم يتعدم يا حضرة الضابط  
هب الضابط "عمار" من مجلسه مرة أخرى وهو يوجه  
كلامه إلى "حلو" مُحتدًا

- بقولك إيه يا راجل يا مجنون أنت.. خلصني وأمضي على  
المحضر عشان اخلص من الهم ده.. أنا مش فاضي للجنان ده  
منك ولا منها

نظر له "حلو" قائلاً في تحدي

- مش ماضي على حاجة

تصاعدت الدماء إلى وجه الضابط "عمار" وهو يقول

- وماله.. لينا صرفة إحنا مع بعض

وامتدت يده لتضغط الزر فوق المكتب ويدخل على اثره  
مخبران ليقول لهما الضابط "عمار"

- خدوه عشوه بقي عشان جعان



- ها يا روح أمك؟.. مش عاوز تقول انت مين وتبع مين؟؟ سييك من موضوع محضر التحرش ده عشان ده مش مزاجي خالص.. دي حاجة كدة بنعملها عشان نرضي السادة المواطنين في الشارع.. خرينا في المهم الي حيجيلي الترقية.. طيب.. المسدسات وطلعت بلاستيك.. إنما حجم وتصميم طبيعي وشكلك عاوز تستعملها لترويع المواطنين الأمنين.. أدي أول تهمة.. والسواريح.. حتستعملها في إحداث حالة من الهرج والمرج والبليلة وتعتبر في مقام قنابل صوتية.. أدي تهمة تانية.. الدقن ثابتة.. ومفيش بطاقة.. قولنا بقى على اسمك عشان نقفل المحضر خرينا نخلص.. وسييك من موضوع بابا نويل ده عشان مرارتي مش مستحيلة.. عمومًا أنا مش مروح.. نباطشي لحد بكرة زي دلوقتي.. وكون سعيد جدًا جدًا جدًا اني امرطك لو ما خلصتناش

رد "حلو" بصوت يكاد لا يقوى على الخروج

- تمرطني؟؟ ده على أساس انكم بتعملولي تاي مساج من الصبح مثلاً؟؟؟ حضرتك أنا خسيت اربعين كيلو من الضرب حضرتك.. ارحم حتى البشوات الي بيضربوني.. ايديهم ورمت من الضرب والاقلام والشلاليت.

ترك الضابط هاتفه المحمول.. ورفع رأسه إلى "حلو" مُبتسمًا وهو يقوم من مجلسه ويقول في تشفٍ واضح

- ضرب؟؟ ضرب إيه لا سمح الله؟؟ انت جي مضروب جاهز.. احنا حتى خلصناك من إيد الناس الي كانت عاوزة

تفتك بيك في الشارع لولا تدخل قوات الشرطة العقلاء - اللي  
هما احنا طبعًا - وحافظنا على روحك من الهلاك.. شوف  
الرحمة

- لا يا راجل؟؟

- او مال؟؟!!! والضرب اللي بتقول عليه ده.. لسة حتشوفه  
أما نوديك المكان إياه.. المكان اللي بنبت فيه الناس اللي ما  
بترجعش ثاني.. حبيب قلبي.. دا انت بالأحمر ده حتبقى صيدة  
هناك من أول ما تدخل.. دول ما شافوش لون غير الاسود من  
يجي سننتين

ظهرت علامات الرعب على وجه "حلو".. أعقبه اندفاع  
الضابط نحوه مُمسكًا بوجهه وذقنه وهو يقول في عنف

- انطق قول انت مين يا روح أمك وبلاش شغل المجانين ده  
بدل ما أطلع البلا الأزرق على جتتك.. انطق

انهار "حلو" من شدة العنف حيث بدأ المخبران المجاوران له  
الإستعداد لمواصلة الضرب مرة أخرى في انتظار إشارة الضابط..  
وقال في صوت يقترب من البكاء

- انا حقول على كل حاجة.. الرحمة.. خلاص مش قادر..  
أنا حقول حقول

وقف الضابط وشد قامته في فخر.. وهو يُعدّل من هندامه  
ويقول

- انطق.. عشان لو قلت كل حاجة حترم نفسك.. وانا  
كمان أوعدك أساعدك

نظر له "حلو" في لا مبالاة.. وهو يقول

- بصراحة.. حضرتك.. انا.. مش بابا نويل

- وأنا كمان مش دراكولا.. انما صدقني.. حشرب من دمك  
لو ما نطقتش... انطق خلصني بقول

- حضرتك.. أنا.. أنا.. أنا اسمي حلو

تراجع الضابط ليستند إلى طرف مكتبه.. وهو يقول

- كويس.. حلو.. ومالو.. اسمك إيه بقى ؟ ؟

- ما أنا بقول لحضرتك أهو.. اسمي حلو

- وبعدين بقى في الليلة الزفت دي ؟ ؟ ؟ عرفنا إن زفت  
إسمك حلو.. قولهلونا وخلصنا

- اسمي الثلاثي يا باشا عشان نخلص حلو جميل خالص

اطرق الضابط برأسه في وجوم.. ونظر إلى الأرض في يأس..  
ثم عاود رفع رأسه إلى "حلو" وهو يقول في هدوء

- واضح انك متدرب كويس.. ومتعود على الضرب كويس.. إنما  
ما تفتكرش إننا بنضرب بس ؟ ؟ لا لا لا.. خالص.. أنا حشوفلك  
حاجة حلوة.. يا حلو.. عشان تنطق.. مش انت اسمك حلو ؟ ؟ ؟

اوماً "حلو" برأسه إيجاباً في تضرع.. وهو يقول

- وشرف أمي اسمي حلو

- مصدقك يا حبيبي.. اسمك حلو وجميل خالص.. عيني..  
انا فهمت انت لابس أحمر ليه.. وداير في الشوراع بتتحرش  
بالنسوان ليه.. أنا حريحك خالص.. تصدق أنا غلطان اني ما  
اخذتش بالي من الأول؟؟ معلش.. عندي أنا دي.. أصل بقالي  
زمان ما شفتش العينات دي

ونظر إلى أحد المخبرين قائلاً بلهجة ذات مغزى

- اندهولي فرج من برة

استيقظت حواس "حلو" بالكامل مع ذكر الإسم.. وبدأت  
خلجاته تتوتر بشدة وهو يحاول الربط بين الإسم الذي ترمى إلى  
مسامعه وبين ما يدور في مخيلته وبين ايماءات الضابط الغير  
مفهومة.. وقطع تفكيره.. دخول "فرج" إلى الغرفة

مخلوق من عالم ما وراء الطبيعة.. ضخم الجثة مفتول  
العضلات.. يحمل شارباً كثاً عملاقاً اقتطع جزءاً كبيراً من وجهه  
الذي خلت قمته من أي شعر.. مما جعل "حلو" يتلمص من يد  
المخبرين.. وهو ينظر إلى "فرج" متراجعاً في خطوات بطيئة نحو  
الجدار قائلاً في صوت مرتجف

- يا لهوووووي.. يا لهويييييييبيبي.. ياااااااا لهوي

قاطع الضابط مقاطعاً...

- لا لا لا.. ما تقولش كدة.. يا لهوي دي حتقولها بعد ما فرج  
يعرفك انت أد ايه حلو زي ما بتقول

ونظر الضابط إلى "فرج" صائحاً

- فررررررررررررر

تحرك "فرج" في خطوات بطيئة نحو "حلو" الذي إلتصق بالجدار وهو يقول في صوت حاول أن يتماسك خلاله

- بس ده مش قانوني على فكرة.. الضرب كمان مش قانوني بس تعرف.. انا موافق على الضرب عادي.. انما ده مش موافق عليه

تقدم "فرج" خطوة أخرى.. واستمر "حلو" قائلاً

- طيب أنا عاوز فرج بتاع فيلم الكرنك.. ده شكله مش  
كويس.. التاني كان شكله محترم.. ده شكله حيوان

كشر "فرج" عن انيابه وامتدت يده نحو أزرار قميصه وبدأ في فكها ببطء.. مما جعل "حلو" يرتعد وهو يقول

- شكل الي ينطس في سطورہ حلیمو كان يقصد السندريلا بتاعتنا احنا.. مش بتاعة الحواديت.. واضح اني حادي دور سعاد حسني في الزمن المعاصر

تقدم "فرج" خطوة أخرى بعد أن فك كل أضرار قميصه..  
وامتدت يده وامسكت بكتفي "حلو".. مما جعل "حلو" يصرخ  
قائلاً

- ثوانی یا باشا.. ثوانی

نظر إليه الضابط في غضب قائلاً

- استنی یا ابنی.. خیر یا روح امک یا حلو یا جمیل؟؟






وهنا انقض "فرج" على "حلو" الذي دفعه بسرعة.. وانطلق  
يجري داخل الغرفة كالجنون وهو يصرخ في صوت رفيع

- يا لهوووووي.. يا لهوووووي.. يا لهوووووي

وقبل أن يطبق عليه الجميع بلحظة واحدة.. تغيرت الأشكال  
من حوله.. وتداخلت وامتزجت ببعضها البعض.. وبدأت الألوان  
في السطوع مرة أخرى.. لمدة دقيقة أو أقل.. حتى بدأت الأمور  
تعود إلى طبيعتها مرة أخرى.. ولكن.. دون أن يكون لـ "حلو"  
أي أثر.. على الإطلاق

\*\*\*\*\*



ألوان.. ألوان.. ألوان

من جديد وجد "حلو" نفسه محاصرًا بالألوان لدقائق قليلة..  
إنتهت سريعًا عندما خفتت تدريجيًا ووجد نفسه واقفًا من جديد  
داخل القبو الكبير الممتلأ بالكتب.. نظر إلى نفسه في سرعة  
فوجد أنه قد عاد إلى سيرته الأولى.. فخرّ إلى الأرض يقبلها وهو  
يحمد الله.. ثم نهض ينظر حوله ويتحسس جسده في لهفة.. فوقع  
نظره على الكتاب العتيق

إقترب "حلو" من الكتاب في بطيء وهو ينظر إليه نظرة  
غليل واضحة ثم قال

- طبعًا حتمل فيها كتاب براين دلوقتي ومش حتنطق بعد  
ما تابعت اللي حصل.. إنما أكيد اللي حيخليك تنطق ثاني أما  
تعرف إني نويت والنية لله إني أولع فيك وسط الكتب دي ولا  
من شاف ولا من دري

صدر صوت "حليمو" من قلب الكتاب العتيق في هدوء  
حذر قائلاً

- بصراحة.. أنا ما شفتش حظ محب كدة طول عمري..  
عمري ما شفت حدوته بالشكل ده

- حدوته؟؟ بس ما تقولش حدوته.. حدوته إيه يا بواق  
سور الازبكية إنت.. ده كان حيقى تحقيق في صفحة أخبار  
الحوادث عن أول بابا نويل في التاريخ يخرج من قسم شرطة شايل  
في ايده عيل.. انت كنت مستني إيه؟؟؟ أما نعلن خطوبتنا أنا  
وفرج وأمناء الشرطة في القسم يتدوا يوزعوا كوفرتينا؟؟! ده أنا  
كان بيني وبين الفضيحة مسافة شعر شنبه بس  
رد "حليمو" قائلاً

- يا ابني إحنا متفقين.. اليوم بينتهى اتناشر بليل.. مكانش  
ينفع أتدخل خالص إلا في حالات الضرورة القصوى

- ودي حضرتك كانت حالات أمراض جلدية مثلاً؟؟!!!

- إفهمني.. في الوقت ده.. أنا كل اللي بعمله إني بنقل  
الحواديت زي ما قتللك.. أنا مجرد ورق بين غلاف

- تنقل إيه وتهيب إيه؟؟ إلهي ينقلوك اتنين.. واحد أعمي  
والتاني مكسح.. انت لو جبت سيرة الحدوته دي في المستقبل  
حتتققش أدا ب ونسلي حطارده اللغات إلى يوم الدين.. دي  
أصلاً مش حدوته.. دي قلبت قناة دِش متشفرة في الآخر!!

- لا بس الحمد لله.. خلص في الوقت المناسب الحمد لله

- لا يا شيخ؟؟؟ كنت مدها خمس دقائق كمان لحد ما كان فرج أخذ غرضه مني وكنت بقيت سِلْفَة سنديلا بجد.. وساعتها كنت حلبس الفستان رسمي يا كتاب فوق تمتاشر سنة.. بس مكنتش حلاقي أمير في أي حدوتة يرضى بيا.. في أمير حيرضي بواحد بكرش ولا بس فستان؟؟ حسبي الله ونعم الوكيل فيك يا شيخ

صدرت ضحكة "حليمو" من قلب الكتاب ثم قال

- خلاص بقى.. عدت.. الحواديت ياما يحصل فيها.. وأهي خلصت على خير.. ولا تكون فأكرا ان كل الحواديت حلوة وجميلة.. يا ابني ما انا قتلتك.. احنا بس بنقل الجزء الي يدي للناس أمل ويخليهم يقدروا يكملوا

- دي حدوتة مهبية.. أنا عاوز التسجيل بتاع الحدوتة دي لو سمحت عشان لازم يتمسح وإلا مش يحصل كويس.. ده لو وقع في ايد المستشار مرتضى بتاع السيديات حيتعمله يوم سنوي للاحتفال بيا

ضحك "حليمو" مرة اخرى ثم قال

- لا.. اطمئن.. ما اتسجلتش.. ولا حتتذاع.. ده كان موقف مهبب.. موضوع السعادة ده طلع صعب.. ومحتاج ترتيبات وشغلانة.. واحنا عاوزين نستغل الوقت

انتبه "حلو" إلى الوقت.. نظر إلى ساعته فوجدها قد تعدت الثانية عشر بنصف الساعة.. فقال للعجوز في تسأول

- هو الحج عزازي ما نزلش من إمبراح؟؟؟ ما جاش؟؟؟

- لا.. محدش جه

- غريبة؟؟! الموضوع ده مش طبيعي.. انا كدة بقالي أكثر من اربعة وعشرين ساعة كاملة هنا.. والراجل ما جاش.. الموضوع ده ما يطمنش.. الراجل أكيد جراه حاجة !!!

- سيبك من الحج عزازي دلوقتي ونبقى نشوف الموضوع ده بعدين.. المهم خليك معايا.. ناوي تعمل إيه دلوقتي؟؟ ولا كفاية كدة؟؟؟

شبك "حلو" يديه وراء ظهره وهو يسير في حلقة صغيرة وتبدو على ملامحه علامات التفكير العميق.. ثم توقف مُخاطبًا الكتاب المسحور

- تعرف يا حلیمو.. أنا أكثر حاجة افتقدتها مع سعادة بعد الجواز.. هي الحاجة اللي كانت مغرقة حياتنا قبل الجواز

- إيه الفزورة دي؟؟؟ تقصد ايه بقى؟؟؟

- الرومانسية يا حلیمو.. الرومانسية ومشاعر الحب.. من ساعة ما اتجوزنا والموضوع ده بيقل.. ويقل.. ويقل.. لحد ما اختفي تمامًا من حياتنا.. ومحدش فينا سأل عليه تاني.. وبصراحة مش عارف العيب من مين فينا

- يعني أنت محتاج حدوة رومانسية.. قصة مكتملة المشاعر.. مش كدة؟؟؟

- بالضبط يا حليمو.. أنا محتاج أكون بالنسبة لسعادة مصدر رومانسية.. مصدر خام جديد للحب والمشاعر اللي اختفت وانا أهملتها.. محتاج أعرف منها إيه معنى وشكل الرومانسية اللي ممكن ترجعلها الفرحة تاني

صمت غلف المكان للحظات.. ثم أعقبه بدأ تحرك صفحات الكتاب في سرعة وتتابع لإلى أن توقفت فجأة مع صدور صوت "حليمو" قائلاً

- تصدق بالله.. انت راجل ابن حلال.. أنا بين حواديتي قصة واحد من أكثر الناس اللي اتحكى عنهم في تاريخ الرومانسية في العالم لحد يومنا ده

- استر ياللي بتستر.. ناوي تعمل فيا إيه تاني؟؟ المرة اللي فاتت لبستني أحمر وبكرش ونزلتني في رمسيس.. المرة دي حتعمل فيا ايه؟؟ بكيني وحتطعلي ديل وتزلني في العتبة.. ما انا عارفك.. ما بيجيش من وراك إلا البلاوي؟؟

- يا ابني بلاش غلبة.. بالعكس.. دا انت حتكون مفتول العضلات.. وسيم جداً.. مركز كبير مرموق.. حالة كدة ما اتكررتش في التاريخ غير مرة واحدة بس

نظر "حلو" إلى الكتاب في إهتمام وتوجس في آن واحد.. ثم حسم تردده وهو يتسائل في تردد

- طب.. مفيش عريبات كارو طيب المرة دي؟؟؟

- لاء.. إطمئن.. مفيش





إلا أن "سعادة" كانت تجلس على ذات الكرسي المواجه لباب الشقة وهي تنظر إليه في صمت بعد أن عادت إلى منزلها ورفضت أن تعود مع والديها إلى منزلها بعد خروجهما من قسم الشرطة

كانت المائدة ما زالت على هيئتها.. أصناف متنوعة من المأكولات المعدة بعناية والممققة بطريقة جميلة فوق سطح المائدة لم يعد أي صنف من تلك الأصناف قابل للتذوق بعد أن أصبح باردًا بفعل برودة الطقس.. كانت مأدبة قد تم اعدادها وتوزيعها فوق المائدة بهذا الشكل الجميل تتوسطها الشموع منذ الساعة السادسة من مساء الأمس.. منذ ما يزيد عن ثمان ساعات كاملة

ثمان ساعات انتظرت خلالها "سعادة" دخول "حلو" بين لحظة وأخرى ولكن دون جدوى

ثمان ساعات كاملة.. وهي تفكر.. أين ذهب؟؟ ليس من عادته التأخر في العودة إلى المنزل بهذا الشكل؟؟ لماذا لا يستجيب هاتفه المحمول إلى أي اتصالات منذ الصباح وحتى هذه اللحظة؟؟؟ هل سُرِق منه؟؟ هل ضاع؟؟

إذا كان قد قرر أن يسهر مع أصدقائه بالرغم من أن هذه ليست من عاداته.. فبكل تأكيد كان سيعود إلى المنزل في وقت أبكر من هذا الوقت.. فهو مرتبط بعمله في صباح اليوم التالي.. وهو ليس من ذلك النوع الذي يهمل عمله.. إنه يعشق عمله..

كانت تعلم هذا.. كان يسبب لها هذا بعض الغيرة أحياناً.. ولكنها اعتادت مع مرور الوقت

ولكن.. أين ذهب حلو؟؟ أين تراه يكون في مثل هذه الساعة المتأخرة من الليل؟؟ أين هو وقد تركها بمفردها لتواجه موقفاً عصيباً اليوم؟

بدأت المخاوف تتسرب إلى عقلها مع مرور الوقت مثلها مثل أي زوجة وامرأة مصرية أصيلة.. لم تعد مهتمة مع مرور الوقت بمكان تواجد "حلو" في مثل هذا الوقت.. حيث انصب كامل اهتمامها على السؤال الأهم هل هو بخير.. أم لا؟

أخذ السؤال يتردد في عقلها مراراً وتكراراً.. حتى اتخذت قراراً هاماً حاسماً

سوف تتصل بصديقه في العمل مع أول ضوء لصباح اليوم اذا لم يعد قبل هذا الوقت.. صديقه "عصام".. صديق عمرهما.. ليتها تجد لديه إجابة..

تطفئ بها نار الخوف التي شبت بداخلها وتكاد تحرق قلبها قلقاً على رفيق حياتها.. حلو

\*\*\*\*\*

ألوان.. ألوان.. ألوان

ذات التجربة التي مر بها "حلو" سابقًا

فقدان تام للإتجاهات وعدم القدرة على تحديد المكان أو الزمان.. دائمًا ما يكون هذا هو شعوره

وحفأة.. تبدأ الألوان في الإنقشاع.. وتبدأ ملامح المكان في الظهور من حوله رويدًا رويدًا

ما هذا المكان المتسع؟؟

سؤال ألقاه "حلو" على عقله بينما الضباب المملوّن يختفي تدريجيًا

ومع التطلع والتدقيق.. اكتشف "حلو" في سرعة أن هذا المكان معروف لديه.. بل أنه من الأماكن التي عمل فيها مُسبقًا.. ويحمل لها عشقًا خاصًا

نعم.. إنها هي.. مكتبة الأسكندرية.. المكتبة التي تحتوي على ملايين من الوثائق الأثرية.. عشقه الأول.. بالفعل.. هذا هو البهو الكبير.. ولكن.. ماذا أتى به إلى هنا؟؟!

لم يشغله عن التحقق في المكان وإمعان النظر إليه إلا شعوره ببرودة شديدة بدأت تسري في أوصاله.. وتأتي تحديدًا من أسفل قدميه حتى تصل إلى أعلى الفخذين

نظر "حلو" إلى الأسفل ليقع بصره على ما جعله يُطلق شهقة قصيرة.. أعقبها صرخة رفيعة وهو يقول في هلع

- إيه ده ؟؟؟؟ جيبة ؟؟؟؟ جلد ؟؟؟؟ بُني ؟؟؟؟ على اللحم ؟؟؟؟  
في شهر طوبة ؟؟؟؟ وكمّان صندل من غير شراب ؟؟؟؟ وأنا اللي  
مكانش عاجبني فستان سندريلا ؟؟؟؟ حسبي الله ونعم الوكيل  
فبيبيبيك يا حليبيبيبيمو

بدأ "حلو" في النظر إلى اطرافه وذراعيه الزان يبدو عليهما  
القوة والشدة.. وبدأ يشعر أنه أطول قامة

جال ببصره في المكان المتسع الخاوي من أي إنسان.. فوجد  
انعكاسًا لصورته في الزجاج

اقترب "حلو" من الزجاج ليتطلع إلى هيئته.. ثم تحدث  
مُخاطبًا نفسه

- هو بغض النظر عن الجيبة الجلد.. والصديري الجلد..  
والصندل الجلد.. الهيئة مش بطالة بصراحة.. طول عمري نفسي  
أروح الجيم عشان أبقى كدة بس المشكلة أنه دايماً يفتح متأخر..  
وبعدين كابتن ابراهيم اللي هناك مركز مع الشباب على تمرينات  
القطنية وأنا ببقى عاوز أَلعب بطن

ظل "حلو" ينظر إلى قامته المشوقة وعضلاته المفتولة  
لوهلة.. قبل أن يتساءل في صوت مسموع

- طيب يا ترى دلوقتي.. نحب نتشرف برضه.. مين الأخ ؟؟؟؟  
اللبس واضح انه حاجة روماني او اغريقي او يوناني.. بس دول  
كثير فحت.. انا ضيعت بتاع اربع سنين بدرس فيهم ؟؟؟؟ انت  
مين فيهم بقى ؟؟؟؟

نظر إلى انعكاسة صورته ثم أردف

- أوديسيوس؟ لا لا... كان بدقن.. أكيليس؟ اممم لا برضه  
كان مطول شعره.. هوميروس؟؟ يا عم هوميروس مين دا كان  
اعمش.. اجا ممنون؟؟ لا لا كان تخين.. مين يا حلو؟ تطلع مين  
يا حلو؟؟

وأثناء تساؤلاته.. لمح في انعكاس الزجاج شيئاً ما مربوط إلى  
خصره.. لاحظته لأول مرة.. نظر "حلو" إلى ذلك الشيء فوجده  
سيفاً.. نزعه من غمده ونظر إليه عن قرب ليجد على قاعدته  
نقوش كتبت بلغة رومانية قديمة كان يعرفها بحكم عمله.. وقرأها  
على الفور وهو يقول في شرود

- أنطونيو؟! ممممم.. لا كويسة دي منك يا حليمو.. أنطونيو  
وكليوباترا.. يا سلاالم.. لا وشوف سخرية القدر.. انا في نفس  
المكان اللي أنطونيو بنفسه كان السبب في حرقه.. اهو ساب  
روما تضرب قلب وقعد يحب في كليوباترا لحد ما اوكتافيوس  
حط عليه وعلى كليوباترا وعلى الامبراطورية كلها وبقي أول  
امبراطور روماني منفرد.. يااااه.. الله يرحمك يا شيكسبير.. غاوي  
نكد يا شيكس من يومك والله

ظل "حلو" يدور هنا وهناك طوال ما يزيد عن ساعتين  
من الزمن حتى تعدت عقارب الساعة الخامسة والنصف صباحاً  
ببضع دقائق.. في الوقت الذي بدأت أنوار الصباح تدخل إلى  
حرم "المكتبة العظمى" كما كان يطلق عليها قبل الميلاد.. وذلك

من خلال السقف الزجاجي العملاق.. وعلى الرغم من ضوء الشمس البسيط إلا أن ركبتا "حلو" بدأتا في الارتعاد وهو يقول - جيبة في طوبة يا مفترى.. مفيش فايدة.. حستهوى حستهوى.. طب كنت لبسني كلسون!!

وقف "حلو" عاقداً ساعديه أمام صدره في محاولة لتخفيف آثار البرودة.. وأخذ يتحرك في أرجاء المكتبة في نشاط مُحاولاً ادخال بعض الدفئ إلى جسده الذي يكاد يتجمد.. وهو ينتظر وصول عمال النظافة الذين يصلون في الساعة صباحاً ليدؤوا في تجهيز قاعات المكتبة لاستقبال جولات الضيوف والزائرين التي تبدأ يومياً في العاشرة صباحاً.. معلومات كان يعلمها ببساطة بحكم ترده على المكتبة مئات المرات أثناء شبابه وأثناء دراسته وأكثرها من خلال عمله

وبالفعل.. بدأت أبواب المكتبة الداخلية تفتح وبدأ عاملو النظافة في الإنتشار بينما كان "حلو" متوارياً إلى أن وجد اللحظة المناسبة.. فانطلق خارجاً من أحد أبواب المكتبة الكبيرة.. ومنها إلى الشارع.. ليجد نفسه على شاطئ الأسكندرية المزدهم في هذا التوقيت وكل اهلها تقريباً.. ينظرون إليه.. ويكادون يفقدون حياتهم

ضحكاً

\*\*\*\*\*

أشارت عقارب الساعة إلى السابعة والربع صباحًا حين أرتفع  
رنين هاتف "عصام عبدالراضي" وهو ما يزال يتناول فطوره في  
منزله

امسك بالهاتف في اندهاش وهو يتساءل عن ماهية المتصل  
في مثل هذا الوقت المبكر

انعقد حاجباه في شدة وهو يشاهد على شاشة هاتفه إسم  
"سعادة".. وأجاب في سرعة واللهفة تطل في كل كلمة من كلماته..  
فهو لم يتلق قبل منها اتصالاً في مثل هذا الوقت المبكر أبداً

- الووو.. صباح الخير يا سعادة خير؟؟ في حاجة؟؟؟

- صباح الخير يا عصام.. ازيك؟؟ عامل إيه؟؟

- أنا تمام الحمد لله.. في حاجة يا سعادة؟؟ حلو كويس؟؟  
الحج والحجة كويسين؟؟

توترت خلجات "سعادة" وهي تستمع إلى "عصام" الذي على  
ما يبدو من سؤاله أنه لا يعلم شيئاً عن "حلو".. ولكنها قالت  
في سرعة

- أنا متصلة بيك مخصوص عشان اسألك على حلو يا  
عصام.. حلو ما رجعت البيت من امبارح ليل.. أنا خيفة قوي  
يا عصام.. ما تعرفش هو فين؟؟

تهد "عصام" في ارتياح.. وهو يجيب

- يا شيخة خضتيني.. بصي.. حلو قالي أنه واخذ مأمورية  
أسبوع تقريبًا.. الرئيس عندنا في الشغل كلفه بيها.. بس هو ما  
قالش فين بالضبط.. أنما هو فهمني أنه مش حاجي الشغل..  
يمكن تكون المأمورية مش في القاهرة وسافر مثلاً يا سعادة  
- طول عمره يسافر صد رد يا عصام عمره ما بات برة  
البيت أبدًا

- طب هو ما قاللكيش قبل ما ينزل الصبح هو رايح فين  
بالضبط؟؟؟

- أصل.. أصل انا ما كنتش في البيت.. كنت بزور ماما  
يومين ورجعت ما لقيتوش.. ومن ساعتها ما رجعتش وبعدين هو  
مش واخذ معاه هدوم ولا حاجة يا عصام

- بصي.. اطمني.. ممكن يكون مأمورية يوم ونص مثلاً وهو  
عارف انك عند ماما.. فا قال بدل ما يرجع البيت بسرعة..  
ياخذ وقته ويرجع ثاني يوم مثلاً يكون خلص.. عمومًا.. لما يرجع  
انهارده طمني عليه.. وأنا حاكمه على موبايله كمان ساعة كدة  
لما أوصل الشغل

- ربنا يخليك يا عصام لو كلمته خليه يكلمني ضروري عشان  
موبايله مش لاقط خالص

- حاضر يا ستي.. ياللا صباح الفل عليك

انهت "سعادة" المكلمة وقد بدأت بعض الراحة تتسرب إلى  
نفسها.. ولكن في ذات الوقت.. كان هناك شعورٌ خفي ملازمًا



لها.. يصرخ بداخلها طوال الوقت.. يخبرها أن الأمور ليست على  
ما يرام أبدًا

\*\*\*\*\*

تسارعت خطوات "حلو" وهو يسير إلى جانب الأسوار  
التي تواجه بحر الأسكندرية.. بينما ينظر إليه الكل في سخرية  
شديدة

من ذلك المجنون الذي يسير في مثل هذا الطقس الذي يقترب  
من التجمد وهو يرتدي مثل تلك الثياب العارية المضحكة؟  
كان "حلو" بالفعل يكاد يتجمد بردًا وهو يخاطب نفسه  
قائلًا

- مش حاسس بركبي خلاص.. من بعد الركب وانت طالع  
باظ مني.. انا عارف كلها دقايق وحيجلي برد في المعدة يعقبه  
اسهال مزمن.. حاموت ومش مسامحك يا حليمو.. طب كنت  
ابتعني بشراب تحت الصندل!

استقر "حلو" في السير وقد تعدت الساعة العاشرة صباحًا..  
كان يتجه إلى لا مكان.. لا يعلم كيف سيصل إلى "سعادة"..  
كيف سيغادر الأسكندرية مُتجهاً إلى القاهرة وهو لا يحمل قرشًا  
واحدًا؟؟

ظل يفكر لساعة ويزيد.. حتى اتخذ قراراً.. استجمع من خلاله كل شجاعته

توقف وسط الطريق.. وبدأ في مخاطبة المارة

- والنبي لو سمحت.. محتاج ارجع القاهرة والمحفظة ضاعت

- روحوا اشتغلوا بقى جتكم الهم والغم مليتوا البلد!

مر رجل آخر..

- بعد اذنك محتاج مساعدة.. ممكن فلوس بس اركب

أروح؟؟ انا مش من هنا أصلي

- مساعدة إيه يا بغل اللي عاوزها؟ دا احنا اللي عاوزين

مساعدة، انت مش شايف انت عامل ازاي؟؟ دا انت بغل

صحيح!

مرت سيدة مُسنة متجهة إلى عملها

- بعد اذنك يا حجة.. أي حاجة لوجه الله طيب.. إلهى

تحجي يا رب.. أي فلوس أركب وأروح حموت من البرد.. فخادي

نملت يا نااااس

- فخادك؟؟؟ فخادك ايه يا راجل يا قليل الأدب.. أنا حفرج

عليك خلقه.. انا حا ألم عليك عبيدووو

- لاااا لاااا لاااا.. أنا اسف.. انا ماشي خلاص.. ده انا كنت

لابس بدلة فرو وبهدلوني.. أومال لما يشوفوني بجيبة؟؟؟ أسف

يا حجة..أسف..سلام

وانطلق "حلو" مُسرّعًا الخطى مُبتعدًا بدون أن يلتفت وراءه  
للحظة واحدة وكأن شياطين الأرض تطارده

فشلت خطته.. ولا بد من تصرف آخر.. لا بد من طريقة  
يعود بها إلى القاهرة

ونجأة.. قفزت إلى رأسه فكرة أخرى.. لم يلبث أن وضعها في  
موضع التنفيذ الفوري

اتجه "حلو" إلى أحد الأسواق المزدهمة القريبة من مكان  
مروره.. ودلف إليها وسط نظرات المارة التي امتلأت بالسخرية  
تارة والاشمئزاز والامتنعاض مرة أخرى

وقف "حلو" بالقرب من أحد الباعة.. وخلع سيفه من  
حول خصره.. ثم بدأ في الهتاف

- سيف للبيع.. للبيع.. سيييف.. يا جماعة الي عاوز  
سيف.. صلي على النبي.. سيف للبيع.. ايووووة.. ايوة السييف..  
يا ابو السيوف.. قارب قارب قارب.. السييف السحري..  
سيف انطونيو.. السييف الأصلي.. مش صيني ولا مصري

بدأ المارة يقفون ويتجمعون حول "حلو" الذي بدأت  
الأسئلة تنهال عليه

- بكام ده يا عم؟

- الي تجيبه يا بيه.. ده سيف انطونيو الأصلي وربنا  
يساخني على العاملة السوداء دي الي حأعملها في حق التاريخ

- أيوة يعني أخره كام؟؟

- يا ريس الى تجيبه.. كُلك نظر.. دي الحت بتطلع من  
تحت البيوت في نزلة السمان وبتتباع بفلوس كثير موووت..  
والاجانب يشتروها هوا.. ما انت فاهم بقى

- يعني يمشي معاك خمسة؟؟؟

- يمشي طبعًا.. بس معلش انا عاوزهم كاش.. ما بخدش  
شيكات

- يا سلام؟؟ عيني.. ادي اهي حته بخمسة

- ايه ده؟؟؟؟!!!

- خمسة جني زي ما اتفقنا!!!

- خمسة جنيه ايه يا راجل يا مجنون انت؟ بقولك سيف  
انطونيو الأصلي تقولي خمسة جنيه.. انا عاوز خمس الاف جنيه  
انفجرت الضحكات من حول "حلو" في كل مكان استنكارًا  
حتى أن بعض المتجهرين جلسوا أرضًا لا يقوون على الوقوف  
من شدة الضحك.. بينما اكمل الرجل الذي يريد شراء السيف  
قائلًا

- حيمشي معاك خمسة جني ولا نمشو؟؟؟

انفجر "حلو" صائحًا في هيستريا وهو يلوح بيديه في الهواء  
قائلًا

- سيف "مارك أنطونيو" بخمسة جنيبييه يااا كفرة؟؟!!

تدخل رجل آخر في الحوار وهو يسأل "حلو"

- يمشي معاك بعشرة طيب يا برنس؟؟؟

نظر له الرجل الأول وهو يقول

- خلاص أنا خلصت فيه بخمسة

لطم "حلو" خديه وهو يقول للرجل صارخًا

- لا يا خويا.. ما خلصتش.. ما خلصتش يا ظالم يا مفتري..

مش بايع بخمسة أنا

تدخل رجل ثالث قائلاً

- تاخذ عشرين جني وتخلص دلوقتي؟

بدأت الأصوات ترتفع بين المتجمهرين.. وبدأت العروض  
تزداد من هنا ومن هناك حتي وصل سعر السيف إلى مائة  
وخمسون جنيًا.. قام بدفعها جزائر من السوق وأخذ السيف  
ليستخدمه في متجر اللحوم

وقف "حلو" ينظر إلى النقود في يده.. ثم نظر إلى الجزار  
المبتعد بالسيف الأثري.. وقال مخاطبًا نفسه..

- لسوف يذكر التاريخ.. أن "مارك أنطونيوس" وقف في سوق  
سمك يبيع أعز ما يملك.. سيفه.. شرفه.. عرضه.. بمئة وخمسين  
جنيه.. وليه كل ده؟؟؟ عشان يركب مكروباص من اسكندرية  
للقاهرة وينزل موقف مشعل.. التاريخ سوف.. سوف.. ياالله..  
حسي الله ونعم الوكيل فيك يا حليمو

بدأ "حلو" في التحرك من مكان السوق.. بعد أن إبتاع عددًا من ارغفة الكبدة من فوق إحدى العربات المنتشرة في السوق.. وأخذ يدسها في فمه دسًا من شدة الجوع.. تحرك مُنطلقًا إلى الشارع الرئيسي.. أشار إلى العديد والعديد من سيارات الأجرة التي رفض أغلبها مجرد التوقف مع مظهر هذا الفحل الذي يرتدي تلك الملابس الغريبة في هذا التوقيت من عمر الشتاء القارص ولكن في النهاية.. توقفت إحداها ليدخل "حلو" إليها مُسرعًا مُنشدًا بعض الدفء.. لبيادره سائقها الذي تبدو على ملامحه أنه قد تعدى الستين من العمر بسؤال معتاد

- على فين العزم ان شاء الله ؟ ؟

- موقف مصر ان شاء الله

- وايه اللي انت لابسه ده يا ابني ؟

- لا دي حكاية طويلة يا حج.. يعني.. شغل مسرح بقى وتمثيل وبتاع

- إيه ده ؟ ؟ هو حضرتك ممثل ؟ ؟ ؟

- إيه ؟ ؟ آه.. ايوة ايوة.. ممثل إن شاء الله

- بس، عرفتك.. انت الاستاذ تامر هجرس.. صح ؟ ؟

- يا حج تامر هجرس ايه بس ؟ ؟ ؟

- انت تامر هجرس ومش عاوز تقول عشان المعجبين  
والزحمة وكدة.. صح؟؟

- شوف يا أخي الذكاء.. هما كدة سواقين التاكسي ما حدش  
يعرف يضحك عليهم أبداً.. عفارم عليك.. عفارم عليك يا حج  
كشفتني

- ياااااااه.. والله الواحد ما عارف يقول إيه يا أستاذ تامر..  
إحنا انهارده عيد والله.. ويا ترى الاستاذة يسرا عاملة إيه؟؟  
- يسرا مين يا حج؟؟؟!!

- الفنانة يسرا.. مش كنت بتمثل معاها في تمثيلية شربات  
موز ولا لوز باين؟

- ايه؟ آه.. تقريباً.. مش عارف.. انت ادرى بقى يا حج.. انا  
اصلي مش متابع التليفزيون بصراحة

ضحك الرجل العجوز ضحكة عالية لا تتناسب مع سنه  
وتدل على انه ذو صحة ممتازة.. ثم أردف

- والله دمك زي السكر يا استاذ تامر.. احكي لي بقى..  
الست هند صبري حلوة كدة فعلاً في الحقيقة ولا يبقى ده شغل  
ميكياش؟؟؟

- ميكياش؟! مممم.. هو يوم مش فايت

واستقرت المحادثة بين سائق الأجرة العجوز وبين "حلو"  
الذي شعر أنه في غضون لحظات قصيرة سينقض على الرجل  
ليمتص دمه.. ولكنه ظل يتهرب من اسئلته بشكل غير مباشر

مستخدمًا إجابات دائماً تدفع الرجل إلى القهقهة بصوت مرتفع.. حتى وصل إلى وجهته.. شكر "حلو" العجوز وألقفه أجرته مع وعد أنه سيرسل له تلك الصورة الموقعة منه شخصيًا.. وأنه سيوصل سلامه إلى الفنانة حلا شيحا بكل تأكيد عندما يراها في بروفات الفيلم الذي يقوم ببطولته حاليًا

استقل "حلو" إحدى عربات الميكروباس المتجهة إلى القاهرة التي تحركت فور أن اكتمل عدد ركابها الذين كانوا ينظرون بين الحين والآخر إلى ذلك الراكب الذي يجاهد بكل قوته طوال الوقت في شد أطراف التنورة البنية الجلدية القصيرة التي يرتديها إلى ابعاد نقطة ممكنة يمكنه أن يغطي بها ركبته المتجمدتين طوال الطريق

وطوال الطريق الذي استغرق ثلاث ساعات.. كان "حلو" يفكر في شيء واحد فقط

كيف سيكون لقاءه بـ "سعادة" هذه المرة؟ كيف سيحمل لها قدرًا من الرومانسية تجعلها تتذكر أيامها الماضية ومشاعرها الدافئة؟ كيف سيجبرها على البوح بمشاعرها ورغباتها؟

ظل "حلو" يحاول وضع خطة أثناء الطريق.. إلى أن وصلت السيارة إلى ميدان الرماية في الهرم.. وهنا خطرت فكرة على عقل "حلو".. لماذا لا يستغل الوقت.. ويترجل هنا.. ويستقل سيارة أجرة أخرى إلى المعادي مباشرة؟؟ توفيرًا لوقت دخول المكروباس إلى الموقف وعدم ضياع مثل هذه الدقائق الثمينة.. خاصة وأن الساعة قد تعدت الرابعة مساءً



وعلى الفور.. وضع فكرته موضع التنفيذ وهو يصيح في  
السائق

- الرماية معاك يا هندزة

وفور أن نزل من السيارة.. كانت المفاجأة في انتظاره كالعادة  
مفاجأة كارثية

\*\*\*\*\*





ارتفع صوت طرقات على باب مكتب الأستاذ "أحمد  
عبدالنبي" وكيل الوزارة.. مما جعله يقول في هدوء مجيئاً بلهجة  
آمرة

- إدخل

انفرج الباب عن "عصام عبدالراضي" وهو يدلف إلى حجرة  
وكيل الوزارة وعلى وجهه علامات ابتسامة خفيفة.. وأغلق خلفه  
الباب في إحكام

نظر له الأستاذ "أحمد" في بشاشة وقال

- ازيك يا عصام؟ ها؟؟ ايه أخبار الشغل؟؟ كله تمام؟؟

- كله تمام بفضل توجيهات سعادتك يا استاذنا

- طيب الحمد لله.. خير يا عصام؟

- لا يا فندم خير إن شاء الله.. بس أصل في موضوع كدة

عاوز اسأل حضرتك عليه لأن الحكاية بقت شوية مُقلقة

- خير يا عصام في ايه؟؟!

- حلو يا استاذنا.. ما رجعت البيت من إمبراح وتليفونه مش لاقط خالص ومراته مش عارفة عنه حاجة.. فا أنا قلت أجي أسأل حضرتك يمكن يكون عندك إجابة للموضوع ده.. وخصوصًا أنه طالع مأمورية بأوامر سعادتك

- ما رجعت البيت من امبارح؟؟؟ غريبة.. لا طبعًا الموضوع كدة مُقلق جدًا.. انا فعلاً بعته مأمورية إسبوع أنما ليها مواعيد محددة.. لازم يروح البيت كل يوم طبعًا.. أكيد في حاجة غلط

- يا ستار يا رب.. طيب يا فندم.. يعني.. هو في امكانية نعرف مكان مأمورية حلو فين عشان نسأل عليه أحسن يكون جراه حاجة هناك يا فندم وأحنا مش عارفين؟

- ممم.. اه طبعًا مفيش مشكلة.. بص.. روح دلوقتي على متحف دار الكتب.. اسأل عن الأستاذ محمد العزازي.. والمفروض شغله مع حلو.. اسأله وطمني ضروري.. ضروري يا عصام

- حاضر يا فندم.. ان شاء الله خير يا استاذنا.. أنا حنزل من هنا حالًا وأطلع على هناك على طول لأن مراته قلقانة عليه جدًا

- والله يا عصام أنا كمان قلقت.. ربنا يستر يا إبنى

استأذن "عصام" من السيد "أحمد" وخرج من غرفته مسرعًا ودقات قلبه ترتفع شيئًا فشيئًا.. وعقله لا يكف عن

التفكير.. وهو يغادر مبنى دار الكتب ويستقل سيارته متجهًا  
إلى المتحف

تُرى أين "حلو" الآن؟ أين هو؟ هل هو بخير؟؟؟

ظلت الأسئلة تتردد في عقله بلا توقف.. وقلبه يزداد  
انقباضًا.. دقيقة وراء دقيقة

\*\*\*\*\*

عشرات وعشرات من العاملين في السياحة من أبناء النزلة  
بجوار الهرم هجموا على "حلو" بمتهى القوة وهم ينظرون إليه  
كصيدٍ ثمين

ها هو سائح أبله يرتدي زيًّا ابلهًا ويأتي إلى سفح الهرم لكي  
يلتقط بعض الصور التذكارية فوق الحصان تارة وفوق "الكرتة"  
تارة أخرى ويتخذ أوضاعًا جنونية إلى جانب جمل جالس يكاد  
يفتك به من شدة الملل

بكل تأكيد سوف يتصور عشرات الصور وهو يقبل "أبا  
الهول".. وعشرات الصور الأخرى يحمل فيه الهرمين من قتهما  
في يده على طريقة مثلثات الجبن "النستو"

انهم جميعًا يعلمون كم هو أبله هذا السائح.. ولكن "أكل  
العيش مُر".. ولا بد من التملق والتودد إليه حتى يمكنهم الحصول  
على أكبر قدر ممكن من النقود التي يحملها.. هم بكل تأكيد تقتلهم

الحيرة أين يحمل نقوده ولكن لا يهتم.. في لحظة ما سوف يجردونه منها.. حتى وأن جردوه من ملابسه في سبيل بحثهم عن ارزاقهم كان الهجوم شنيعاً.. بلا رحمة.. أحاط به بضع عشرات منهم وكل واحد منهم يحاول جذبه في اتجاه وهو لا يكاد يعلم ما يحيط به من شدة الدهشة وشدة الجذب وتداخل الأصوات التي تتصارع عليه وكأنهم ذكور جاموس وحشية تتصارع في موسم التزواج على أنثى كما يحدث في الغابات الاستوائية المتوحشة تعالت الأصوات.. حيث قال أحدهم

- اتفضل يا مستر.. اتفضل.. "ويل كم".. "ويل كم".. احنا عندنا اجدع احصنة في النزلة.. اللفة بمتين جنيه.. اتفضل.. حنكرمك والله

وقال آخر وهو يجذبه من معصمه

- حضرتك باين عليك بتفهم عربي.. عندي حتت كويسة لقيناها واحنا بنحفر تحت البيت جنب الهرم.. تعالى اتفرج بس وحتفقق.. أنا اللي بيعتلك الرسائل قال ثالث..

- علاطلاق.. علاطلاق من بيتي ما حد حيربك على الجمل غيري.. علاطلاق ما حترك غير جملي صرخ رابع..

- يا بيه.. تعالى حنطلع بيك الصحرة وحنشربك شاي على الفحم وحنفرجك على حاجات هيلوة.. هيلوة كثير



أنا أوصل المعادي.. بص.. اتكل على الله واطلع دائري وربنا  
يفرجها بقى.. وهاتلي راديو مصر والنبي

اوماً السائق برأسه تلبيةً.. وانطلق إلى وجهته التي احتاجت  
إلى أكثر من ساعتين من الزمن للوصول إليها

قاربت الساعة على الساعة مساءً.. حين طلب "حلو" من  
السائق التوقف أمام المنزل المكون من أربعة طوابق الذي يسكنه  
أهل "سعادة" والقريب من منزله بعد أن دفع له أجرته.. نظر إلى  
نافذة شقه "سعادة" أثناء توجهه إلى مدخل البناية حيث أشارت  
الإضاءة الخفيفة الصادرة من خلف ستائرهما إلى إنهم متواجدين  
ومجتعين في ردهة المنزل كالمعتاد

قفز "حلو" درجات السلم في رشاقة وحيوية وفرها له  
جسده الجديد الممشوق.. حتى وصل إلى الطابق الثاني حيث  
منزل "سعادة"

وقف "حلو" للحظات لكي يستجمع رباطة جأشه.. وفكر..  
كيف سيئر الموقف؟؟؟ إنه الآن بصدد قرع الباب ومواجهة  
احتمالات عدّة.. تتنوع بين أن يفتح والد "سعادة" الباب.. وأن  
تتفتح "سعادة" بنفسها الباب وما أجمله من احتمال.. وخاتمة  
الاحتمالات وأسوأها على الإطلاق أن تفتح "أم سعادة" الباب..  
بكل تأكيد لن تتعرف عليه في شكله الجديد.. ولكنها في كل  
الأحوال مادة خام للعكنة ومورد أصلي للهم والحزن والكآبة..  
ولسوف تجعله بكل تأكيد يفكر كثيرًا في محاولة سقيها غنوة



جرعة مُركزة من سم الأفاعي الذي تجرعتة "كليوباترا" في الماضي  
السحيق كي تُخلّد ذكراها معه

وقف "حلو" ليضع خطة سريعة في رأسه.. ويضعها موضع  
التنفيذ مع امتداد يده نحو جرس الباب ودقه والانتظار للحظات  
مرت كالدهر وهو يدعو من صميم قلبه أن يكون الحبيب "سعادة"  
بذات نفسها

ولكن القدر لم يكن رحيماً به.. حين طل عليه من وراء  
الباب الإحتمال الأسوأ على الإطلاق.. قائلاً

- خير؟ نعم؟! إيه الزفت اللي انت لابسه ده؟ عاوز ايه؟؟

- خير ازاى بقى؟؟ المهم.. مساء الخير يا فندم

قالها "حلو" مع ابتسامة صفراء حاول وضع أكبر قدر ممكن  
من الهدوء فيها في الوقت الذي تفحصته "أم سعادة" عدة مرات  
وهي متوجسة منه ومن ملابسه وعضلاته المفتولة المكشوفة وراء  
رداءه الجلدي الخفيف.. مما جعلها تقول

- عاوز ايه؟؟ انت مين؟؟

- أنا.. أنا.. مندوب شركة منتجات طبية وجاي اعرض  
على حضراتكم منتج طبي جديد ضد البرد وضد الشعور بالبرد  
حضرتك وحيساعدكم جامد في فترة الشتاء

- مش عاوزين.. الله يسهلك

وصفقت الباب في وجهه بمنتهى العنف حتى أن جدران  
المنزل ارتجت.. مما جعل "حلو" يستشيط غضبًا.. ويمد يده  
ليطرق الباب مُجددًا.. لتفتح "أم سعادة" مرة أخرى قائلة  
- مش قولنا مش عاوزين؟؟ ربنا يحن عليك.. ما تبقاش  
رزيل وغتت

- يعني ينفع كدة؟؟ حضرتك؟؟ اكون واقف بتكلم  
وحضرتك.. حضررررتك تقفلي الباب في وشي بالشكل ده؟؟  
دي أصول برضه؟

- أنت حتعلمني الأدب يا لطخ أنت؟؟؟ قلنا مش عاوزين  
زفت من اللي بتتيل تبعه

- أيوة بس أنا لازم أعرض عليكم المنتج حضرتك.. ولازم  
أهل البيت كله يشوفوا المنتج.. ويُفَضِّل جوز حضرتك.. وبنت  
حضرتك كمان ضروري تشوفه

- نعم؟؟؟ وانت عرفت منين بقى أن شاء الله أن البيت  
فيه جوزي وبنتي؟؟؟ انت بتراقبنا ولا ايه؟؟؟

فطن "حلو" إلى خطئه الساذج مرة أخرى وبدأت علامات  
التوتر تظهر على وجهه وهو يحاول إصلاح الموقف قائلاً

- ايه؟؟ لا.. حضرتك.. اقصد يعني.. اقصد أهل البيت  
عمومًا يتعرفوا على المنتج عشان منتج هام  
- فين شنطة المنتجات دي؟؟

- شنطة؟؟ لا ما هو الأول أحنا حابين نعرف رأي أهل البيت من حيث المبدأ وبعدين حاروح أجيب الشنطة وأجي.. ممكن أشوف بنتك بقى؟؟

وقت "أم سعادة" للحظات تنظر إليه في بلاهة.. ثم قامت  
بآخر فعل توقع "حلو" في هذه اللحظة أن تُقدم عليه  
انقضت على رقبتة مُمسكة بها رغم قصرها مقارنة بطوله  
الفارع.. وهي تصرخ بكل ما أُوتيت من قوة..  
- حرااااااامممااي

---

وفي خلال ثوان معدودة.. كان سكان العقار بالكامل يلتفون  
حواله ممسكين به في إحكام  
واتخذ الأمر منحنى جديد.. وخيف

\*\*\*\*\*

ظهر الإجهاد على وجه "سعادة" وهي تحاول إلتقاط أنفاسها أثناء حديثها في الهاتف المحمول خلال إتجاهها إلى منزل والديها وعقارب الساعة قد تعدت الساعة مساءً يبضع دقائق وهي تقول -أيوة يا عصام يعني دلوقتي أنت حتعمل إيه بعد ما قالولك هناك إن الاستاذ عزازي بقاله يومين ما جاش؟؟

جاءت الأجابة عبر الهاتف

- بصي يا سعادة الموضوع ما يطمنش.. وأنا قلقان زيك بالظبط.. انا أخذت عنوان الأستاذ عزازي من بتوع الأمن.. وعرفت منهم أن مراته تعبانة وأكيد ما جاش بسبب الموضوع ده.. وحاروح أشوفه لأنه يمكن يكون يعرف حاجة عن حلول.. بس قولي يا رب

- يا رب يا عصام.. يا رب.. أنا حموت من القلق.. مش قادرة اتلم على اعصابي.. أنا حتى رايحة اشوف بابا واقوله يشوفلي صرفة.. انا خيفة قوي يا عصام

وبدأت "سعادة" تنخرط في بكاء حاد وهي ما زالت على الجهة الأخرى من المحادثة مع "عصام" الذي حاول أن يهدأ من روعها قائلاً

- يا بنتي مالوش لازمة العياط ده.. خير ان شاء الله.. وبعدين تلاقيه عارف انك مش في البيت زي ما لسة حكيالي على مشكلتكم من يومين.. وممكن يكون خلص المأمورية وسافر يومين مثلاً تغيير.. عارف انه مش طبعه.. بس برضه ممكن يكون اتهم في عقله وعملها.. وقافل موبايله عشان كدة.. الرجالة ياما بتعمل يا سعادة.. عادي يعني.. خير ان شاء الله.. بس أنتي خليكي معايا على التليفون.. أول ما أوصل وأعرف حاجة من الاستاذ عزازي حكلمك أبلغك على طول

ردت "سعادة" من بين دموعها المنسالة على وجنتيها



- استاذة سعادة.. إزيك؟

صرخت "أم سعادة" صرخة فجرت الموقف قائلة

- انت کمان عارف اسم بنتي؟؟؟ يا لهوتااااااااااااااي..  
الحقونا يا أهل هوووو.. ده سيريال کیلر.. بشوفهم في الام بي سي  
اکشن.. ده طلع مش حرراااااااااي يا ختاااااااااااااي.. ده طلع سفاح  
قتال قُتلة

نظر "حلو" لها وعض على شفثیه قائلاً

- أه لو كان سيفي ما زال في خصري يا ولية يا بومة إنتي..  
ولم يكن ذلك الجزار قد سلّني إياه مقابل حفنة من المال.. تالله  
لكنت شندلتك شندلة أكليس لهيكتور في ملحمة الإلياذة

قفزت "أم سعادة" من فوق الدرج لتعلق في رقبتها وهي تصرخ في جنون

- سيف؟؟ بتقول سيف؟؟ سامعين؟؟ حيدبحني.. ويدبخ  
جوزي.. ويدبخ بنتي.. سامعين قتال القتلة بيقول إيه؟؟ يا  
ختاااااااااااااااااي

ارتفعت المهمة الغاضبة بين المحيطين بجسد "حلو" .. في اللحظة التي عاد هو للنظر مرة أخرى إلى "سعادة" في عشق قائلاً بلهجة مسرحية قوية رومانسية ألجأت ألسنة الجميع

- أنا أنطونيو وأنطونيو أنا ما لروحينا عن الحب غنى

غَنَّا فِي الشُّوقِ أَوْ غَنَّا بِنَا نَحْنُ فِي الْحَبِّ حَدِيثٌ بَعْدَنَا

الحياةُ الحُبُّ والحُبُّ الحياةُ ومن سرحاتها سرُّ النواهِ  
وعلى صحرائها مرّت يداهُ فَجَرَتْ ماءً وظلاً وجنى  
نحنُ شعراً وأغانِيَّ عَدا بهوانا راكِبُ البِيدِ حَدا  
وبنا الملاحُ في اليمِّ شدا وبكى الطيرُ وغنى مؤهنا  
من يَكُنْ في الحُبِّ ضحَى بالكِرى أو بِمِسْفُوحٍ من الجمعِ جرى  
نحنُ قربنا له مُلْكُ الثرى ولقينا الموتَ فيه هِيَّـنا  
أنا أنطونيو وأنطونيو أنا ما لروحينا عن الحُبِّ غنى

صمت تام أصاب الجميع.. تيبس كاملٌ وكأن المشهد قد تحول إلى صورة ثابتة.. وقف الجميع فاعزٌّ فاه وهو ينظر إلى "حلو" الذي تركز بصره على حبيبته "سعادة".. وهي تنظر إليه في ذهول محاولة استيعاب وقع تلك الكلمات عليها.. ثم ما لبث أن قطع الصمت صرخة أم "سعادة" الهادرة

- يا خراااااااا باااااااااي.. محبوبول.. بيعمل مجنون عشان نسيه.. امسكووه.. بينا على القسم يا قتال القُتلة يا سفااح  
وقالت محدثة "سعادة" في لهجة آمرة

- إطلعي انتي لأبوكي فوق عشان ساياه نايم والسباخ على  
البوتجاز بدل ما الشقة تولع.. صحيه وحصلوني على القسم وأنا  
حاسبق مع الجيران يا ختاه!!!!!!!!!!!!!!!!!!!!!!

أفاق الناس على صرختها.. وبدأوا في سحب "حلو" بجسده  
القوي خروجًا من البيت في الوقت الذي لم يكن "حلو" مُهمًّا على  
الاطلاق إلا بالنظر إلى "سعادة" معطيًا إياها أفضل ابتساماته  
الوسيمة ونظراته العاطفية وهو يقول لها في صوت مرتفع أثناء  
ابتعاده عن باب البيت

- العمر لا يُمكن أن يُذبل جمالك أبدًا

وابتعدت الحشود وهي تقود "حلو" نحو قسم الشرطة..  
بينما وقفت "سعادة".. وعلامات الذهول والحيرة ترسم بأقصى  
صورها على وجهها.. وقلبها

قلبها الذي خفق كما لم يخفق بهذه الطريقة إلا مع شخص  
واحد فقط.. شخص واحد يستطيع أن يجعلها تشعر بمثل هذا  
الشعور

و لكن كيف وهو الآن أبعد ما يكون عن هذا المكان؟

لم تعلم أن هذا الشخص.. كان منذ لحظات قريبًا منها

أقرب من أي وقت مضى

\*\*\*\*\*





- انا ما شفتش السحنة دي قبل كدة.. ولا اللبس ده.. ومش  
عاوز غير أنك تنطق بعد كل الهري اللي قالوه ده وتخلصني..  
انت مين؟؟؟ انطق

تدخلت "أم سعادة" بجدة وهي تصرخ

- أيوة.. أيوة.. ده شبه الراحل اللي بيطلع في فيلم "هالوين"  
اللي بيقتل الناس بالسكينة في العيد الكبير يا سعادة الباشا.. ده  
سفاح أصلي وباين عليه أهو.. ضخم الجثة وعريض المنكفين

صرخ الضابط "عمار" في جنون

- بسسسس يا ولية إنتي.. من ساعة ما شفتك إمبارح  
وانتي ما بطلتيش كلام وأنا مش فاهم حاجة.. مندوب مبيعات  
أيه؟ وسيريال كيلر إيه؟ وسيف أيه؟ ويراقبكم إزاي؟ وفين؟  
وأمتي؟؟ بس.. بالأس.. إنتي إيه كل يوم حتجرجريلي واحد  
من الشارع وتيجي على هنا؟؟ إيه؟؟ ما بتسكتيش؟ ما  
بتزهقيش؟؟

قال "حلو" في سرعة

- طول عمرها كدة والله سعادتك.. أما جوزها قرب يفقد  
النطق.. وبقي بيشاور بس دلوقتي

صرخت "أم سعادة"

- أهو.. أهو اعترف.. أهو عرف أن جوزي مش طايقني..  
طب عرف منين بقي بالذمة؟؟؟ يراقبنا بقولك سعادتك

صرخ الضابط مرة أخرى



- انطونيو صاحب اوكتافوس اللي كانوا في جيش يوليوس  
قيصر قبل ما يغزّه بروطس بالسكينة في ضهره

بدأ وجه الضابط في الأحمرار.. وبدأت عيناه وكأنهما شعلة  
منتقاة من أحجار الحجيم.. وبدى على ملامحه غضب مُتصاعد  
جعل الجميع بما فيهم "حلو" يتراجعون لخطوات قليلة خشية  
إنفجاره فعليًا وحرفيًا...

ولكن طريقة على باب المكتب قطعت لحظات الغضب  
حين اعقبها دخول أحد المخبرين إلى داخل المكتب مؤديًا التحية  
العسكرية للضابط وهو يقول

- برة في واحدة اسمها الاستاذة سعادة و معاها أبوها يا باشا

صرخت "أم سعادة" في فرح

- بنتي حبيبتي.. جاية تلحق أمها من السفاح المجرم السريال  
كيلر.. دخلوها بسرعة

صرخ الضابط "عمار" في حدة

- بس يا وليه انتي.. قلت مش عاوز نفس

ثم نظر إلى المخبر قائلاً

- دخلهم خلينا نخلص من الليلة المبهوكة دي

وبالفعل دخلت "سعادة" ووالدها إلى حجرة الضابط الذي  
استقبلها قائلاً

- مساء الخير يا استاذة سعادة.. يا ريت نخلص من الموضوع  
ده بسرعة لأن امبارح مكانش يوم لطيف وأنا بتشائم بصراحة  
- متأسفين حضرتك على الازعاج ده.. إحنا مطلوب مننا  
إيه؟

- بطاقة الست الوالدة عشان نعمل محضر ونقفله  
مدت "سعادة" يدها بالبطاقة إلى الضابط الذي تلقفها دون  
أن يتفحصها ثم نظر إلى "حلو" قائلاً  
- بطاقة معاليك وكرنيه شركة المبيعات خلينا نخلص يا  
انطونيويه

تجاهله "حلو" تمامًا وهو يتطلع إلى "سعادة" قائلاً  
- هو حضرتك يا استاذة سعادة زعلتي من كام بيت الشعر  
اللي قلتهم لحضرتك؟

احمر وجه "سعادة" وتوترت ملامحها قبل أن تجيب  
- لا وأنا حزعل ليه يعني؟ أهو كلام  
ابتسم "حلو" قائلاً

- بس أكيد الكلام الرومانسي العاطفي له تأثير كويس على  
الستات.. وأكيد جوز حضرتك مُقَصِّر في التعبير بالكلام عن  
مشاعره زيه زي كل الرجالة المتجوزين  
تدخلت "أم سعادة" قائلة

- انت كمان مراقب جوزها؟؟ إلهى يوعدك بعشاوي إنت  
وهو في حبل واحد

قالت "سعادة" في حدة

- ماما!!!! أرجوكي قولتلك مليون مرة مش كدة!!!

قاطعها "حلو" قائلاً

- واضح أني كان عندي حق، وفي تقصير.. مش كدة؟

ازداد وجه "سعادة" احمراراً ولكن هذا لم يمنعها من مواصلة  
الكلام قائلة في غضب

- على الرغم من إنها حاجة ما تخصصكش.. إنما لازم تفهم إن  
العواطف والرومانسية مش مجرد كلام ينتقال ويتردد وخلاص..  
نظرة العين للست وهي بتناول الراجل كوباية الشاي ممكن تغرقها  
رومانسية.. لمسته ايديها وهي بتناوله كيس الزبالة الصبح مع  
ابتسامة برضه رومانسية.. صبه للمية من الازازة في كوباية و

مناولته ليها وهما على الغدا مع بعض احلى رومانسية.. الحكاية  
مش دائماً شعر وورد وقمر وتهيد.. اللي بيحب بيعيش حياته  
بضحكة واحدة.. وابتسامة ما بتتغيرش.. لأن قلبه اخد من الدنيا  
كل اللي هو عاوزه.. شريك حياته

تجبر "حلو" وهو يستمع إلى كلمات "سعادة" التي افقدته  
القدرة على النطق.. شعر بجنين شديد لها.. شعر برغبة عارمة  
في ضمها إلى صدره فوراً.. قفز العشق والوله من قلب نظراته  
لها.. حتى أنها لاحظت هذه النظرات فتوترت خلجاتها بشدة مع

استمرار إحمرار وجهها، وقطع جبل الصمت مرة أخرى أمها وهي تصرخ قائلة

- مجنووون يا حضرة الضابط.. سيريال كيلر بقولك..

هب الضابط "عمار" من مجلسه في حركة حادة مُخاطبًا  
"حلو" قائلاً

- انت حتعملي صالون ثقافي هنا يا روح أمك؟؟ إطلع  
بالبطاقة خليني اقفل المحضر وأقفل الليلة السوداء دي على  
دماغتك

ولكن "حلو" كان لا يزال ينظر إلى "سعادة" في عشق،  
غير عائب بكل من يحيطون به أو بصرخات الضابط الجنونية.. مما  
دفع الضابط إلى ضغط الزر فوق مكتبه ليستدعي المخبر الذي  
دلف إلى حجرته على الفور بصحبة مخبر آخر.. قاموا بأداء التحية  
العسكرية إلى الضابط الذي لم يبادلها التحية حيث قال في غضب  
- فتشوا الحيوان ده عشان عامل أخرس.. وطلعولي كل  
اللي معاه

امتدت يد المخبران ناحية "حلو" الذي تراجع في حركة حادة  
وهو يدفع المخبرين صائحًا

- محدش يمد إيده عليّ.. أنا أصلاً معايش حاجة ومعايش  
جيوب أشيل فيها حاجة.. مفيش بس غير خمسة وسبعين جنيه  
حاططهم في الصديري عشان كنت راكب بيهم.. أهم











- يعني إيه يا عصام معرفتش تقابل الحج عزازي؟

كان هذا هو سؤال سعادة في استنكار واضح أثناء طريق عودتها من القسم بصحبة أمها وأبيها وهي تخاطب "عصام" عبر الهاتف.. كان "عصام" في طريقه إلى منزله بعد نزوله من بيت الحج "عزازي" ومعرفة حالته الصحية من ابنته "سلمى" وزوجته وأنه طريح الفراش في المستشفى منذ يومين كاملين ويحتاج إلى راحة تامة.. مما دفع "سعادة" إلى الإنفعال رغمًا عنها حيث شعرت أنها بصدد فقد آخر طرف خيط يدخل الطمأنينة على قلبها بخصوص أي معلومة عن مكان تواجد "حلو" الذي انقطعت أخباره تمامًا.. وأعقبت سؤالها بسؤال آخر

- يعني يا عصام دلوقتي مفيش طريقة نعرف من الحج عزازي ده آخر مرة شاف فيها حلو كانت إمتي؟؟

- بصي يا سعادة.. بنته قالتلي أنه ابتدى يستجيب للعلاج  
اللي بياخده.. وان الدكتور طمنهم أنه متوقع يستعيد وعيه خلال  
اربعة وعشرين ساعة إن شاء الله بعد ما نتائج التحاليل اتحسن  
كثير

- طيب يا عصام دلوقتي انت حتروح تاني بكرة ولا أروح  
أنا ؟ ؟

- لا أنا ولا أنتي.. أنا اخدت نمرة بنته سلمى.. وأول ما حيفوق  
حتسأله بعد ما فهمتها أن الموضوع مقلق فعلاً.. وحتكلمنى فوراً..  
وانا كدة كدة حكلمها بكرة الصبح اسأل تاني.. وحسأل كل ساعة  
لحد ما نعرف هل الراجل عنده معلومة ولا لا

توترت "سعادة" بشدة وهي تقترب من منزلها وقالت

- يعني أنا حافظل كدة لحد بكرة؟؟ ما اعرفش عنه  
حاجة؟؟؟ أنا حموت من القلق يا عصام.. حموت

وبدأت نبرتها تدل على أنها سوف تدخل في نوبة بكاء مرة  
أخرى.. مما جعل "عصام" يبادرها بقوله

- يا ستي الصبر.. من هنا لبكرة الصبح مش كثير.. الساعة  
عدت ثلاثة صباحاً.. ده أنا فضلت مرابط قصاص باب البيت  
عندهم مع البواب لحد ما أهله جم من المستشفى يا دوب من  
نص ساعة.. بصي.. كام ساعة زمن ونعرف راسنا من رجلينا..  
وان شاء الله خير.. اطمني بس وادعي ربنا.. ياللا خشي نامي..  
تصبحي على خير

انتهت "سعادة" المكاملة والدموع تكاد تتفجر من مُقلتيها..  
ورفعت عينيها نحو السماء قائلة بكل خشوع وأمل ورجاء

- ياااااااا رب

وقلبها يخفق في منهي العنف

\*\*\*\*\*

ألوان.. ألوان.. ألوان

مرة أخرى وجد "حلو" نفسه محاصرًا بالألوان لدقائق قليلة..  
إنتهت سريعًا عندما خفتت تدريجيًا ووجد نفسه واقفًا من جديد  
داخل البهو الكبير الممتلأ بالكتب

ليطالع صفحات الكتاب العتيق الذي اتخذ قمة تلٍ من  
الكتب مكانًا.. دون أن تصدر عنه أي لفظة أو حركة  
إقترب "حلو" من الكتاب بعد أن عاد إلى هيئته الأصلية  
قائلًا

- والنبي إنت مش مكسوف من نفسك؟؟ مش ناوي ترحم  
الي جابوني من عمايلك السوداء دي؟؟ يعني أنا لو مسكتك  
فرتكت جلدتك دلوقتي تفتكرك أبقى غلطان؟

صدر الصوت من قلب الكتاب قائلاً

- يا حلو قُلتك بصراحة انت الي حظك وحش

- حظ ايه يا كتاب العجزة انت ؟ ملبسني جيبة جلد في نوّة  
اسكندرية وتقولي حظ ؟ ؟ باعتني من غير بوك فلوس فيه خمسة  
جنيه فضة حتى على بعض وتقولي حظ ؟ ؟ انت قاصد تذلني يا  
حليمو.. قول أه.. قوول..

- يا ابني والله أبدًا.. هي ظروف الحواديت كدة.. الأبطال  
ما بيتخلقوش من الفراغ يا "حلو".. وكل واحد فيهم ببذل مجهود  
كبير عشان يسعد اللي حواليه

- ايوة ايوة فعلاً.. انا كنت ببذل مجهود كبير أول مرة أني  
أهرب من العار ومن فرج.. والمرة الثانية كان في عمارة بحالها  
عاوزة تفتشني تفتيش ذاتي وأنا لابس جيبة على اللحم.. وكله كوم  
والولية الحربية ام سعادة.. يا ليت كان سيفي معي.. يا خسارة..  
عمومًا.. انا مش لاعب.. كدة شكرًا.. لاني بصراحة داخل على  
نزلة شعبية حادة احتمال تقلب معايا بسّل.. لانك أكيد المرة  
الجاية حتبعثني الاسكيو بملاية

- يا ابني أنت اللي بتختار الهدف.. وأنا ما عليا إلا اني  
اسخرلك شخصية الحدوتة.. ده أنطونيو ده كان أكبر قائد قوي  
رومانسي في التاريخ.. ده باع الدنيا كلها عشان حبيته.. غلطش  
أنا ؟ ؟

- غلطش ؟ ؟ ؟ روح يا شيخ ربنا ينتقم منك ده أنا كعوب  
رجليا شققت من الساقعة والمشي في برك المطر.. البرد دخل  
في عضمي بهدلني.. مش حاسس بركي.. وعصعوصتي منملة تمامًا

- خلاص خلاص.. المرة الجاية نعمل حساب الجو..  
والمواصلات.. والفلوس.. نشوفلك حاجة متكاملة

- جو ومواصلات وفلوس ونشوفلك؟؟ انت بتكلمني اًگنك  
بتكلمني عن شقق اسكان الشباب!! انت كتاب ولا كراسة  
شروط بس عشان أفهم؟ إيه الاستفزاز ده؟!!!

- أنا بس عاوز اساعدك.. بس تعرف.. المرة دي كان في  
تطور ملحوظ.. خدت بالك من وش سعادة لما قتلها الشعر  
والكلمتين الحلوين بتوعك؟؟

نظر له "حلو" في اندهاش وهو يقول مستنكراً

- هو أنا لحقت يا حليمو؟ ده أنا اتقفشت في بير السلم قفشة  
محصل الكهربا الي جي يحصل فواتير عمارة بيقطع فيها النور تسع  
ساعات في اليوم.. وكان منظري يقرف الكلب الاجرب.. بس  
تعرف برضه؟.. انا شفت في عنينا نظرة في القسم.. ما شُفتهاش  
من زمان.. من سنين.. نظرة الخضة الي كنت بشوفها أما كنت  
بقولها كلمة حلوة مش متوقعها.. نظرة الذهول الغير منتظر.. كان  
شكلها حلو قوي فعلاً يا حليمو

صدر صوت "حليمو" فحوراً من قلب الكتاب قائلاً

- مش قتلتك؟؟ انا الحواديت بتاعتي ما تخيبش ابداً

نظر "حلو" إلى الكتاب في بلاهة وقال

- والنبي تتوكس.. وتشوفلنا حدوتة عدلة يا ريت ما تنهيش  
بجرمة قتل أو دخول رعاية مركزة من بواردر مرض إلتهاب  
المفاصل اللي حيجيلي من البرد

- طيب.. شوف انت المرة دي تحب تعمل إيه؟.. إيه اللي  
ناقصلك في حياتك مع سعادة

اخذ "حلو" يدور بعض الوقت في مكانه وهو يحاول جاهدًا  
البحث عن أسباب فتور العلاقة بينه وبين حبيبته "سعادة"..  
لقد افتقد خلال زواجه للكثير والكثير من المشاعر.. ولكنه الآن  
لا يعلم أي تلك المشاعر أكثرها تأثيرًا.. لا يعلم ما يقدمه لها..  
حاول أن يقدم لها السعادة لكي يتفهم رأيها.. حاول أن يقدم لها  
الرومانسية حتى يتأكد من مشاعرها.. فماذا يقدم لها بعد؟؟

هل يقدم لها المال؟؟؟ أنه يعلم تمامًا انها غير مهتمة بالمال..  
لقد تزوجته وهو في حالة مادية بسيطة.. وعاشت سنوات  
عمرهما لم تشتك ولم تطلب.. "سعادة" ليس لها مطالب مادية  
ولن تسعدها الأموال

أذا.. ماذا يقدم لها حتى يدخل المشاعر مرة أخرى إلى  
قلبيها؟.. كيف يعوّض عليها سنوات الفتور التي مرت عليهما؟  
لا بد من أن يختار لها شعورًا جديدًا لم تختبره منذ زواجهما  
الذي دام خمس سنوات.. يجب أن يختار لها تجربة لم تمر بها معه  
من قبل

ظل السؤال يتردد بداخله.. ماذا يختار لها؟؟؟



- المغامرة

نطق بها "حلو" وهو ينظر إلى الفراغ مشدوهاً.. مما جعل  
"حليمو" يسأله من قلب الكتاب في اهتمام

- مغامرة؟؟ مغامرة إيه؟؟ وضحلي

نظر "حلو" إلى صفحات الكتاب قائلاً

- أنا من يوم ما اتجوزتها وأحنا عاملين زي البط المستكوفي..  
نصحى الصبح.. نتشمس.. ونرجع آخر الليل على العشة نتدفي..  
مفيش تجديد في حياتنا خالص.. لا خروج ولا سهر ولا مواقف  
نفكرها.. مفيش إثارة خالص في حياتنا.. وإيانا كلها ماشية برتابة  
واحدة ما بتتغيرش

تقلب صفحات الكتاب في هدوء وصدر صوت "حليمو"  
قائلاً

- اممم.. مفهوم.. بس برضه أنا محتاج توضيح أكثر عشان  
بترجع بعد كدة تقولي أنني بدبسك

- بص يا حليمو.. انا محتاج أكون مُغامر.. اخطف سعادة  
خطف كدة.. واخليها تشوف في يوم واحد اللي ما شافتوش  
بقالها سنين طويلة

لمعت صفحات الكتاب للحظة وقال "حليمو"

- تصدق بالله؟؟

- لا إله إلا الله



- احب على هوامشك يا شيخ.. أي حاجة بهدوم.. عادية..  
لبس بني آدمين.. لا أحمر ولا مايكرو ولا جلد تمساح الله يستر  
عرضك

- اطمئن.. واجهز..

وعاد الصوت الجهور مرة أخرى الى ترديد الكلمات  
- كل وقت.. وله حدوتة.. بس المهم.. تكون مضبوطة.  
وسطعت الألوان من جديد..  
واختفي "حلو" مرة أخرى..  
في قلب حدوتة جديدة.. وأخيرة...

\*\*\*\*\*

ذات التجربة التي يمر بها "حلو" في الانطلاق إلى كل  
حدوتة وحكاية جديدة.. نفس الألوان ونفس الشعور بفقدان  
القدرة على تحديد الزمان والمكان لعدة دقائق.. يعقبها إنقشاع تام  
لضباب الألوان المحيط به من كل صوب.. ليجد نفسه دائماً في  
مكان جديد

وهذه المرة.. وجد "حلو" نفسه واقفاً في أكثر مكان غرابة..  
سفينة كبيرة عتيقة مُظلمة.. في قلب الليل.. لا يكاد سطحها يظهر  
إلا عن طريق النور المنبعث من بعض القناديل القديمة التي تُضاء  
بالزيت.. كانت السفينة تسير وسط المياه بتؤودة شديدة

تحسس "حلو" ملابسه ليجدها ملابسًا قطنية فضفاضة  
دافئة.. يُزين خصره قطعة من القماش الطويلة الملتفة عددًا من  
المرات حول وسطه.. وعلى رأسه كانت عمامة قطنية ضخمة..  
امتدت يده تتحسس وجهه فوجد شاربا كثًا.. ولحية خفيفة  
شعر بثقل ما في أذنيه.. فامتدت يدها تتحسسها فاصطدمت  
بقرطين معدنيين مستديرين كبيرين متدليين منها مما جعل "حلو"  
يقول مُزعجًا

- يعنى هو أنت إن ما كنتش تلبسني أحمر.. أو عريان  
بجبية على اللحم.. تقوم ملبسني حلق؟؟؟ كتاب حواديتك كل  
أبطالها شمال.. ولا عمرك حتفلح  
دقق "حلو" في الشاطئ القريب من حوله.. ثم ما لبث أن  
ارتفع حاجبيه اندهاشًا وقال

- إيه ده؟؟؟ ده احنا في النيل؟؟؟ ده مصنع اسمنت طُرة  
أهو!!! طيب وإيه بقى السفينة دي؟؟؟ ويا ترى مين ابو حلق  
ده اللي راكب سفينة ضخمة كدة؟؟؟ عامل فيا إيه المرة دي يا  
حليمو؟؟؟ استر يا رب

بدأ "حلو" يتلفت حوله ليشاهد سطح السفينة الكبيرة  
وأشرعتها الممتدة لمسافة عالية.. إنها لا تشبه أي من المراكب  
الشراعية التي تسير في النيل.. وفي مؤخرتها كانت حجرة خشبية  
أسفل قمرة قيادتها المرتفعة عبر درج صاعد.. كُتب عليها بحروف  
عربية خالصة وبخط كبير منقوش على أخشابها

" سفينة السندباد البحري "

صاح "حلو" مُستنكراً

- سندباد؟؟؟ سندباد يا حليمو؟؟ حرام والله.. حرام..  
اقولك مغامرات عاطفية أنا والمدام تقوم تخليني سندباد؟؟؟ يعني  
المفروض أعمل إيه أنا دلوقتي؟؟؟ أتصرف أزي؟؟؟ افسحها في  
بُق رُخ؟؟؟ ولا اجري بيها قصاد تنين براسين؟؟؟ اوف بقى..  
اووووف

اخذ "حلو" يدور فوق متن السفينة وهو يفكر كيف  
يتصرف.. بينما التيار النهري يسير بالسفينة بهدوء شديد تجاه  
الشمال.. إلى أن قال "حلو" مُحدثاً نفسه

- هممم.. طيب.. أنا مش عارف بصراحة حَاقدر أعمل إيه  
إنما المهم دلوقتي أوصل لسعادة.. عمومًا.. الفجر أهو بيشقشق  
وع....

قطع حديثه مع نفسه صوت سرينة الشرطة النهرية وهي  
تقترب من السفينة في سرعة ويكاد ضوء كشافاتها يُجِلُّ الليل  
نهارًا لتستكشف طبع السفينة مع صوت صادر من مذياع عالٍ  
يقول

- إرمي المرسى وإثبت للتفتيش وأظهر أوراق الملكية  
وتصاريح النقل

لطم "حلو" خديه وهو يحاول الاختباء و الاختفاء من فوق  
متن السفينة هنا أو هناك قائلاً

- يا اادي المصيبة.. يا اادي المصيبة.. هو أنا مكتوبلي في كل  
الحواديت يطلعلي بوليس؟؟؟ هي وزارة الداخلية فتحت فرع  
حواديت؟؟؟ يا اادي النصيبة.. وبضاعة ايه؟؟؟ يا حومتي!!  
أنا عارف حظي الهباب.. أكيد دي حتكون أول مرة في حياة  
السندباد يتاجر في المخدرات.. أنا عارف حظي الإسود.. يوريني  
فيك يووووووووووووم يا حليمو خُد من قلبي وصر

بدأت دورية الشرطة النهرية الممشة في أربع أفراد من  
الاقتراب من السفينة والالتحام بها.. والصعود إلى متنها محملة  
بالسلاح.. واتجهوا فوراً إلى "حلو" وأحاطوا به وقال قائدهم في  
خشونة

- اوراقك بسرعة

تحسس "حلو" ملابسه في توتر وهو لا يعرف ماذا يجب  
أو ماذا يقدم.. ثم ما لبث أن ابتسم ابتسامةً بلهاء إلى قائد  
المجموعة وهو يشير إليه بكفيه مع كتفيه بما يعني أنه لا يملك  
أوراقاً.. مما جعل القائد يقول في غضب

- ماشي من غير ورق؟؟ ليلتك سودة أن شاء الله.. ويا  
ترى بقى محمل ايه بضاعة؟؟؟ انت شغال في الممنوع يالا؟؟؟  
نظر له "حلو" بذات الابتسامة البلهاء.. وهو لا يجب  
دليلاً على أنه لا يعلم أي شيء عن محتوى السفينة.. وهو يدعوا  
في سريره ألا يكون محتواها يحمل أي كوارث

انتشر المرافقون لدورية الشرطة النهرية داخل السفينة  
بإشارة من يد القائد ودخلوا إلى قلبها للحظات ثم عادوا وقال  
أحدهم

- تمام يا فندم.. محملة اتواب قماش يا فندم

نظر القائد إلى "حلو" بتشكك ثم قال

- قماش؟؟ وتنتقله بالليل؟؟؟ مع انها غريبة شوية انما  
ماشى.. فين أوراق البضاعة دي؟؟

زفر "حلو" في راحة.. ونظر له بعد أن عادت الدماء إلى  
الجريان عبر عروقه من جديد وقال في سرعة

- والله سعادتك.. شوف والله.. الراجل الي معاه الورق  
اخذ الفلوكة ونزل البر يجيب أكل وكدة سعادتك

نظر له القائد في تشكك وهو يقول

- بس دي مخالفة كبيرة.. النقل النهري له مواعيد.. ومفيش  
معاك ورق للمركب.. ولا ورق للبضاعة.. والمركب اساساً شكلها  
مش ولا بُد ومش طبيعية كدة وفيها حاجة غلط؟؟؟ دي لازم  
لها تصريح مخصوص

ازدرد "حلو" لعابه في صعوبة وهو يقول للقائد مُحاولاً  
الخروج من الموقف المتأزم

- نركن حالياً حضرتك.. بس الله يكرمك اركنها انت عشان  
أنا ما بعرفش اسوق غير اوتوماتيك.. ماليش في المانيوال خالص..  
حتى بقالي ساعة بأدور على الدبرياج ودايخ عليه مش لاقيه.

عقد القائد حاجبيه في غضب واندهاش وهو يقول

- انت حستعبط يا جدع انت؟؟ انت عاوز تفهمني انك  
راكب مركب بالحجم ده ومش عارف تمشيها!!

نطق "حلو" في سرعة

- ان شالله اطفحه سعادتك ما اعرف

صاح القائد في رجاله قائلاً

- ارسى على البر يا ابني انت بالمركب دي وهاتولي البني آدم  
ده عشان نشوف حنعمل فيه إيه ونشوف صاحب المركب اللي  
بيقول عليه.. ليلتك سودة انت وهو.. انا حصادر المركب دي  
بالبضاعة اللي عليها وحاخرب بيوتكم

هز "حلو" كتفيه في لا مبالاة قائلاً

- صدقني أنا مش حمنعك.. ان شالله تبيع منها في الاشارات  
حتت تنضيف

ازداد غضب القائد مع تلك الجملة وتحرك رجاله نحو مقود  
السفينة الكبيرة واقتادوها نحو البر في حنكة.. متجهين إلى أول  
مكان يمكن فيه إرساء السفينة.. ونزل منها الجميع إلى البر حيث  
قال "حلو" متسائلاً في قلق

- دلوقتي حضرتك السفينة معاكم.. وتحت أمركم.. ممكن أروح  
أشوف الراجل صاحبها عشان يبجي يتصرف معاكم ويشوف  
برضه أكل عيشه؟؟



قالها "حلو" وهو يزمع في قرارة نفسه الهروب فور أن يتركه  
يرحل.. ولكن قائد الدورية النهرية قال في غضب

- الكلام ده.. تقوله في قسم المعادي.. هناك تبقى تتصل بالزفت صاحب المركب وتقوله يشرف هناك.. احنا حنسلمك هناك وخلاص.. أنا مش فاضيلكم.. والمركب متحفظ عليها بمعرفتنا بدأ التوتر يسري في عروق "حلو" مرة أخرى وهو يصيح في فزع

- قسم المعادي؟؟ يا لهووي..يااااالهوي.. بلاش القسم  
الله يكرمك.. طيب اقولك.. بلاش قسم المعادي طيب.. تعالى  
نروح قسم مصر القديمة.. أنا مش مهم.. إرحم الضابط اللي هناك  
الله يكرمك.. ده اليوم لسة في أوله حروح منه فيبيليين يا  
لهوووووووووو

صرخ القائد في الافراد المرافقين له

- ياللا على القسم

وهنا.. قرر "حلو" أن يقوم بأمر شيء متوقع في مثل هذا الموقف

في لحظة واحدة كان قد تملص من يد مرافقه.. وانطلق يجري عابراً الطريق وكأن شياطين الأرض كلها تطارده.. ومن ورائه.. انطلق أفراد الدورية

وبدأت المطاردة مع نسيمات الفجر الأولى

\*\*\*\*\*

شارفت الساعة على الرابعة و النصف من صباح اليوم في  
الوقت الذي دلفت فيه "سعادة" ووالديها إلى منزلهم حيث قالت  
في تعب بالغ

- حمدالله على السلامة يا ماما.. الحمدلله أننا عرفنا نخرج  
من القسم بعد الحاجات الغريبة الي حصلت دي.. ده الضابط  
كان حيثجنن أما الحرامي هرب من القسم من وسطنا كدة.. دول  
زمانهم قالبين الدنيا

ارتمت "أم سعادة" فوق أول مقعد قابلها وهي تقول

- ااا يا ناري.. هرب الكلب الجبان المجرم.. هرب قصاد عني  
كلنا وما نعرفش راح فين.. فص ملح وداب.. قال كلمتين بكش  
من بتوعه وهووووب.. اختفى.. والضابط الله ينتقم منه.. قفش  
فينا احنا وعملنا محضر ازعاج سلطات عشان يقفل ورقه

ابتسمت "سعادة" وهي تحاول منع ضحكتها من الخروج في  
الوقت الذي قال فيه والدها

- ضابط غبي انه سابك

صرخت "أم سعادة" فيه صرخة هادرة وهي تقول

- بتقووووول ايه؟؟؟

اسرع قائلاً

- قصدي أقول انه ضابط غبي أنه سابك من غير ما  
يطمنك أنه قبض على الحرامي المجرم السفاح الإراري الي كان جي  
يدبحنا أنا وانت والبننت.. ده كان لازم يعين حراسة عليكي

- اااااا.. باحسب.. هو عمومًا كان شكله متلجلج كدة ومش على بعضه.. أول ما الحرامي فص ملح وداب ابتدى يلف حوالين نفسه ويقول كلام مش مفهوم.. زي "هو كل يوم بقى ولا ايه؟" وقعد بيرطم كدة

- معلىش.. هو لازم یرطم طبعًا.. انتی كنتی مؤثرة جدا معاه  
كلنا حسنا بكدة

- اه طبعًا.. أنا مكنتش حسيوا لولا أنه حلف ليوجھلي تهمة  
ازعاج سلطات وتعدي على موظف اثناء تأدية عمله.. بس مش  
مهم.. مسيري افقش الحرامي ده تاني.. حيروح مني فين؟؟  
- أيوة يا حبيبتى.. انتي اقعدي استنيه لأنه أكيد مش حيضيع  
وقت وأكيد حيجي عشان يدبحك ونخلص

ایک ایسی چیز ہے؟؟؟؟؟

- قصدي يدبحك ويخلص عشان ما يكونش ساب شهود  
يعني اقصد.. زي الأفلام اللي قاعدة قصاها طول النهار والليل  
- اااا.. فعلاً.. انا مش حيجيلي نوم الليلة دي.. حاقعد أسهر  
أما اشوف حيجي ولا لأ.. دايماً في مسلسل "إن سي إس أي"  
كان بيرجع.. دايماً

- خلاص.. أنا حخش أنام بقى عشان نبدل أدوار بكرة الصبح.. وانتى تنامي.. ماشي يا بطة حياقي؟

وقام الأب والتفت إلى "سعادة" وهو يرسم لها بوجهه  
إيماءات مضحكة مما دفع "سعادة" إلى كتمان ضحكتها بصعوبة  
وهي تقول معقبة

- أنا كمان داخله أريح جسمي يا ماما شوية.. تعبانة والنور  
ابتدى يشقشق ومحتاجة أريح جسمي شوية

قاطعتها والدتها وهي تسأل في انزعاج

- مفيش أخبار عن سبع البرومبة؟؟!!

تحولت ملامح "سعادة" إلى الحزن وهي تشير برأسها أن لا..  
ونفضت متجهة إلى غرفتها.. دخلت إليها وأغلقت بابها.. اقتربت  
من الفراش وألقت بجسدها وهمومها المتثاقلة فوقه واسندت  
رأسها إلى طرفه وهي تفكر في صمت.. تُرى أين يمكن أن يكون  
"حلو" في هذه اللحظة؟؟

وماذا تراه يفعل؟؟

\*\*\*\*\*

"وقّف عندك بقووووووووووووووووول"

كان هذا هو صراخ أحد العساكر المطاردين لـ "حلو" عبر  
شوارع المعادي الفارغة من المارة في هذا التوقيت من عمر اليوم  
وهذا الطقس البارد في قلب الشتاء أيضًا

شعر "حلو" أنه يجري كالمسوس.. وكان جسده الرشيح  
عاملاً مساعداً على الانطلاق بخفة ومهارة بين المباني وفي الطرق  
المتفرعة ومن خلفه رجال الشرطة بلا يأس

كان يجري وقد اختار طريقاً خاصاً.. يقوده مباشرة إلى بيت  
"سعادة".. ومع مرور الدقائق.. زاد فارق المسافة بينه وبين  
مُطارديه.. حتى بدأوا في الغياب عن نظره.. في الوقت الذي كان  
قد وصل بالفعل إلى بيت "سعادة"

وقف للحظات قليلة ليعيد تقييم الموقف.. ونفض عن رأسه  
فكرة طرق الباب مجدداً وخصيصاً مع وجود الفكرة القطيعة  
الملقبة بـ "أم سعادة".. ولهذا خطرت في رأسه فكرة سريعة وضعها  
موضع التنفيذ على الفور

انطلق "حلو" إلى جانب العقار.. وقفز في منتهى الخفة  
متعلقاً بمواسير الصرف التي سوف تقوده إلى الاقتراب من شرفة  
غرفة نوم "سعادة" القديمة.. وأخذ يتسلقها في مهارة حتى وصل  
بالفعل إلى محاذاة الشرفة وامتدت يده تدفعها في هدوء فأنتحت..  
أعقبها بقفزة قوية من فوق المواسير ليتعلق بإطار النافذة ويدخل  
إلى الغرفة المظلمة في صمت الغزلان.. ورشاقة الفهود

وقع نظر "حلو" على أروع ما رأت عيناه في تلك الأيام..  
وربما في حياته بأسرها.. وقع نظره على "سعادة".. وهي تتمدد  
على جانبها فوق فراشها متكئة على ذراعها وتضم ساقها إليها  
وكانها طفلة صغيرة تنشد دفناً ولا تجد من يمدها به

انفطر قلب "حلو" لرؤياها في هذا الحال مع شعوره  
بسعادة غامرة في نفس الوقت.. كان يريد أن يقترب منها ويضمها  
إلى صدره حتى يذوب قلبهما ويمتزجان سوياً فلا ينفصلان أبداً  
مرة أخرى

كان يريد أن يصرخ لها بكل مشاعر الحب التي حملها لها طوال عمره وتناساها في خضم مشاكل الحياة التي لا تنتهي

اقترب "حلو" في هدوء شديد حذر.. وعيناه لا تفارقان وجهها.. جلس إلى طرف الفراش في خفة واقترب منها وابتسم.. امتدت يده تتحسس وجتها الدافئة.. فبدأت في الإفاقة من غفوتها ووقع نظرها عليه

- حر ||||| م...

كتم "حلو" فمها في لحظة واحدة وهو يمسكها ويشير بأصبعه الآخر على فمه كعلامة للصمت.. ولكنها كانت قد وصلت إلى مرحلة من الفرع جعلتها لا تكاد تقوى على الصراخ من الأساس.. مما جعل "حلو" يقول لها في همس محاولاً أن يهدأ من روعها

- انا مش جي ادبڪ

شهقت "سعادة" واتسعت عيناها في رعب مما جعله يقول  
مرة أخرى

- ما تخفیش.. والله ما حاذیکی خالص.. بالعکس.. دا أنا  
جی أسعدک

بدأت علامات الفزع تظهر على وجه "سعادة" مع همس كلماته وبدأت الافكار تداعب رأسها ويده ما تزال تكتم أنفاسها.. فقال مُكملاً

- مش قصدي حاجة عيب لا سمح الله.. أنا اقصد.. أقصد.. يعني أقصد أني جي أخليكي تحسي بحاجة جميلة ما حسيتيهاش من زمان.

تسمرت عينا "سعادة" على وجه "حلو" في انفعال وهي تراقبه ولا تقوى على الحراك ولا مجرد المقاومة وهو يكمل بعد أن منحها ابتسامة عذبة

- أنا عارف انتي اتعذبتى أد ايه في الفترة الأخيرة.. وعارف قد أيه اتظلمتي.. وعارف قد إيه ضحيتي.. وأكيد لازم حد يرد لك جزء ولو بسيط من تعبك ووجعك وتضحيتك.. حتى لو عن طريق فسحة أو مغامرة أو حاجة ما عيشتيهاش قبل كدة.. انتي بقالك سنين ما اتفسحتيش فسحة حلوة

بدأت "سعادة" تعقد حاجيها وهي تستمع إلى كلماته التي مست جانباً مظلماً في كيانها.. ولكن نظرات الشك التي انطلقت من عينيها كانت تؤكد أنها ما زالت في مرحلة الرعب الشديد.. وهذا ما أيقنه "حلو".. أيقن أن كلماته لن تمثل أي قيمة لـ "سعادة" خلال الفترة التي تشعر فيها بهذا الحجم من الرعب

نظر إلى عيني "سعادة" مباشرة.. بصمت تام.. وعلى وجهه ابتسامة هادئة.. بينما لم ترفع عينيها من فوق عينيهِ وهي تغوص فيها وترتعد فرائصها.. ولكن

لسبب ما بدأ الهدوء يجد طريقه إلى قلبها.. لسبب ما شعرت "سعادة" ان هاتين العينين ليستا غريبتين أبدًا.. وأنهما لا تضرمان شرًا لها على الإطلاق.. نظرات ليست مخيفة.. بل محبة إلى قلبها.. مألوفة لديها.. ولكنها لا تعرف هذا الشخص.. حتى يده التي تكتم فيها.. لا تؤذيها.. بل أنه يضعها بكل هدوء على فمها.. ولا تدري هي لما شعرت بأن ملمسها معتاد

دقائقٍ مرت وهي تتسائل في قرارها.. و"حلو" لا يزال يرمقها بذات النظرة الحانية المحبة.. وفوق شفثيه أفضل ابتساماته.. ثم ما لبث "حلو" ان بدأ في هدوء يسحب يده من فوق فم "سعادة" وعلى وجهه ذات الابتسامة وذات النظرة.. إلى أن جلس مواجهًا لها وقد عادت يده إلى جانبه

لماذا لا تصرخ؟؟؟ لماذا لا تملأ الدنيا عويلاً؟ لماذا لا تستنجد بأحد ما؟؟؟ ما هذا الهدوء الغريب الذي يغزو أطرافها؟؟

إن مجلسه ونظراته ولمساته تذكرانها بشخص ما.. شخص قريب محبب إلى قلبها.. إنه يذكرها ب....

قطع حبل أفكارها تحطم باب غرفتها في عنف شديد.. ودخل منه الضابط "عمار" وهو يشهر سلاحه في وجه "حلو" قائلاً وحوله عدد من افراد الشرطة مدججين بالأسلحة - ولا حركة.. حركة واحدة وحضربك رصاصة تجيب أجلك



انفجر الموقف مع انتفاضة "حلو" وعودته إلى الوراء مُلتصقًا بالجدار.. بينما دلفت "ام سعادة" إلى الغرفة وأيها الذي توجه إلى "سعادة" وضمها في خوف بينما صرخت "ام سعادة" في جذل واضح

- أنا قلت أنك حاترجع تاني.. أول ما سمعت البت بتصرخ نص صرخة.. فهمت.. وكلمت البوليس يا حرامي يا سفاح يا.. يا.. إيه ده؟؟ مين ده؟؟؟ انت مين؟؟؟ ده مش هو الحرامي!! ده واحد تاني!! مين ده؟؟

نظرت "ام سعادة" إلى "سعادة" وهي تتسائل

- مين ده؟؟؟

ثم إلتفتت إلى الضابط "عمار" وهي تردد

- مين ده؟؟؟؟!!

صرخ الضابط "عمار" في وجهها وهو يقول

- بس يا ولية.. بس لاخذك رصاصة انتي كمان.. حللي عني الساعة دي.. جنتوني بقالكم كام يوم.. هو أنا فاتح القسم عشانكم؟؟!! اسكتي

ثم إلتفت إلى "حلو" وهو لا يزال موجهاً سلاحه إليه مباشرة قائلاً

- جرى إيه يا ولاد الحرام؟؟؟ بقالي ثلاث أيام ما نمتش وحاسس أن المعادي اتحولت لشيكاغو في عزها بسببكم.. انت

مين اللي باعتك هنا وعاوزين إيه من العيلة المهبوشة دي ؟ ؟  
ومين معاك تاني ؟ ؟ انطق ؟ ؟ ؟

شعر "حلو" ان الموقف يزداد تأزماً.. وأن الوضع على وشك  
الإنفجار بالفعل.. الكل مصاب بالتوتر القاتل.. الكل لم يعد يحتمل  
مزيداً من المفاجآت.. ولكنه لن يخاطر بفقدان شعور "سعادة"  
هذه المرة.. إنها لن تفهم ما يحدث مهما حاول أن يوضح لها في  
ظل هذا الموقف شديد التعقيد

كانت اشعة الشمس قد بدأت تجد طريقها إلى قلب الغرفة  
في هذا الوقت المبكر من النهار.. وقد قاربت الساعة على  
السابعة صباحاً

قطع صمت المكان صوت الضابط "عمار" وهو يعيد سؤاله  
في لهجة صارمة

- انت حتنطق أنت مين ولا افرغ فيك رصاصتين ونخلص  
بجلقك اللي في ودنك ده ؟

اجاب "حلو" في سرعة

- لا لا لا.. مالوش لزمة طبعاً حضرتك.. بمنتهى البساطة  
حضرتك... أنا سندباد

- يا دي النهار الازرق.. يا ابني بلاش استفزاز على الصبح  
أنا ما نمتش بقالي كتير والسلاح شاطر.. ما تستفزينش

- يا باشا والله ما بستفرك ولا حاجة.. أنا اسمي سندباد  
حضرتك.. وشغال مع السيرك القومي.. عشان كدة لابس اللبس  
ده.. وأنا جي عشان في حد باعتني للسعادة

انعقد حاجبا "سعادة" في شدة وهي تستمع إلى تلك الكلمات..  
بينما صرخت أمها وهي تقول

- السفاح ابن السفاح.. هو اللي بعثك عشان تخلص  
الي معرفش يعمل.. اضربه بالرصاص يا حضباط.. اضربه  
بالرصاص بسرعة يا حضباط.. حضباط

صرخ الضابط "عمار" في "ام سعادة" في جنون وهو يقول

- يا ست أنتي اسكتي.. سدي بقك ده خالص.. بقك  
ده جايب ساقعة أكثر من الشباك المفتوح هناك.. كفاية بقي  
اسكتي.. وانت يا بني آدم.. ايه الزفت اللي بتقوله ده.. انت مين  
ومين اللي باعتك هنا؟؟ انطق بدل ما افرغ المسدس ده فيك  
وفي الولية دي واخلص منكم انتوا الجوووووووز

اطرق "حلو" برأسه قليلاً.. ثم رفع عينيه إلى "سعادة" التي  
ترمقه في أهتمام بعد كلماته الأخيرة وهو يقول مبتسماً في صوت  
هادىء

- أنا اللي باعتني.. واحد كان تايه في الدنيا ومشاكلها.. واحد  
اختفي في روتين الحياة.. ونسي وسط الزحمة الإيد اللي كانت  
ماسكة في ايديه.. وما بقاش حاسس بلمستها.. ولا بقوتها..  
ولا بحنائها.. أنا اللي باعتني.. إنسان كان نسي تماماً.. ان شريكة

حياته.. محتاجة السعادة والرومانسية والروح الشقية اللي بتخلي  
حياة كل اتنين حياة جميلة

كانت ملامح "سعادة" تتحول إلى الدهول من وقع الكلمات..  
كانت تشعر وكأن كل كلمة تدخل إلى وجدانها فتحطم حجراً وتنتزع  
من وراءه حباً وعشقاً دفيناً.. قفز إلى عقلها صوت "حلو"..  
وأسلوبه.. وذكرياته معها في الجامعة.. وقصة حبها الجميلة.. شريط  
حياتها بالكامل دار في عقلها في لحظات قصيرة بينما أستكمل  
"حلو" كلماته في حنان

- اللي باعتني.. يقول إنه شال التراب اللي على قلبه فارجع  
يدق ثاني.. زي الأول وأكثر.. وإن شعوره معاكي بأقل قدر من  
"السعادة" بكل تأكيد سيكون شعور "حلو".

ورغم أن الساعة لم تكن قد تعدت الساعة صباحاً بيضع  
دقائق.. إلا أن الأمور قد تفجرت مرة أخرى فور أن بدأت سمح  
من الألوان في الظهور مرة أخرى.. وبدأت الأشكال في التداخل  
مرة أخرى

نظر "حلو" بسرعة إلى النافذة ليتأكد أنه ما زال في بداية  
النهار.. وأن اليوم ما زال في أوله.. ولكنه شعر بذات الشعور الذي  
يشعر به مع نهاية كل حكاية.. لذا.. لم يعر الأمر كثيراً من الاهتمام  
حين نظر إلى "سعادة" مرة أخيرة وملاحه تبدأ في الاختفاء في  
قلب ضباب الألوان البراقة وهو يقول

- اللي باعتني.. شايلى ليكي في قلبه اكتر من سعادة بابا  
نويل للعالم كله.. واكتر من حب انطونيو لكليوباترا.. واكتر من  
حلاوة روح وشقاوة السندباد لبلاد الدنيا

ارتجفت "سعادة" لوهلة وهي تحرق في عينا "حلو" وهي لا  
تزال بين ذراعي والدها وهي تتم في خفوت شديد للغاية بصوت  
لا يكاد يخرج من فمها

- حلو؟؟؟؟؟

ولكن "حلو" قد رآها بالفعل وسمعها.. فأعطاهها افضل  
ابتساماته.. قبل أن يغيب في ضباب الألوان ويختفي مرة أخرى  
وأخيرة

\*\*\*\*\*





ألوانٌ.. ألوانٌ.. ألوان

لا جديد

نفس المظاهر التي يعود بها "حلو" في كل مرة من احدى  
الحواديت التي يرسله خلالها كتب الحواديت العتيق  
وجد "حلو" نفسه من جديد داخل القبو المظلم الذي  
تضيئه تلك المصاييح الضعيفة  
وهو على هيئته الأصلية مرة أخرى

كانت العديد والعديد من الأسئلة تدور في رأسه بلا  
توقف.. وفور أن وقعت عيناه على الكتاب قال في غضب  
- معلىش عشان في سؤال مهم في المرحلة دي.. هو أنا شغال  
عند اللي جابوك لا مؤاخذه وأنا مش واخد بالي؟؟؟؟  
صدرت من "حليمو" ضحكة قصيرة للغاية اتبعها بسؤال

- ليه كدة بس يا حلو ؟ دا انا بحاول أساعدك يا ابني

صاح "حلو" قائلًا

- تساعدني ؟؟؟ انت بتستهيل ؟؟ انت متفق معايا أن النيلة  
الحدوتة تخلص أمتي ؟؟

رد "حليمو" قائلًا في سرعة

- الساعة اتناشر بالليل وقت هروب سندريلا

قال "حلو" مستمرًا في غضبه

- ولما هي نيلة "سندريلا" كانت بتهرب في إنصاص الليالي..  
ممكن أعرف بس ازاى سمجتني على ملا وشي والساعة يا  
دوب لسة ما جاتش تمانية صباحًا ؟؟؟ ده كدة تزوير رسمي  
في الحواديت.. إيه شغل سرقة دقيق العيش في أفران الحكومة  
ده ؟؟؟؟!!

ضحك "حليمو" ضحكة قصيرة ثم قال

- أصل الموضوع اختلف كثير المرة دي.. والأمور أغيرت..  
وجد جديد.. وفيه ضرورة قصوى

نظر "حلو" إلى الكتاب في غضب وقال متسائلًا وهو يوليه  
ظهره

- اتغيرت في أيه بقى أن شاء الله ؟؟ غيروا التوقيت الصيفي  
تاني وأنا مش دريان ؟؟؟ أنا عارف.. الحكومة دي حتجيلي  
شلل.. حتى في الحواديت



ضحك "حليمو" من قلب الكتاب وهو يقول

- لا.. الحكومة مالهاش دعوة.. والتوقيت مالوش دعوة كمان..  
انما الحج عزازي هو اللي له دعوة

التفت إليه "حلو" مُندهشًا وعلى وجهه علامات الاستفهام  
مما جعل "حليمو" يكمل قائلاً

- عمومًا.. مفيش وقت كتير باقى للشرح.. كلها كام دقيقة  
وحفهم كل حاجة

ثم بدى على نبرات صوته علامات التأثر وهو يقول

- إنت حتوحشني قوي يا حلو.. بس أديك عرفت السكة..  
وعارف تلاقيني فين.. ما تبقاش تنسى عمك حليمو اللي بينقل  
الحواديت

ازداد أندهاش "حلو" من كلمات الكتاب وقال

- هو في إيه يا حليمو؟؟ انت حيتقبض عليك ولا حاجة؟؟؟  
جالك عقد عمل في السعودية ومسافر طيب؟؟؟ أنا مش فاهم  
حاجة

ضحكة صدرت من قلب الكتاب في حنو وهو يقول

- أقل من خمس دقائق وحفهم.. أقل من خمس دقائق  
وحتلاقي الحج عزازي داخل عليك دلوقتي.. وتخرج من تاني  
للدنيا.. وتروح تشوف سعادة بجد.. وتقولها على كل اللي نفسك  
فيه

وقف "حلو" صامتًا فاستكمل "حليمو" كلماته قائلاً

- عارف يا حلو؟.. أنا حقولك على حاجة حتستغرب ليها قوي.. انت خلقت لنفسك حدوتة جديدة.. حدوتة مش بس بيحاول فيها البطل يوصل لحبيته زي كل الحواديت اللي بنقلها للناس.. لا.. انت خلقت حدوتة بيحاول فيها البطل يحافظ على حبيته للأبد بعد ما وصلها فعلاً.. انت خلتني لأول مرة من آلاف السنين أشوف نهاية جديدة للحواديت

بدت على وجه "حلو" علامات التوتر والأنزعاج وهو يقول

- أنا مش فاهم حاجة بصراحة.. ومش عارف ليه الحواديت بتاعتي ما كملتش للأخري يا حليمو أو مشيت بشكل مضبوط.. وبصراحة.. مش شايف أني قدرت أوصل حاجة من اللي جوة قلبي لسعادة.. أنا حاسس أني فشلت تمامًا يا حليمو

قال حليمو في رفق

- بالعكس.. لازم تفهم إن قيمة الحواديت يا حلو بتكون دائماً في المحاولة.. والإصرار على المحاولة.. والتمسك بالقيمة الوحيدة للحدوتة.. اللي هي الحب.. وانت في كل حدوتة من الحواديت اللي رحتها.. كنت بتحاول من كل قلبك.. ومُصمم.. ومُصر.. ودي الحاجات اللي حتتجح حدوتة كل بني آدم بيحب شريكة حياته.. سواء قبل الجواز أو بعد الجواز.. المحاولة والتصميم والإصرار على الحب

صمت "حلو" للحظات.. وهو يُفكر في كلمات العجوز التي  
مست جزءًا من قلبه.. وجعلته يشعر بالاشتياق إلى "سعادة"  
مرة أخرى

بالفعل.. انه يُحبها.. يعشقها.. رغم كل الظروف المحيطة بهما..  
رغم جلبابها الذي شوهته بقع الزيت والذي لم تعد تُلقى بالألّا لتغييره..  
رغم صوت ضرباتها المتتالية للحشرات في المطبخ وصراخها فرحًا  
بتحطيم رؤوس ما تطاله يدها منهم.. رغم وزنها الزائد الذي لم تعد  
تهتم بمحاولة انقاصه.. رغم كل ما يحيط بعلاقتها من توتر لعدم  
الانجذاب حتى الآن وحالتها النفسية المتردية لهذا السبب تحديدًا..  
إلا أنه بكل بساطة.. يذوب عشقًا في مُحبيها

هي فقط من أرادها في الماضي.. وسعى إليها.. وهي فقط  
من يعيش حاضره إلى جوارها رغم لطحات أمواج الحياة القاسية..  
وهي فقط من يرغب في أن يستيقظ من نومه بعد سنوات عدة  
ليطالع وجهها الصبح إلى جواره  
لم يحلم بأكثر من هذا في الماضي.. ولكنه نسي.. أو تناسى..  
والآن.. الآن فقط.. يتذكر

قطع حبل أفكاره الصوت العتيق الصادر من قلب الكتاب  
"حليمو" وهو يقول

- دقيقة واحدة.. وحيكون الحج عزازي هنا.. إوعى تنساني  
يا حلو.. وخليك دايمًا فآكر الكلام اللي قتلتهولك  
ابتسم "حلو" في هدوء وتأثر وهو يجيب

- أنا مش حاقدر أنسى انك كنت السبب الأساسي في اني اعرف قيمة حبي الحقيقي لسعادة.. وعمري ما حانسى اليومين الحلوين اللي قضيتهم معاك.. طبعاً بغض النظر عن مشاهد للكبار فقط اللي كنت بتبعيني فيها دي إلا أني فعلاً فهمت حاجات كتير قوي عن الحب وسنينه السوداء

ضحك العجوز "حليمو" ضحكة قصيرة قبل أن يقول

- مش حقولك توتة توتة خلصت الحدوتة.. لأن الحواريت في الأصل ما بتخلصش.. الحواريت بتستمر وتعيش طول ما ابطلها عاوزينها تستمر وتعيش.. أشوف وشك بخير يا حلو

وبدأت الألوان في السطوع بشدة في القبو.. وبدأت المصايح الصغيرة تزداد إضاءة وقوة... وتداخلت الأشكال للحظات قليلة.. ثم ما لبث كل شيء أن عاد إلى هدوئه مرة أخرى و الكتاب مغلق كما كان في بداية الأحداث

ومع عودة كل شيء إلى طبيعته.. انفرج باب القبو عن الحج "عزازي" وهو يدخل إلى القبو وعلى وجهه علامات الإعياء والإجهاد.. وهو يقترب من "حلو" في بطيء ويقف أمامه مذهولاً ثم يقول

- أنا قلت اني اكيد حاجي الاقيك جثة هامدة او شبه ميت.. انت بقالك أكثر من ثلاث أيام تقريباً من غير أكل ولا شرب.. انت واقف كدة وواعي ازاي؟؟؟؟!!!!

نظر له "حلو" نظرة فرحة وقال

- بقى كل ده بتجيب كوباية شاي يا حج؟؟؟ دا انت لو رحت تجيها من مزارع الشاي في الهند مشي كان زمانك جيت نظر له الحج "عزازي" في زهول مسـقـر مما جعل "حلو" يكمل في مرج

- المهم أنك جيت.. عُمر الشقي بقي.. حافهمك أنا.. انا أصلي كنت اتعلمت من شوية رهبان صحابي من التبت كانوا جايين يدرسوا و مقيمين في المدينة الجامعية بتاعة الأزهر هنا واتسممو في حادثة أكلة كشري.. المهم.. اتعلمت منهم كيفية الانخفاض بمعدلات الأيض إلى أقل درجة ممكنة لمقاومة الجوع والعطش.

نظر له الحج "عزازي" في عدم فهم تمامًا وهو يقول

- إيه يا ابني اللي بتقوله ده؟؟ ايه حكاية الأيض دي؟؟

رد "حلو" في سرعة قائلًا

- لا.. انت اظاهر ما كنتش بتتابع برنامج "سر الأيض" اللي كان بيعي في التليفزيون!! بص يا حج عزازي حفهمك لما نطلع من هنا.. يا تلحقني يا ما تلحقنيش عشان أنا خلاص حموت أدخل الحمام

وبالفعل خرجا سويًا من القبو واتخذا طريقهما للصعود ومنها إلى خارج المتحف حيث كانت سيارة "عصام عبدالراضي" واقفة تنتظر وفي داخلها أيضًا "سلمى" ابنة الحج عزازي التي أصرت أن تأتي معه نظرًا لحالته الصحية المتردية بعد أن افاق في المستشفى

وتذكر أنه قد ترك "حلو" في القبو وصمم على المجيء رغم حالته  
الصحية وتحذيرات الأطباء

وما أن رآه "عصام" حتى قفز من سيارته واقبل عليه  
واحتضنه في شدة وهو يطمأن عليه.. مما جعل علامات الأندهاش  
تبدو على ملامح "حلو" وهو يقول

- ايه ده يا جدعان؟؟؟ هو في أيه؟؟؟ ايه حضن المطارات  
ده؟؟؟ حد قالكم أنا كنت في عمرة ولسة واصل؟؟؟ إيه اللي جابك  
هنا يا عصام؟؟؟

نظر له "عصام" في اندهاش وهو يقول

- يا ابني ده الدنيا مقلوبة عليك بقالها ثلاث أيام.. في الوزارة  
والبيت.. وكمان سعادة بُرج من دماغها حيطير حتتجن من  
القلق عليك.. ده غير أنك اختفيت فجأة ومحدش لا عارف يجيبك  
بالموبايل ولا عارفين نوصلك لطريق.. ولولا عرفت أوصل للحج  
عزازي اللي فاق انهارة الفجر بس، أنا أول ما كلمتني سلمى  
من ساعتين اخدت بعضي وعديت عليهم في المستشفى جري  
وجينا.. والحمد لله إن انهارة الجمعة ومفيش بني آدم في الشارع  
الساعة دي تقريباً.. والمتحف مش شغال كمان

استمع "حلو" إلى كل تلك الكلمات في انبهار.. ولكنه لم يردد  
منها إلا جملة واحدة

- سعادة؟؟؟ قلقة عليا؟؟؟

- حموت يا ابني من القلق.. دي ما نيمتنيش من يومين وأنا  
داير ألف وراك وأدور عليك في كل حنة زي العيل التايه

ردد "حلو" في حب وشرو

- سعادة قلقانة عليا.. وحشتني قوي

امتدت يد "عصام" إلى هاتفه المحمول الذي رن في جيب  
سترتة وفور أن اخرجته ضغط ازراه ليجيب المتصل في سرعة  
وييتسم ليلقي هاتفه إلى "حلو" الذي تلقفه ليأتيه عبر الطرف  
الأخر من المحادثة الصوت الأكثر خلاصة في حياته.. الصوت  
المحب إلى قلبه.. صوت "سعادة"

- الو.. أيوة يا عصام.. في أخبار عن حلو؟؟ حموت يا عصام  
من القلق والدنيا هنا ملخبطة جدا وفي حاجات غريبة بتحصل..  
أنا خايفة قوي قوي يا عصام على حلو.. حموت خلاص مش  
قادرة

استمع "حلو" في هيام إلى كلمات "سعادة" التي تقطر قلقًا  
وعشقًا.. ثم قال في هدوء

- وحشتيني يا بطلة

جاء صوت شهقة المفاجأة عبر المحادثة قويًا تلاه صرخة قوية  
من "سعادة" وهي تقول

- حلو؟؟؟ انت حلو؟؟ انت فين يا حلو؟؟؟ حرام عليك  
يا حلو.. حرام عليك والله.. حرام عليك حموت

وتحشرجت الكلمات في حلقها وانفجرت في بكاء عميق ظهر  
واضحًا عبر الطرف الآخر.. مما جعل "حلو" يتسم في حنان  
وهو ينصت إلى صوت بكاءها ثم يقول

- صوت عياطك.. احلى من صوت الأجراس اللي في رقاب  
الرثة اللي بتجر عربية بابا نويل

توقفت "سعادة" عن البكاء دفعة واحدة وهي تنصت  
بإندهاش إلى كلمات "حلو" وتتذكر يومين ماضيا.. ولكنها لم  
تنطق.. مما جعل "حلو" يكمل مبتسمًا وقد شعر أن كلماته قد  
أيقظت بداخلها مزيدًا من التساؤلات

- وبرضه صوت عياطك احلى من صوت كل كلمة حب  
قالها انطونيو لكليوباترا

زاد اندهاش "سعادة" مع بدأ تداخل العديد من الأفكار إلى  
رأسها والدموع وصوت بكاءها الذي خفت لا يزال على الطرف  
الأخر.. مما جعل "حلو" يكمل

- عارفة صوت عياطك أحلى من إيه كمان ولا مش عارفة  
؟؟؟

تساءلت "سعادة" من بين دموعها وقد بدأت ابتسامة  
خفيفة ترسم على شفتيها  
- إيه كمان؟!!

ابتسم لسماعه صوتها وهو يقول بصوت لعب









- ها ؟؟ البنات ناموا ؟؟

اوماً "حلو" برأسه إيجاباً وأغلق باب الغرفة خلفه في هدوء  
ثم وضع الكتاب الكبير من يده فوق المنضدة المجاورة لباب الغرفة  
قبل أن يتجه على أطراف أصابعه إلى حيث تجلس "سعادة"  
على الأريكة أمام التلفاز تتابع أحداث فيلم أجنبي، وما أن جلس  
إلى جوارها حتى أحاطها بذراعه في ابتسامة قائلًا

- صوتي اتنبح معاهم وأنا عمال احكيلهم الحكاية بتاعة كل يوم،  
وبعدين ما بيزهقوش منها بقى، وأقعد أحشي في هدوم في بطني  
عشان بابا نويل، وأقف بالفانلة الداخلية في البرد عشان انطونيو،  
واتنطط على السراير زي القرد عشان سندباد وشغلاااا، كان  
يوم غلط يوم ما حكيتهالهم أول مرة الحكاية دي

ضحكت "سعادة" بصوت عال وأسرعت بكتان ضحكتهما  
بكفيها خشية ايقاظ الفتيات مما جعل "حلو" يستطرد قائلًا

- إضحكي يا اختي اضحكي.. وصحيم وخليني احكي واجيب  
من الأول ثاني بابا نويل وانطونيو وسندباد.. إضحكي

استقرت "سعادة" في الضحك مع استقرار "حلو" في كلماته  
بطريقته الساخرة المعتادة إلى أن قاطعها "حلو" قائلاً

- بس إيه الحلاوة دي والعسل ده والجمال ده ؟

إحمر وجه "سعادة" وهي تزيح يده من وراءها وتقول

- مالکش دعوة يا فالح وخليك في حالك

ارتفع حاجبا "حلو" في اندهاش وهو يقول

- يا حومتي ؟!! بقى أنا بقالي ساعتين ونص بحاول أنيم بناتك  
الثلاثة جوة وفي الآخر تقولي خليك في حالك ؟!! ده أنا اعملكو  
مجنون هنا الليلة دي!!

دارت "سعادة" ابتسامتها الخجولة وهي تقول له دون أن  
تنظر إليه

- ما إنت مش حتودينا لماما بكرة زي ما أنا طلبت منك  
وماسك في رأيك

اعتدل "حلو" مبتسماً وهو يقول لها

- يا حبيبة قلبي بكرة أنا قايلك انه بتاعي أنا وانبس  
مفيش ماما ولا بابا، خلي ماما تنكد علينا في يوم ثاني، العيال  
بس اللي حنعدهم على ماما تجلدهم براحتها، إحنا زوجان بقى،  
ده حتى عصام كلمني كان عاوزنا نخرج معاه هو ومراته وأنا

اعتذرت، زي ما خلعت بالعافية من الحج عزازي كدة قصادك  
في مكاملة الظهر، سعادة.. بقولك إيه.. أنا واحد اجازة بالعافية  
يومين وعاوز اعيد فيهم الذي مضى يا غزال انت يا عسل.. انا  
منبه على البواب أي حد يسأل عليا من سكان العمارة يقولهم  
مسافر.. مسافر يا غزال

ازداد احمرار وجه "سعادة" وهي تتدلل وتقول

- يا سلام يا خويا، دلوقتي بقيت غزال؟؟ ما كنت زمان  
بطبوطتك و كلبوطتك وكرومبتك يا بكاش

ابتسم "حلو" في جذل وهو يقترب منها ويحيطها بذراعيه  
ويقول لها

- الكلام ده زمان قبل ما نخلف النسائيس اللي نايمة جوة  
دي، وبعدين برضه الكلام ده قبل ما تخسي بعد الولادة وتنافسي  
كيم كاردیشان يا مُزة البحر الأحمر، اموت أنا في الام بي سي  
بوليود بالعريية.. ولا بالزلاجة حتى بلاش العريية

قهقهت "سعادة" في جذل وهي تدفعه قائلة

- بس يا حلو البنات تصحى!!!

رد "حلو" في ابتسامة لعب وهو يجذبها إليه في تودد

- بنات مين و بتاع مين؟ خلاص ناموا ومحدش حيخلصك  
من ايدي

نهضت "سعادة" وهربت من بين يديه واتجهت إلى غرفة  
نومها وهي تقول في دلال

- أنا حدخل أناام يا خويا، خليك بقى قاعد تابع الفيلم

قفز "حلو" نحو التلفاز فأغلقه بسرعة ثم اتجه إلى قابس  
النور ليطفئه.. وقبل أن يطفئه.. وقع نظره على الكتاب فوق  
المنضدة المجاورة لباب غرفة الفتيات.. فهرع إليه وحمله ليضعه  
باهتمام في مكان خاص وسط مجموعة كتبه المميزة المنتقاة

ووقف للحظة ينظر إليه ويتسم وهو يقرأ الكلمات التي  
خُطت فوق كعبه بحروف عثمانية قديمة وقرأها في صوت خافت  
"حواديت السعادة"

تمت بحمد الله

# عن المؤلف

- مواليد القاهرة أكتوبر 1976
  - خريج تجارة القاهرة عام 1998
  - مؤلف الكتاب الساخر: اعترافات جامدة 2014
  - أحد مؤسسي وعضو المكتب التنفيذي لمؤسسة إسمعونا لتنمية المجتمع
  - عضو مجلس ادارة جريدة المواطن الاليكترونية
  - كاتب حر فى عدد من المواقع و الصحف مثل
    - جريدة المصري اليوم الورقية
    - موقع جريدة المواطن
    - موقع "الجريدة"
    - موقع "شبكة أخبار مصر"
    - موقع "البديل"
    - جريدة "الوعى العربى" الورقية
  - خمسة عشر عامًا في مجال التخطيط و المتابعة في كبرى شركات المشروعات الصناعية.
  - له العديد و العديد من الكتابات المنشورة على موقع التواصل الاجتماعي Facebook
  - للتواصل مع الكاتب <https://www.facebook.com/sherif.>
- asaad1



**دار توياء للنشر والتوزيع**